

## Hethadenee waunauyaunee vadan Luke Vanenāna

<sup>1</sup> Hanau waunauthathee hadnedanuu hejadenenau hadjenanuu hauthase vavesee hauthedau hena hayauhuhau nanāe hājavaānethauwuthajauthaunin, <sup>2</sup> Hasevenānauau nanaa hehethee jasesee vasesā hāenuu nau nejaanuu hanadedaunau; <sup>3</sup> Hasethajaunau hethadee heee nananenau jea, vavesethaugudenau vahee hayauhuhau hehetheejasesee hadnewauthaunauwunathane nedānee, javaānethadee Theauthenus, <sup>4</sup> Hadeaenauwu hethauwuu hena hayauhuhau nesechauhauthehane. <sup>5</sup> Hena hese Herod, naja Judea, jasia vevethahehe Zacharias haseede, hadauchunanede Abia: nau henene hedaunāhene Aarauneau, nau heneseedaunin Elisabeth. <sup>6</sup> Nau haenesauuthāhenauau hathaāhenith Hejavaneauthu, thaunaugudethee vahee nanavaavedaunau nau hauchuwudaunau Vahadāde dejauthauwuvade. <sup>7</sup> Nau hehauwunesaunenauau, hanau henee hehauwunesaune Elisabeth; nau wauwu haenesauu vaehahenenauau. <sup>8</sup> Nau hethauwuu, henee daunausuvadanaude hathaāhenith Hejavaneauthu hāenauauchaude, <sup>9</sup> Nesedaunethe vevethahehehau, nesedaude hadnejaāde yehauthe hevadannauauwunene Vahadāhenith. <sup>10</sup> Nau haunauude henanedanede haevevethahedaune jathee nauauchuu jaa. <sup>11</sup> Nau haenauhauva hautheaune Vahadāde

haetheaugune hejavese jaanaa. <sup>12</sup> Nau hāenauhauwaude Zacharias, haejanethajau, nau nāthajaude haeedasaa. <sup>13</sup> Hau nuu hautheaune, jevanāthajau hathāhuk, Zacharias: havevethahede nanedauwuhuu; nau hadasea Elisabeth hadjaneseawaude hāau, nau Jaun hadeseau. <sup>14</sup> Nau nananin hadaunauwuthajau nau hadeneethajau; nau hadnewauthathee neethajauthee hāejanese. <sup>15</sup> Hanau haudvasāthaa hathaāhenith Vahadāhenith, nau haudnehauwuvane daudause dadajevenenaje, wauāthe neauthunaje; nau haudnechauchaunadede Hevadanauwauthauwunene Hejavaneauthu, haa hehethee hāejanese. <sup>16</sup> Nau haudnewauthaa dāeyaunenede Israel hadjaechuwayūāaunaude hese Vahadāhenith Henesaunaunenau. <sup>17</sup> Nau haudnedauwaunaude nauguu Vadanauwauthauwu nau neesenaudāhenith Elias hadjaechuwayūāauau vadauhau henesaunaunenau hese dāeyaunauauau nau nejenedauvathee gaugauuthajaudenau hadauethadee; hadnesaanudedede henanedanede hesanaa hese Vahadāhenith. <sup>18</sup> Nau Zacharias naudedusaene nuu? wauwu vanaehahenenau nau nadasea wauwu vadavehahenede, hathauhuk hautheaune. <sup>19</sup> Nau hautheaune hanaāauchuhananadethāde, Nananenau Gabriel henee theaugudaunauau hathaāhede Hejavaneauthau; nau janeauthēavānau haudnāedauwunathana, nau hadnauhauthēhathana nuu neethajaude waunauyauau. <sup>20</sup> Nau, naune, nananin haudnejanadene nau haudnehauwunēanade, haunaude hese nuu hayauhuhau nauauchaugu hethauwuu, hanau

nananin daujethauwaudauwu nadanadede,  
 nuu hadnethauwunauaichuu nauauchaugaune.  
<sup>21</sup> Nau henanedanede haedauyauhauvanauau  
 Zacharias, nau haegaugauanadauwu henee  
 dauguthetheaugude vadannauauwuu. <sup>22</sup> Nau  
 hāejenauāhede, haejeneanadetha: nau  
 haeenauwu daunauhauthāde vadannauauwuu:  
 haevathasauwuna nau haejanade. <sup>23</sup> Nau  
 hethauwuu, henee, chauchaunu hese  
 hāesevadanedaude haeyehau hesee nehayau  
 hedauauwuu. <sup>24</sup> Nau hee hena hese henene  
 Elisabeth hanaāenesaunenith, nau haegauduse  
 nehayau hayauthaunenethe hesese hee,  
 hanaāenehede, <sup>25</sup> Hesau Vahadāde naasehānau  
 hesee hāedaugauhauvānau hadgudanauwunānau  
 nāedayāhede henanedaa. <sup>26</sup> Nau nanedau-  
 dauchuaauwaude hesese hautheaun Gabriel  
 haejeauthewau hehethee Hejavaneauthu  
 hesee hedan Gananee haseenaugu Nazareth,  
<sup>27</sup> Hesāhedāeyaun haeenenehauwaune  
 henanin Joseph haenaneeseenith, hehethee  
 hedauauwuu David; nau hesāhedāeyaun Mare  
 haenaaseede. <sup>28</sup> Nau hautheaun haedasaa, nau  
 hanaāenehethāde, Haunauwuthajau, nananin  
 vechauthane, Vahadāde hanedaundaunāne:  
 hauwunaunane hesānaa. <sup>29</sup> Nau hāenauhauwaude,  
 haejanethajau hēdanadedaunin, nau haegaugau-  
 anade daun hadnesenaunenenechuhude nuu  
 hadnesauau. <sup>30</sup> Nau hautheaun, Jevanāthajau,  
 hathāhuk, Mare: hanau nananin vechauthāne  
 Hejavaneauthau. <sup>31</sup> Nau, naune, nananin  
 hadnesenaunin, nau hadneahene, nau JESUS  
 hadeseau. <sup>32</sup> Hadvasāthaa, nau Vāā Hejavaa

hadethauva: nau Vahadāde Hejavaneauthau hadvenaude naja theaugudau henesaunaune David: <sup>33</sup> Nau hadnajawaudauau hededanin Jacob jethaujenee; nau henajanede hadnehauwuthauuvadauaune. <sup>34</sup> Hanaāenehethaude Mare nuu hautheaune, Haddusenesau nuu hanau nāhauwāenaunau henane? <sup>35</sup> Nau hautheaun hanaāauchuhananadethāde, Hejavaneauthau Hevadanauwauthauwu hadnedasāne: nau naunauthauau Hejavaa haddugauyāaunāne; henaheee jea henee Naunaudāde hadnenaunewaude Heau Hejavaneauthau hadnethade. <sup>36</sup> Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedauchaunethe hesese wauwu hehauwunesaune neethade. <sup>37</sup> Hanau Hejavaneauthau vahee neneededede hayauhuhau. <sup>38</sup> Nau naune, Vahadāde daununānau hahagu Mare, hadnaasauau nuu hasenehene, nau hautheaun hanaāenauthāde. <sup>39</sup> Nau Mare hanaāethauwauthede hena hese, nau hanaāehaude jauaudanenauauwuu nauhauhaunee hesese hedan Juda; <sup>40</sup> Nau hanaejedāde hedauauwunene Zacharias, nau haenaunenechautha Elisabeth. <sup>41</sup> Nau hethauwuu, henee, Elisabeth hāenedauwauthaude daunaunenechuhunith Mare, dāeyaunaa haenauauwuja hethauwau-dauau; nau Elisabeth haechauchaunaude Vadanauwauthauwu: <sup>42</sup> Nau haevasanade, nau hanaāenehede, Hauwunaunane hesānaa, nau hauwunaunade dāeyaunaa hethauwaudauau. <sup>43</sup> Nau naudauhuthedasaa nuu, henee henaune Navahadāhewaunāde hadnedasānau? <sup>44</sup> Hanau, naune, chauchaunu hanadedaunau

haunaunenechauhude hāenedauwaudauwau  
 naunaudaunuu, dāeyaunaa naunauauwujahede  
 naunaudauau hee haunauwuthajaude. <sup>45</sup> Nau  
 hauwunaunade hesā henee hethauwuthajaude:  
 hanau hena hayauhuhau hadnethauwunaasauau  
 neethāedauwunade hehethee Vahadāhenith.  
<sup>46</sup> Nau Mare hanaāenehede, Navadathuwu  
 hauwaunehāde Vahadāhenith, <sup>47</sup> Nau nava-  
 dathuwu neethajaudaunaude Hejavaneauthu  
 Nānayauhāde. <sup>48</sup> Hanau nedaugauhauwaude  
 hadavenuhuhau hedaununaunau: hanau, naune,  
 hewaunehaa heejasesee vahee henaededaunau  
 hauwunaunade hadnethanau. <sup>49</sup> Hanau  
 hena Naunaudāde vanasaunee hayauhuhau  
 hasehānau; nau vadanaunee heneseede. <sup>50</sup> Nau  
 nauwunaunaude henee headaunādaunau  
 henajāthee henaedede nau nausunee henaedede.  
<sup>51</sup> Nenauhauthethāde hedāahede hejadena;   
 neneāsauaunaude hesāethajauhuhau hedāhene.  
<sup>52</sup> Nejananaude naunaudāhenethe hehethee  
 hetheaugudaunene, nau nejejenanaude  
 hadavenuhuhau. <sup>53</sup> Negaudauhaude  
 hasenahehau nauguu hethadenee; nau  
 nethauyādahehehau negudanaude jessaa.  
<sup>54</sup> Nenedahewaude heau Israel, nedauyewuwude  
 hedauwuyau; <sup>55</sup> Neesenehethaude havasevāene,  
 Abraham nau hedāeyaunewau jethauujenee.  
<sup>56</sup> Nau Mare haenedauguva hanāenethe hesese  
 hee, nau hanaāejaehaude nehayau hedauauwuu.  
<sup>57</sup> Wauhā Elisabeth hanaāevadauauadaude  
 hadneejanēsāde; nau hanaāeahede. <sup>58</sup> Nau  
 henedaudevādaunau nau henethesaunau  
 haenedauwauthaa hasauwunaunāde  
 Vahadāhenith haenauhauthehaa vanasaunee

hauwunaunadede, nau haenetheneethajauvaa.  
<sup>59</sup> Nau hethauwuu, henee hāenasaudauchunese  
 haejenauusanauau hadgauguusenith  
 dāeyaunauau; nau haedethanauau Zacharias,  
 thauguu heneseedaunin henesaunaune. <sup>60</sup> Nau  
 henaune hegau, hāheyaugaune, Jaun hadnethade,  
<sup>61</sup> Nau hathauhaugaunee hehauwuseenauau  
 hādaūānauau nuu neseede, <sup>62</sup> Nau haevathasauwu-  
 nanauau henesaunaunin, haadeneseenethe.  
<sup>63</sup> Nau haenaudede dasewauthaunauha, nau  
 haewauthaunauhā, Jaun haseede, hahagu.  
 Nau haunauude haegaugauuthajaudene,  
<sup>64</sup> Nau haegaunadenanauau, nau henethaune  
 haegauchauunauaune, nau hanaānadede,  
 nau haevaveenethedauna Hejavaneathu.  
<sup>65</sup> Nau nāthajauude haedasā haunauude henee  
 hathāeuchaunauthee: nau vahee nuu nehedaunau  
 haegaugauudedauune jedauwuu hathāauau  
 jauaudanenauauwuu Judea. <sup>66</sup> Nau yahee  
 hathāenedauvade haejenanauwu hedahenauau,  
 haudduthā naa dāeyaunaa, hahagaunee?  
 Nau hejadenene Vahadānith haenedau-  
 daunaa. <sup>67</sup> Nau henesaunaune Zacharias  
 haeechaunaudene Vadanauwauthauwu,  
 nau haeaeŷānautheda, <sup>68</sup> Vaveenethedaunaa  
 Vahadāde Hejavaneauthau Israel; hanau  
 haenauujāda nau daujauaudaunaudauau  
 hedenanedanede, <sup>69</sup> Nau thauwaudanaude  
 henenese hadnenayauhānauau jedauwuu  
 hedauauwunene hedaununaune David; <sup>70</sup> Dau  
 nausunanadede hedenaa Hevadanaeŷāhewau  
 neenaedenethe hājeenaedenauau: <sup>71</sup> Henee  
 hadnenanedanenauau hehethē haujau-

thavene, nau hehethee hejadenaa vahee hāthāasānavādaunene; <sup>72</sup> Hethauwuu hauwunau-nadede nesayānāedauwunaude havasevāene, nau hadnedauyewuwude Hevadanenesedauwau; <sup>73</sup> Deneauwauhude yesee havasevāene Abraham, <sup>74</sup> Henee hadvenānauau, jenāthajaude hehethee hejadenene haujauthavene hadnenayauhānauau hadnevevethedaunaunauau. <sup>75</sup> Nauguu vadanaunee nau chuwuu hathaāhede, vahee hesee hadenaededaunene. <sup>76</sup> Nau nananin, dāeyaunaa, haeyāhe Hejavaa haudnethane: hanau nananin hadnedauwaudauwu Vahadāde hadnesaanudene hevaunaa; <sup>77</sup> Hadvāde haeyaude hadnenanedanedaunee hededane hadjaegudanauwunaude hewauchudaudenene-nau, <sup>78</sup> Hehethee havathee hauwunaunadede Hāsaunaunene; nanaa Naugusaje hehethee hejavaa hadnenauujādaunānauau, <sup>79</sup> Hadvenaude hesee hathāetheaugunethe hadauveeyaunee nau hadaudugauyāsaa gaujauaudahede, hadnedauwaudauau hauauthene hesee hadaudādauyaunee. <sup>80</sup> Nau dāeyaunaa haeseau, nau hevadathuwu haedāeaune, nau haenaadaude hadaunechaudanee haunaude hesee hadneenauhauthethāde Israel.

## 2

<sup>1</sup> Nau hethauwuu hena hese hauchuwude haeneāsana hehethee Caesar Augustus henee vahee henanedanede hadnayāadee. <sup>2</sup> (Nau nuu nayāadede haenedauwunesede deauchuwunanenede Cyrenius Syria.) <sup>3</sup> Nau vahee haeauāchaudene hadnayāadee haunaude hanesāde hesee nehayau hededan. <sup>4</sup> Nau

Joseph jea haeyehau hehethēe Gananee, hehethēe hedan Nazareth, jedauwuu Judea, jedauwuu hededan David Bethlehem neseee, (hanau naadahagu hedauauwunene nau nedānee David,) <sup>5</sup> Hadnethenayāade naguu Mareheau heauthewauthādaune hadnewaune wauwu haehāthane heee henesaune. <sup>6</sup> Nau hethauwuu, henee hajesenausunanedauthēe, hese haevadauaunau hadneejanēsāde. <sup>7</sup> Nau hanaāejanēsāde henedauwusaune heau, nau haeajetha, nau haesevana hewauchuhauchave nedau vethehenethe; hanau haeneau yethehedaunauauwuu. <sup>8</sup> Nau hena vavade vedauauwuu haudānajauāhehauau haeaudenauau, haeaunaunehanaunau haeau-nauyauhauvanauau hedajauanenau vegau. <sup>9</sup> Nau, wauhā, Vahadāde hedauthēaune haedasā, nau havathee haeseenaunasāaunauau Vahadānith; nau haevasenāthajaunauau. <sup>10</sup> Nau hautheau jevanāthajauau hathāhaugaunee: hanau, naune, nauuchaudaunathana hethadee waunauyauau havathee neethajaude, nanaa heee vahee henanedanede. <sup>11</sup> Heee nananena janeseē nuu deseneē hededan David Henayauthāhe, nananede Chris Vahadāde. <sup>12</sup> Nau nuu hadneaenauwuna; Nananena hadveehauna dāeyaunaa hanajehede, saeseē hewauchuhauchave nedauvethēethēe. <sup>13</sup> Nau nauhauhaunee hena haewauthanaunau hejavaa hautheauunauau nauguu naa hautheau haevaveenethedaunanaunau Hejavaneauthu, nau hasenehehaugaunee, <sup>14</sup> Havathee hauwaunede heseē Hejavaneauthau hejavaa, nau daseē vedauauwuu nanethauaunee, hethadee hathanavana henanedanede. <sup>15</sup> Nau



hethauwuu, hautheaunauau haejaenauthā hese hejavaa, Wauhā hadeehaunau Bethlehem, hanathadagaunee nuu haudānajauāhehauau, nau nauhaudauwuu nuu hayewhu javeauau, nanaa Vahadāde hāēdauwunādaunene. <sup>16</sup> Nau haenauchuhanauusanauau, nau haeveehanauau Mare nau Joseph, nau dāeyaunauau haesaesene hewauchuhauchauwauauwuu henee nedauvethenethe hewauchuhauchāve. <sup>17</sup> Nau hāenauhauwauthee, haeneānauthedanauau nuu hathauthedaunāhethee hee dāeyaunauau. <sup>18</sup> Nau vahee hathāenedauvade haegaugauanadauwu henee hayauhuhau nuu hathauthedaunāthee haudānajauāhehau. <sup>19</sup> Nau Mare haeaunaunede vahee nuu hayauhuhau, nau haegaugauanade hedahaa. <sup>20</sup> Nau haudānajauāhehauau haejaesanauau, haevaveenethedaunanauau nau haevaveenethedaunanauau Hejavaneauthu hee vahee hanathadavuthee nau hathauhauthāthee, neethāedauwunāhethee. <sup>21</sup> Nau hāenasaudauchunese hadneegauguusede dāeyaunaa heneseede Jesus, haseadagu nuu haseede haenaneeseāde hautheaunau haunauau deejethāsee. <sup>22</sup> Nau hese hāewaudeauchaude hasaunee hedauchuwude Moses hāevadauaunee, haeyehauthanauau hese Dadaunedan hadjenanauwunauthee Vahadāhenith; <sup>23</sup> (Hathauthaunauhunee hauchuwudaunaa Vahadāde, Dajee haunauahee henee nedauwusau vadade hadnethade hese Vahadāhenith:) <sup>24</sup> Nau hadnausāyaudenee neesenedaunee hauchuwudaunaa Vahadāde, Hanesethee vedāenauau, wauāthe hanesethee neauthuvedāesaunauau. <sup>25</sup> Nau, naune, hena henane haenedau

Dādaunedan, Simeon haenaneeseede; nau naa henane haechuvā nau haethauwuthajau, haejauwuwude hadneneethajauthee Israel: nau Vadanauwauthauwu haethāsade. <sup>26</sup> Nau haeauthedaunaa Vadanauwauthauwu, henee hadjenauhaudauau gaujauaudahede, haunaude hadnauhauwaude Vahadāhenith Chris. <sup>27</sup> Nau haejeheenuusa Vadanauwauthauwu jedauwuu Vadannauauwuu: nau hāene henehā Hejavaeneauthusau jedanāde hadnesehāde thauguu hasauau hauchuwude, <sup>28</sup> Hanaāejavethenuanaude hejadena, nau haevaveenethedauna Hejavaneauthu nau hanaāenehede, <sup>29</sup> Vahadāhene, hewaunehaa nanehājejenanaude hauwauwaunave hadnau-dauau nanethauaunee, hasauau hadanadede: <sup>30</sup> Heee nasesā naunauhauwauau havāde Henayauthāhe, <sup>31</sup> Naa nananin hadnesaanudene hathaāhedaunee vahee henanedanede; <sup>32</sup> Hese hadneesenee Hathāauau henanedanede, nau havathee hadnanedanede Israel. <sup>33</sup> Nau Joseph nau henaune haegaugauanadauwu hena hayauhuhau hanasenehethavathe. <sup>34</sup> Nau Simeon haevethasa, nau haeāedauwuna Mareheau henaune, Naune, Naa dāeyaunaa hanejejanade hadneaunenauaudenene nau hadneejaegauhadenene hauwauhuu Israel; nau hanau nauhauthethau hadnevathevade; <sup>35</sup> (Haa, gaugauchu hadneegauchuguhune nehayau havadathuvaa jea;) henee gaugauuthajaudenau hauwauhuu vadauhau hadneauthasuu. <sup>36</sup> Nau hena haenesā Anna, haeyāhe, hedaunau Phanuel, hanaadāde Aser: haewauthanenau hejajenewau, nau haenethenaedeva hechu nesaudauchu

jajene hehethee neeesede; <sup>37</sup> Nau haenevesāne hee nasaudausauau yānēee jajene, nananede haeejethauunaude vadannauauwuu, hau haenesedauna Hejavaeneauthu nauguu naugauyaude nau vevethahede dajāee nau hese. <sup>38</sup> Nau haeejedā hee haevaveene jea Vahadāhenith, nau haeeauthedauna vahee nethāejauwuwudethee jauaudaunauthadede jedauwuu Dādaunedan. <sup>39</sup> Nau hāesedauthee vahee hayauhuhau hasauau hauchuwude Vahadāde, haejaesanauau hese Gananee, hadahethee hedan Nazareth. <sup>40</sup> Nau dāeyaunaa haeseau, nau haedāeaune hevadathuwu, haechauchaunaude haeyaude: nau Hejavaneauthu vadaude haethāsade. <sup>41</sup> Nau wauhā henehā haeehaunenau hese Dādaunedan hadauchuvelanene vasevadanese Hadavechauthadede. <sup>42</sup> Nau denesenene hejajenewau, haeehaunauau hese Dādaunedan hanau nesedaudene vasevadanese. <sup>43</sup> Nau hese hāevadaunaee, hāejāesathee, dāeyaunaa Hejavaneauthusau haenasedauusa Dādaunedan; nau Joseph nau henaune haejaenauwu. <sup>44</sup> Hau henaneda haenehauvā hathanauwauhaugaune, nau haejanaugudaune; hanaāenaudehauthee henedauānene nau henedaehāhene. <sup>45</sup> Nau hāejeveehauthee, haejaesanauau hese Dādaunedan, daunaudehauthee. <sup>46</sup> Nau hethauwuu hāenasese hanaāeveehauthee jedauwuu vadannauauwuu, haetheaugune nahethāe hauthedahehau, haejaatheha, nau haenaunaudedauna. <sup>47</sup> Nau vahee hathāenedauwauthāthee haegaugauanadauwu hedaeyaunene nau hedauchuhanehedanene.

<sup>48</sup> Nau hāenauhauwauthee, haegaugauanavanauau: nau henaune, Nā, nau du hanesehāane? hathāhuk, naune hāsaunau nau nananenau nenaudehane nejeneethajaunee. <sup>49</sup> Nau hathauhuk, nau du haenaudehena? gauhajaene nauchāe wauwu hanedaudauwau Nāsaunau henesethaude? <sup>50</sup> Nau haejaenauwu hasenehethāthee. <sup>51</sup> Nau hanaāenethaunaude, nau haenauusanauau Nazareth, nau haeethauwaudaunā: hau henaune haeunaunedene vahee nuu nehedaunau hedahaa. <sup>52</sup> Nau Hejavaneathusau haeneenaneane hedaeyau nau hajedāde nau vechauthaude Hejavaneauthu nau henanedanede.

### 3

<sup>1</sup> Wauhā yauthaunenee jajene wauwu neeenajanede Tiberius Caesar, Pontius Pinade nausunajawaudauau Judea, nau Herod nanajawaudauau Gananee, nau henauhauwauau Theneb nanajawaudauau Iturea nau vedauauwuu Trachonitis, nau Lysanias naja Abilene, <sup>2</sup> Annas nau Caiaphas vevethajanauau, Hejavaneauthu nanadede haedasaa Jaun heau Zacharias nauaunee. <sup>3</sup> Nau haedade vahee vedauauwuu hanathaudanee Jordan, haeauthedaude dusaahede haudneaugauthuu gauguuthajaudenau hadneegudanee wauchudaudenau; <sup>4</sup> Naathauthaunauhuu wauthaunauhanaa hedanadede Esaias haeyāhe, Jasaye haevasenehe nauaunee, Hesaanuu hathaāhede Vahadāhede, nesedee hevau chwuwuu. <sup>5</sup> Hadauchugauaudayauau hadnechauchanaa, nau hadauchāe hauane

nau jauaudane hadjananee, nau jajāvāe hadchuvanee, nau hadauhauauyauau bau\* hadneyauthauau; <sup>6</sup> Nau vahee henanedanede hadnauhaudauau Hejavaneathu hedenayauthaunene. <sup>7</sup> Haenaāenehethaude waunauthanee henanedanede henee hedaśādaunau haddusaanaude, Hau hedenaededaunenau seseyānauau, hanaa hāedauwunādaunenau haddaugauhudauwuna nauthee hasenaunaude hadnauusanauau? <sup>8</sup> Hethadee nesedee hadeheaenaunee hadnaugauthuu haugaugauthajaudenenau jevaauthenehee hadahenauau, hāśaunaunene Abraham: hanau nāedauwunathana, Hejavaneauthau neene nesehaude nuu hauunaugānau Abraham hedāeyaunewau. <sup>9</sup> Nau wauhā jea hauunauchu janenanee hethājee hauhaudee: vahee hauhaudee jeneeaudehuk vevenaundenau haddauwauhude, nau hadneewaudeadaunaunee. <sup>10</sup> Nau henanedanau haenaudeadaunaa, hauddusedaune? hathāhuk. <sup>11</sup> Hanaāāedauwunaude, Daun nanesevechudaunade, jvena daun janevechudaunenith; nau daun hevethenede jenaasedaude, hahagu. <sup>12</sup> Wauhā haenaāenuusathee hauāyāhehauau haddusaahethee, Hechauhauthethāhe hauddusedaune, hathāhuk, <sup>13</sup> Nau hathāhaugaunee, javaauthaunaudaunāthe henee nethautheavane. <sup>14</sup> Nau vanenanenau hanaasedaunethe, hanaasenehethāde, Nau haddusedaune, hathāhuk? Nau javaauthasenehaa henaneda, hathāhaugaunee, javaauthenanedaunevaa

---

\* **3:5** “Bau” probably should be “vau” (meaning “way” or “road”), in line with the rest of the text, since the letter “b” appears nowhere else except in foreign names.

henaneda, nau hadnanethauaunahedava  
 haunaudaunadenenau. <sup>15</sup> Nau henanedanau  
 hathanavāhuk, nau vahee henanedanede  
 haegaugauanavaa hedāhenenau Jaun wauau  
 Chris haenane, nau wauāthe hajee; <sup>16</sup> Jaun  
 hanaāauchuhanehethaude, hathauhuk vahee,  
 Hadneedusaanathana heee naje; hau hanesāde  
 javaānaudāde javaāhenau jaunaude hewauhugu  
 hewauaunaa nāhauwuneaugunavane, hadnee-  
 dusaanāna heee Hejavaneauthu Vadanauwau-  
 thauwu heee heseda. <sup>17</sup> Henaunasāhau nanewau-  
 unauau, nau hadgaunauhauau heyauthee  
 nedauthauayāde, nau hadnauānauau wauchu-  
 unethauauhanau nedauthānauau jenayaunau;  
 hau jenethauayaunau hadvadauchauauau  
 hesedaa nedaujesaudaunahee. <sup>18</sup> Nau  
 waunauthanee hanasejāesaunee hayauhuhau  
 hanathauthedaunaude henanedanau. <sup>19</sup> Hau  
 Herod naja haeaunaunewau heee Herodias  
 henauhauwauau Thenebeau henenene,  
 nau vahee hathāewausaunee hanasedaude  
 Herod, <sup>20</sup> Haewauhaunene nuu vahee henee  
 dauaugauhude Jauneau duguhunauauwu.  
<sup>21</sup> Wauhā hāevahesedusaahedaunee henanedanede,  
 hethauwu henee Hejavaneauthusau  
 haenethedusaā, nau haevevetha, hejavaa  
 hanaāegaunanenee, <sup>22</sup> Nau Hejavaneauthu-  
 vadanauwauthauwu haejejanauhusane  
 hedanayaunaa hedanayau haenaasaunee waude  
 vedāene nau hanadede haejenauusa hehethee  
 hejavaa, hasenehehuk, Nananene vechauthauau  
 Nāa, nananene vaveenethedaunathane. <sup>23</sup> Nau  
 Hejavaneauthusau nehayau wauwu wauau  
 hanasauau jajeneva, hanane (hathanavade) heau

Joseph, nananenith heau Heli, <sup>24</sup> Nananenith heau Matthat, nananenith heau Levi, nananenith heau Melchi, nananenith heau Janna, nananenith heau Joseph, <sup>25</sup> Nananenith heau Mattathias, nananenith heau Amos, nananenith heau Naum, nananenith heau Esli, nananenith heau Nagge, <sup>26</sup> Nananenith heau Maath, nananenith heau Mattathias, nananenith heau Semei, nananenith heau Joseph, nananenith heau Juda, <sup>27</sup> Nananenith heau Jonanna, nananenith heau Rhesa, nananenith heau Zorobabel, nananenith heau Salathiel, nananenith heau Neri, <sup>28</sup> Nananenith heau Melchi, nananenith heau Addi, nananenith heau Cosam, nananenith heau Elmodam, nananenith heau Er, <sup>29</sup> Nananenith heau Jose, nananenith heau Eliezer, nananenith heau Jorim, nananenith heau Matthat, nananenith heau Levi, <sup>30</sup> Nananenith heau Simeon, nananenith heau Juda, nananenith heau Joseph, nananenith heau Jonan, nananenith heau Eliakim, <sup>31</sup> Nananenith heau Melea, nananenith heau Menan, nananenith heau Matthatha, nananenith heau Nathan, nananenith heau David, <sup>32</sup> Nananenith heau Jesse, nananenith heau Obed, nananenith heau Booz, nananenith heau Salmon, nananenith heau Naason, <sup>33</sup> Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda, <sup>34</sup> Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor, <sup>35</sup> Nananenith heau Saruch, nananenith heau Ragau, nananenith heau Phalec, nananenith heau Heber, nananenith

heau Sala, <sup>36</sup> Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech, <sup>37</sup> Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan, <sup>38</sup> Nananenith heau Enos, nananenith heau Seth, nananenith heau Adam, nananenith heau Hejavaneauthau.

## 4

<sup>1</sup> Nau Hejavaneauthusau wauwu haechauchaunaude Vadanauwauthauwu haejeehedesa hehethee Jordan, nau haeyehauthaa Vadanauwauthauwu nauaunee, <sup>2</sup> Yāyauau hese hananeedauchunese haenayāthehaa Haujaune, nau hena hesee haeheejevethē: nau hāevathenesee, haenaāsenade waunee. <sup>3</sup> Nau Haujaune hathāhuk, hith nananene Haāthauwuāvaa Hejavaneauthau hāedauwunene naa hauunauga hadejauaujaunenede. <sup>4</sup> Nau Hejavaneauthusau haeauchuhanehe hathauhuk, Wauthaunauhuu henane hehauwuunaede jauaujaunau jasaa, hau hee haunaude hedanadedauunene Hejavaneauthu. <sup>5</sup> Nau Haujaune haenauauhuchauhaa hauanee hadaujauudanenee, nau haenauhauthehaa vahee najanede hathāauauvaa henanedanede chauchaunu. <sup>6</sup> Nau vahee nuu najawaude hadvenathane, nau hauwaunede, hathāhuk Haujaun: hanau henee nananenau devenanau; nau daun navadauvenau hadevenauau. <sup>7</sup> Hith nananene henaheee hevevethedaunenagu, vahee hadnehanāhene. <sup>8</sup> Nau Hejavaneauthusaun



hanaāauchuhananadethāde nau hathāhuk, Hede hau nau gauvaa, Haujau haugau hathauthaunauhuu, Nananene hadevevethedaunaude Vahadāde Hāsaunau, nau hanesāde haudnevevethedaunaude. <sup>9</sup> Nau hanaāehauthāde Dādaunedan, nau haejenanaa nau nau auhuu vadannau auwuu, nau hith Haāthauwuāvaa Hejavaneauthau hau wujanauau hede hehethee, hathāhuk: <sup>10</sup> Haugau hathauthaunauhuu, Hadāedauwunaude hedauthaunau haddunānaune: <sup>11</sup> Nau hejadenenau hadejedunānaune, havaaugugauusene headaa dasee hau nau augāe. <sup>12</sup> Nau Hejavaneauthusaun hanaāauchuhananadethāde nau hathāhuk, Hasenehee, Nananene jevanayāthehene Vahadāde Hāsaunau. <sup>13</sup> Nau hāevathenayāthedaude vahee, hanaāejathāde haujau najee, <sup>14</sup> Nau Hejavaneauthusau hanaāejaenaudāhede Vadanauwauthauwu haduu Gananee: nau hanaāauthedaunenede hanaāeneāsanaunee vahee hathāauau Gananee nauanee. <sup>15</sup> Nau haechauhauthaha vevethahenau auwuu, nau vahee haevaveeneha. <sup>16</sup> Nau haenauusa Nazareth, needaunauuchauhade: nau dajauaunee nesedaude haeyehau vevethahenau auwuu vadanese, nau haetheaugu dasauhaudauau wauthaunauha. <sup>17</sup> Nau haevenau hewauthaunauhanene haeyāhew Esaias. Nau hāegaunanauau wauthaunauha, haeveede hadauwauthaunauhunee, <sup>18</sup> Vahadāde Hedauwauthauwu nanadeaunānau, hanau dehedusaanānau javeda hadnauthedaunu hethadenee waunauyaunee hadavenuhunethee: hanejevāde haudnenayauhu nau dauwuthajauthee, hadnauthedanau haudjaejenanathee

wauwaunauau, nau hadnejanauhauthāthee  
 nanenauguthee, haud-jaejenanathee\*  
 hasenethaunauau, <sup>19</sup> Haudnauthedaudauwau  
 hethadee jaunaunauau jaje Vahadāde. <sup>20</sup> Nau  
 haeauauvane wauthaunauha nau haejaevena  
 vevethahehew, nau hanaāejanaugude. Nau  
 vasesā vahee hathāanedauthee vevetha-  
 henauauwuu haenāauhauvanauau. <sup>21</sup> Nau  
 hanaāejasesenehethaude, nuu desenee nuu  
 hathauthaunauhuu hethauvaa haunaudaunune-  
 nau. <sup>22</sup> Nau vahee haesegaugauudedauene,  
 nau haegaugauanadauwu hethadenee  
 hedanadedauene hethāenehethaunene. Nau  
 gaunuu jee heau Joseph? hahagaunee, <sup>23</sup> Nau  
 hanaāenehethaude, Nananena hadethauwune-  
 hesena nuu heeejegausudede, Naudaunehāhe,  
 nehanenayauhade: henee nanāthadauwaunee  
 nanāседаunee Capernaum nanehasedaunee  
 nechau hede nehayau havedauauwuvaa.  
<sup>24</sup> Nau hathauhuk hethauwuu nehethathana,  
 Hegau haeyāhe hehauwuvechauthau nehayau  
 hevedauauwuvaa. <sup>25</sup> Hau hadauthedaunathava  
 hethauwuu, waunauthathee henevesānauau  
 neanedauthee Israel, hesee deanedaude Elias,  
 hejavaa denausunaugauhuu nasau jajene nau  
 nedaudauchu hesese, devasauau hasenaude  
 denanadesanauau vedauauwuu; <sup>26</sup> Hau  
 hehauwunesāhene hejevādaunene Elias, vavade  
 Sarepta, hedan Sidon, hesā nananede henevesā.  
<sup>27</sup> Nau newauthathee naugaugauwuhuhauau

---

\* **4:18** There is a midline hyphen in “haud-jaejenanathee” which doesn’t appear in same word earlier in the verse. There are no other midline hyphens in this text at all, and this hyphen is probably without significance.

neanedauthee Israel deanedaude Eliseus haeyāhe; nau hehauwunesā henayauhade vavade Naaman Syrian. <sup>28</sup> Nau vahee hathāetheauguthee vevethahenauauwuu, hāenedauwauduu nuu hayauhuhau, haechauchaunaudenenau hasenaunaude, <sup>29</sup> Nau haegauhānauau, nau haenunanatheguthanauau hedan, nau haeehauthanauau hauchauguu jauaudanee haduunee hededanenau needaunesehenee neaudnedauauwuguthauthee hauthedaunaānee. <sup>30</sup> Hau haejavechautha hehethee nahethāe, haejathāau, <sup>31</sup> Nau haenauusa Capernaum, hedan Gananee, nau haeauthedauna vadane-senenee, <sup>32</sup> Nau haegaugauanadauwunenau hasechauhauthehaude hedanadedau nau, hanau hedanadedau nau haenauthaunenau. <sup>33</sup> Nau vevethahenauauwuu henane haeanedau hevadathuwu haewauchāhene haujaun, nau haevasanade, <sup>34</sup> Jenehāaa; hathāhuk, haudduseha nananene Jesus Nazareth? gauhāejau haudnauauhāane? Haenaunathane hadāhene; Vadanauau Hejavaneauthau. <sup>35</sup> Nau Hejavaneauthausau haeneuva, dādaunauguu, hathauhuk, nau jenauchune. Nau haujau hāegausagewaude nahethāe hanaāejenauthaude nau haejaseneha. <sup>36</sup> Nau vahee haegaugauanavaa, nau haeanadethadenenau jae, nuu hayew hanadede; hathāhuk, hethauwuu nauguu haenauthenehetha haenesedauwauna wauchāhenethe haujaunau, nau hanaāejenauāhethee. <sup>37</sup> Hanaāauthedaunenede nanadee jasesee gauānee vedauauwuu, <sup>38</sup> Nau haegauhā haenauā vevethahenauauwuu, nau haejedā Simon hedauauwuu. Nau Simon

henene henaunene haenaudauwauvāhene; nau haeauthewaunauthasanauau. <sup>39</sup> Nau haetheaugudauna, nau haeneude hasauwauvahede; nau haenauthaa: nau nauhauhaunee haegauhā nau haedauyauhauvanauau. <sup>40</sup> Wauhā hesese hāenaesade vahee hathāenethenauthee hasauwauvahehehau hanasejaechauwauvāhenethe haenauuchaudaunau; nau haedajevasana nau haenayauha. <sup>41</sup> Nau haujaunauau nauguu haevanauusanauau haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneneuva haejechuwauanadeha: dauhaenauwunethe dau Chris denede. <sup>42</sup> Nau hāesenenee, hanaāejathāude hese hadaunearchaunee, nau henanedanau haenaudehaa, nau haedasaa, nau haedauduvaa, haudjenauthaude. <sup>43</sup> Nau hanaāēdauwunaude, haudnauthedaudauwau najanede Hejavaneauthau gauchuhunee hedanau nauguu: haugaunaasejejenananau. <sup>44</sup> Nau haeautheda vevethahenauauwuu Gananee.

## 5

<sup>1</sup> Nau hethauwuu, henanedanede haeneenavadaunedauwaudauwu hedanadedanene Hejavaneauthu, haetheaugu sathauwu neajee Gennesaret, <sup>2</sup> Nau haenauhaude hanesanenee thewaunau haetheaugunenau sathauwu neajee: hau naunauyāhehauau haeyauhaudesanauau, nau haeanahesadenauau henauyaundenenau. <sup>3</sup> Nau haejedā jasaa hethewaunene, Simon, nau haenehetha hadwauauwuhudede vanehaa

hehethēe vachuwauauwuu vedauauwuu.  
 Nau haejanaugu, nau haechauhautheha  
 henanedanau hehethēe thewaunaa. <sup>4</sup> Wauhā  
 hāevadauthedade, hanaāenehethaude Simon,  
 wauauwuhude hadaudavee, nau henauwunau  
 haunauyaude hadjathāne. <sup>5</sup> Nau Simon  
 hanaāauchuhananadethaude, Hechauhau-  
 thethāhe, naunaugaunenesethānauau, nau  
 nāhauwuthauujathāva: hau hegaugaunauau  
 hadnaaenauwuaudenau nauyaude haugau  
 hasenehene. <sup>6</sup> Nau hāesedauthee nuu haewautha-  
 nenau hejathaunenau, nau haethauwunauaune  
 henauyaudenenu. <sup>7</sup> Nau haeadethanauau  
 henedaehahenau danachaugunethe jasaa the-  
 waunaa, haudjaunethe, nau haudnedāhevāthee.  
 Nau haenauusanenu, nau haechauchaunaude-  
 nauau hanesanenee thewaunau hanaāenauwuu.  
<sup>8</sup> Hāenauhau dauau Simon Peda, haechauāgujanau  
 hejaedayānene Hejavaneauthusaun, nauchu,  
 hathāhuk; haugauhauhauganenau, Hau  
 Vahadāhene. <sup>9</sup> Haejenaunethajau, nau vahee  
 hethāenethaunādaunau daunauanauthee nauwu  
 hejathaunenau. <sup>10</sup> Nau nauguu James, nau Jaun,  
 heauhau Zebedee, henedaehauhau Simon. Nau  
 Hejavaneauthusau hanaāāedauwunaude Simon,  
 Jevanāthajau, hewaunehaa heee nananene  
 haudnesedanaude henanenauau. <sup>11</sup> Nau  
 hāenauuchaudethee hethewaunenau vedauauwuu,  
 hanaāenauduu vahee, nau hanaāenethauguhauthee.  
<sup>12</sup> Nau hethauwuu, hāanedaude jasaa  
 hedan, naune henane haechauchaunaude  
 naunaujaunee haugauwude; hāenauhauwaude He-  
 javaneauthusaun haeuāneseve, nau haeautheava,  
 Vahadāhene, vathehānenagu hadeneeyaudanene

hathauhuk. <sup>13</sup> Nau haeyethauha, nau haevasana, vanathehānau: heyaudāhe, hathaukuk. Nau nauhauhaunee naunaujaunee haugauwude haenauthaa. <sup>14</sup> Nau haenesedauwaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedauvade, haudneāenuu. <sup>15</sup> Hau haeneenanauthedaunene neānee: nau havathee haewautha henanedanede haeauānauuchaudene daujewaunejaathededaunee, nau haudne-nayauhāthee hedaauwauwahedaunenau. <sup>16</sup> Nau haejathāu hese nauaunee, nau haevevetha. <sup>17</sup> Nau hethauwuu jasaa hese, hajesechauhauthethāde, Nesethajauhuhauau nau hechauhaudauwauhuhauau nanavaavede haetheaugunauau hejava, haejeehedesanauau hadauchāe hauwauhauauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude. <sup>18</sup> Nau, naune, henanenauau haenauuchauhanauau henanene hee hedauwune haesevāhene nau haenayāthejedananauau, nau hadjenanauwu-nauthee hathaājenith, <sup>19</sup> Nau hāejevedethee haudnethejedanauthee hanau dauwauthaa henanedanede, hanaāenauauhusathee dasee hauauwuu, nau haejanauhaujānanauau, hehethee dasee hejavaa hauauwuu nauguu hedauwune nahethāe hathaājenith Hejavaneauthusaun. <sup>20</sup> Nau hāenauhaudauwunith hedethauwutha-jaudenenau, hanaāāedauwunaude, Henane, hauwauchudaude gaunudanauwunane. <sup>21</sup> Nau wauthaunauhāhehauau Nau Nesethajauhuhauau hanaāejasesegaugauuthajauthee, Hanaa naa

hananadede nehedaduhude Hejavaneauthu? hathāhuk. Hanaa haudgudanauau wauchudaude, vavade Hejavaneauthau, naanesāde? <sup>22</sup> Hau hāaenauwunith Hejavaneauthusaun hegaugauuthajaudenenau, Haudusethajauva hadahenauau? hathāhaugaanee, <sup>23</sup> Hayew gauchauaa, nehehāgu, Hauwauchudaude gaunudanauwunana; nau wauāthe gauhā nau javesa heheagu? <sup>24</sup> Hau hadaenauwu henee Heau henane naunaudāde dasee hathāauavadee negudanauau wauchudaude, (naasenehethauhaugu neasauwauvahedauwunith hesevahede) Hāedauwunathane, Gauhā, nau hedanau hauddau nau najesa nananene haudauauwu. <sup>25</sup> Nau nauhauhaanee haethauwauthe hathaājenethe nau haedane heaugusenadenau nau hanaāejathāaude hedauauwu haevaveenethedauna Hejavaneauthu. <sup>26</sup> Nau vahee haegaugauuthajaudene nau haevaveenethedaunanauau Hejavaneauthu, nau haeechauchaunaudenauau nāthajaude, Naunaudauhauthānauau nuu desene, hāheagu. <sup>27</sup> Nau hāevathedaude haejathāu nau haenauhauva hauāyāhe Levi hanaaseenith, haetheaugune nedauudanauau hauāyaunau, nau jethauguhu hathauhuk. <sup>28</sup> Nau haevanauthā, haegauhā, nau haethauguha. <sup>29</sup> Nau Levi haevasevethheha nehayau hedauauwu, nau haewauthanauau hauāyāhehauau nau hauthauau haenedauguvā. <sup>30</sup> Hau wauthaunauhāhehau nau Nesethajauhuhauau haeaunevā hethauguhādaunau, nau du haenethevethewewauna nau haenedaveyāwauna

hauāyāhehauau nau wauchudauhuhauau,  
 hathāhaugaanee? <sup>31</sup> Nau Hejavaneauthusaun  
 hanaāauchuhananadethāthee, hathāedāenaedethee  
 hehauwuvatthehā naudaunehāhew; hau  
 hathāasauwauvahethee. <sup>32</sup> Nāhauwujenauusa haud-  
 nadethu hethahethee hau wauchudauhuhauau  
 hadnaugaudanenee hegaugauuthajaudenenau.  
<sup>33</sup> Nau hathāhuk naudu hethauguhādaunau Jaun  
 denauaunenaugauyānethe, nau devevethahethee,  
 nau naasedauthee hethauguhādaunenau  
 Nesethajauhuhauau; hau hanethenaunauau  
 havethehethee nau havaveyāthee? <sup>34</sup> Nau  
 hathāhaugaanee, Gauhājeneenesehauva  
 dāeyaunauauau nedauenenedaunee hauauwuu  
 naugauyaude hajesanedaundaunāthee  
 waunenenehew? <sup>35</sup> Hau hese haudnauaichuu,  
 haudneedanauwunana waunenenehe, nau  
 hee hadnaāenaugauyāthee hena hese. <sup>36</sup> Nau  
 hanaāanadethaude jea jegausauhānee; Henane  
 hehauwu jenane waunauyaunee neauthayew  
 hadaugauthāyaunee, hith hesedauhuk,  
 nau hadauwayyaunee needaudenauuu,  
 nau jasaa needanee hadau wayyaunee  
 hehauwuneauchauna gauthāyaunee. <sup>37</sup> Nau  
 hegau henane hehauwujenane waunauyaunee  
 vasevenenaje gauthānenevajaunaa; nau wauāthe  
 wayyaugu vasevenenaje haddaudeauau neva-  
 jaunau, nau hadgusenauauau, nau nevajaunau  
 haddenanaunauuu. <sup>38</sup> Hau waunauyauau  
 vasevenenaje hadedaunee hadauwayyauau  
 nevajau, nau nanesauuthadee. <sup>39</sup> Nau hegau  
 henane hesevanaagu gauthānevasevenenaje  
 nauhauhaunee haevathehaa waunauyaunee;



hanau gauthāyauau hethadee, hathauhuk.

## 6

1 Nau hethauwuu naneseauwauau vadanese, haeehedesa jenayaunaa; nau hethauguhādaunau haegaugauunauwu wauchuunethauuhanau, nau haevethenauau, haegauneegudenauau hejadenenau. 2 Nau hauthauauau Nesethajauhuhau, Naudu hanesedauna waujaa nanavanau nesedaude vadanesee hathauhaugaunee? 3 Nau Hejavaneauthusau hanaāauchuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde. 4 Neesejedāde Hejavaneauthu hedauauwunene, nau needanauau nau nevethēe nauhauthethājauaujau, nau haevena heethāenethaunaunau; waujaa nanavanau veyāgu hau jasaa vevethahevahehauau? 5 Nau hanaāedauwunāthee, Heau henane nanethadāde vadanese. 6 Nau hethauwuu jea jasaa vadanese haejedā vevethahenauauwuu nau haeautheda: nau henane haeanedau hejavesē hejadenaa haeesevane, 7 Nau wauthaunauhāhehau nau Nesethajauhuhau haeaunauyauhauvaa, wauau haadenenayauthā vadanese; hadnejauau-daunauthēe dauhanājauwauaunauthēe. 8 Hau haeaenauwu hegaugauuthajaudenenau nau hanaāanadethaude henanene hesevenasanith, Gauhā nau yethaagu nahethāe. Nau haegauhā nau haeyethaagu. 9 Hejavaneauthusau hanaāedauwunaude, haudnaudedauanathana nananena hanesadee; Gaujenanavanau

vadanesee hethadāgu hasedaunee, nau wauāthe wauchudauneagu? henayauhāgu henaedede, nau wauāthe nanaunehāgu? <sup>10</sup> Nau hanaāenaunauānede vahee, hanaāēdauwunaude henanene, Segauha hajade. Nau hanaasedaude: nau hejade haeenayauhune jasaa hasaunee. <sup>11</sup> Nau haechauchaunaudenauau hase-naunaude: nau hanaāaunauchuwuhadethee daun haudnesehauthee Hejavaneauthusaun. <sup>12</sup> Hethauwuu hena hese, haeehau hauanee haudnevevethahede, nau haunaude naugaunee haevevethedauna Hejavaneauthu. <sup>13</sup> Nau hāesenee, hanaāadethaude hethauguhādaunau; nau haedana vadadauchunesenee, hanaāeneseaude vadauhanauau. <sup>14</sup> Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew, <sup>15</sup> Matthew, nau Taumis, James heau Atheas, nau Simon Zenautes haseadagu, <sup>16</sup> Nau Judas James henauhauwauau, nau Judas Iskariot,\* hanane jea neheaudaunade Hejavaneauthusaun. <sup>17</sup> Nau haejenauunethauna nau haetheaugunauau hethauauwuu, nau hadauchunanenethe hethauguhādaunau, nau haevasenauthenanedau henanedanede hehethee vahee Judea nau Dādaunedan, nau hehethee sasethauwu hadajee Tyre nau Sidon hethājenauujaathehādaunau, nau haudne-nayauhāthee hedasauwauvahedaunenau; <sup>18</sup> Nau hathāenaunauthauwauvahethee wauchāhenethe

\* **6:16** "Iskariot" is spelt with a "k" here but in 22:3 with a "c". Biblical names in this text generally but not always follow the spelling of the King James Version (KJV).

haujaunau: nau haenayauhaunauau, <sup>19</sup> Nau  
 haunauude hadaucha haevadauvasanau  
 hanau daunudesanaunee hevadaude nau  
 haevahenayauha. <sup>20</sup> Nau hanaāenāuhauwaude  
 hethauguhādaunau, Hauwunaunana nananena  
 hadavenuhunena; hanau nananena najanede  
 Hejavaneauthau, hathauhuk. <sup>21</sup> Hauwunaunana  
 nananena hathāasenana hewaunehaa: hanau  
 nananena hadnegaudana. Hauwunaunana  
 nananena hathāevewauhuna hewaunehaa, hanau  
 nananena hadnauchaunena. <sup>22</sup> Hauwunaunana  
 nananena, henaneda hasānavānā, nau  
 jaasauaunānā, nau naunaunauthevānā,  
 nau hausāgudenauthe haneseedaunenau  
 hadauwausaunee, haugau Henane Heāhene heee.  
<sup>23</sup> Haunauwuthajauau henee hese heee, nau  
 jajanauauau heee haunauwuthajaude: hanau,  
 naune, hanavanasauau hadaugautheavade-  
 nenau hejavaa: hanau naneesedauyaugaune  
 henesaunaunenau naneesehauhaugaunee  
 haeyāhehau. <sup>24</sup> Hau naunauthauau had-  
 nauauchaudaune hathāeveaunauaune; haugau  
 hanesedanauwuna hauwauthenaedede.  
<sup>25</sup> Naunauthauau hadnauauchaudauna  
 hathāegaudana; haudnasenana. Naunauthauau  
 hadnauauchaudauna hathāauchaunena  
 hewaunehaa, hadnaudauwuthajauna  
 nau hadvewauhuna. <sup>26</sup> Naunauthauau  
 hadnauauchaudauna, daunhāene vahee  
 henaneda hāethadenee hasenehethānā, hanau  
 henesaunaunenau naneesehauyaugaune jayau-  
 dauwaeyāhehau. <sup>27</sup> Hau hadāedauwunathava nana-  
 nena hathāenedauvana, Vechauthaa nananena  
 haujauthavenau, heneehaa hasānavādaunenau,

28 Hauwunaunaa hāwauwauchuvādaunenau,  
 nau hevevetasaa hāwauwauchuhādaunenau  
 nananena. <sup>29</sup> Nau henee haudauuvāde  
 hajāeaunaa nau naugautha venene; nau  
 hedanauaugu nananene hauddu jevaedanau  
 jea naudauguvechude jevaethaa. <sup>30</sup> Hevenaa  
 daun henaneda hānedauwunādaunenau nananene;  
 nau jeva jaenedauwunaa hedanauwunānagu  
 daun hanetheyaunenau. <sup>31</sup> Daun ha-  
 sevathehānaune henaneda hesehānenagu,  
 nechau jenaasehaude. <sup>32</sup> Hith nananena  
 vechauthaunagu daun havechauthādaunenau  
 nananena, haddusevaveeneva nananena?  
 haugau wauwauchudauhuhauau nechau  
 nevechauthauthee hethāevechauthādaunenau.  
<sup>33</sup> Nau hith nananena hethadāgu hasehaunā  
 daun hāneneehādaunenau, haddusevaveeneva  
 nananena? hanau naneesedaugaunee  
 wauwauchudauhuhauau. <sup>34</sup> Nau hith nananena  
 hehaunagu daun hāneejauaunaudaunādaunenau,  
 haddusevaveeneva? hanau wauwauchu-  
 dauhuhauau nechau neehauhaugaunee  
 wauwauchudauhuhau, hadnejanaasesedanuu.  
<sup>35</sup> Hau vechauthaa nananena haujauthavenau,  
 nau hethadeha hasedauna, nau hehānagu,  
 jevajavathehāe; nau nananena haudau-  
 gautheavadenenau hadvasauau, nau nananena  
 hadnaēdēyaunenena Javaājauuthee: nau  
 nenenehaude nethāejevaveenenethe nau hauhaug-  
 ganau. <sup>36</sup> Hedauwuyaunee nananena, nananena  
 Hāsaunaunenau jea hasedauwuyaunede.  
<sup>37</sup> Jevaauchuwuu, nau nananene hadnaa-  
 jauchuwuhane: nau jevaduguthāe nau nananena  
 hadnehauwuduguhuva: hejaegudanauwuyāe

nau hadnejaegudanauwunane nananene:  
<sup>38</sup> Vāe, nau hadnevenana nananene,  
 vavesethajauauthāe, dāayāe, nau dāesathāe,  
 nau haunauwauauthāe, hauchauva, henane  
 hadvenāna. Nechau hadnaasethajauaudaunāna  
 hasethajauauthānā hadnanesethajauaudaunana.  
<sup>39</sup> Nau hanaānadethaude haejejegausuhu,  
 Gaunanenauguhu jenenauājetha nanenauguhu?  
 Gauhaudjenesauujanenesenauau gauuhanaa?  
<sup>40</sup> Thauguthāhe hehauwujavaāhe hechauhau-  
 thehādaune: hau haunauude hanesāde daun  
 haunauudaunāde hathāhenith hechauhau-  
 thehādaune. <sup>41</sup> Nau naudu hanauhaudaumu  
 nananene hahavaa hejaheede hesesāe, hau  
 haājevesehau havadauhaude hathāsewau hasesāe?  
<sup>42</sup> Wauāthe hauddusenehethau nananene  
 hahavaa, Jāedaā, hadaugauhauwunathe  
 hajaheede hasesāe, hau daujenauhauwaude  
 havadauhaude hathāsewau nehayau hasesāe?  
 Nananene jayaudauwunaedehe, nedauau  
 haugauhune havadauhaude hathāsewau  
 nehayau hasesāe, nau hadenaāeneauvane  
 hadenaāeneaugauhauwu jaheede hethāsathau  
 hahavaa hesesāe. <sup>43</sup> Hanau hauhaude  
 hethahagu hehauwuseaude wausaunee  
 vevenaundenau; nau wauāthe wauchahagu  
 hauhaude hehauwuseaude hethadenee  
 vevenaundenau. <sup>44</sup> Hanau hadauchude hauhaude  
 neaenaunede hanasaunee hevenaundenau.  
 Hanau hauchahevesee henanenaui  
 hehauwunaadauhauānuu hauuyauchuwunau  
 nau dauchuwusee hehauwunaadauguunee  
 dadajevenau. <sup>45</sup> Henane hethāde hehethee  
 hethadenee heda nenauchaudede hethadenee;

hau wauchāhede henane wausaanee heda  
 nenuuchaude wausanee: hanau  
 waunauthaa hehethee hedahaa hede  
 nanadenaanee. <sup>46</sup> Nau nau, Vahadāhene,  
 Vahadāhene, haesena, hau nejesedauna  
 hayauhuhau hasenehethathana? <sup>47</sup> Daun  
 nādasāde nau nedaunānaugu hasenehenaunauau,  
 nau hesedauhuk, haudnauhauthethathana  
 haudnethāde: <sup>48</sup> Henanene henee nenesedenethe  
 hauauwu naathāde, nau henee nejayauchauhuu,  
 nau naneejenanauau hauauwuu dasee  
 hauunaugāe: nau nauunauuu naje neje  
 naunauthuu jaathāsāe henee hauauwuu, nau  
 hehauwunauauvathāau: hanau daunāudaa  
 hauunaugāe. <sup>49</sup> Hau jaathedehe, nau  
 janenaasedauthe, naathāde henanenau henee  
 nedasauauvānethe vedauauwuu; nau neje  
 jaathāsāe naunauthuu, nau nauhauhaanee  
 naunenauauau; nau thauwusāe henee hauauwuu  
 nevasauau.

## 7

<sup>1</sup> Wauhā hāevathanade vahee hanasenehede  
 daujajaathehade henanedanede, haejedā Caper-  
 naum. <sup>2</sup> Nau jasaa vanenenaja hewauwaune  
 haevechautha haeaugauwune, nau haeyānane.  
<sup>3</sup> Nau hāenedauwauthaude Hejavaneauthusaun,  
 haeautheva vachaugananenau Jews,  
 haeadetha hadjaunith nau hadnenayauhaunith  
 hewauwaune. <sup>4</sup> Nau hāedauchauthee Heja-  
 vaneauthusaun, haeauthauwaunauthasanauau  
 haugaunaanee, hanau hethāde naa henane  
 naa haudneenesedaude, hathauhaugaanee:  
<sup>5</sup> Hanau vechaudauau nadedanenau, nau

nenesedaunānauau vevethahenauauwuu. <sup>6</sup> Heee  
 Hejavaneauthusau hanaāejasesenethaunāde.  
 Nau hāeauchauau hauauwu, vanenenaja  
 haejajedauaunanenau henedaehauhau,  
 Vahadāhene, jevawauchuthajau Nananene:  
 haugau wauchāhenau hadjedāne naudauauwuu,  
 hathauhuk: <sup>7</sup> Nanaa nāejewauchanavadede  
 dauudasathane: hau vavade nehedau  
 hanadede, nau naudautheau hadeenanedanede.  
<sup>8</sup> Hanau nananenau nanethenanenenau  
 naunaudāhenau, nanethenu vanenanenauau,  
 nau naāāedauwunauau hanesāde yehau  
 nau naāejathāude; nau jasaa, Nahāje,  
 hathauau nau jaunaude; nau naudautheau,  
 Nesede, hathauau, nau nanesedaude.  
<sup>9</sup> Hejavaneauthusau hāenedauwaudauau  
 nuu hayauhuhau, haegaugauanava, nau  
 haenauthegauthaagu, nau hanaāāedauwunaude  
 henanedanau hethāethauguhādaunau,  
 Hadāedauwunathava, Haunauau nāhauwuveehau  
 vasee hethauwuthajuhu (naa hathāde henane),  
 hegau, hehauwuu haduu Israel. <sup>10</sup> Nau  
 henee hathāautheavathee, hāejaenuusathee  
 hauauwuu, haeveehanauau wauwaune  
 haenanedanene henee neasauwauvāhenith.  
<sup>11</sup> Nau hethauwuu jasaa hese, hanaāehaude  
 hedan Nain haseenauyāgu; nau haewauthanenau  
 hethauguhādaunau henethaunādaunau, nau  
 hauwauhuu henanedanede. <sup>12</sup> Wauhā  
 hāayānauusade hejavaaa dajanaunaa hedan,  
 naune, naa najaa henane naunudanade,  
 jasāsau henaune, nau haeneevesānene: nau  
 haewauthane henanedanede hehethee hedan  
 haenethaunaa. <sup>13</sup> Nau hāenauhauwaude Vahadāde

haeauwunauna, Najenaudāve, hathauhuk. <sup>14</sup> Nau haedasa nau haevasane nauaunechauthau: nau hethāenaunaunechauhādaunau haedādauyaunenauna. Haunaua, hāedauwunathane, Thauwauthē, hathauhuk. <sup>15</sup> Nau henee nenajaa haethauwaudaugu, nau haenaāejasesanadede, nau hanaāevenaude henaunene. <sup>16</sup> Nau nāthajaude haedasā vahee: nau haevaveenethedau-nanauau Hejavaneauthu, Havathee haeyāhe hanejauaude hadedanene; nau, Hejavaneauthau haenauujādauna henesaunau, hahagaunee. <sup>17</sup> Nau nuu dauauthedaunenede haenanadesanaune vahee Judea, nau nanadee gauānee vedauauwuu. <sup>18</sup> Nau hethauguhādaunau Jaun haeauthedaunaa vahee nuu hayauhuhau. <sup>19</sup> Nau Jaun haedetha hanesenethe hethauguhādaunau haeyethauthēava Hejavaneauthusaun, Gauhanane henee waudaudjaude? nau wauāthe gauhadnaudenauhauwau jasaa? <sup>20</sup> Hāedauchauthēe henanenauau, Jaun Dusaayāhe janādauthēavānauau Nananene, hathauhaugaunee, hanaāenaudedauauthēe, Gauhanane henee waudaudjaude? nau wauāthe gauhadnaudenauhauwau jasaa. <sup>21</sup> Nau vavade hāauchauau haenayauha haewauthanenau vavavāuhuhau nau havathee haugauwude, nau wauchāhenith haujaun; nau haewauthanenau nanenauguhuhau haevena nauhauthau. <sup>22</sup> Hejavaneathusaun hanaāāedauwunāthee, Najajathāauau, nau hadāedauwunauva Jaun hathāhaugaunee, hayewhu hanathauhauthāna nau hathadauvana; hasejaenauhauthāde nanenauguhu, jeneejavesāhe daujavesade,



naunaujaunee hedaugauwudaunenau  
 dauyauadahethee, hayājadāhe daunedauvade,  
 gaujauaudahehe daujaethauwauthede,  
 hadavenuhu hethadenee waunauyaunee  
 dauauthedaunade. <sup>23</sup> Nau hauwunaunade  
 daun najewauchuthajaudaunāde. <sup>24</sup> Nau  
 hāejathāaunethe Jaun hedautheaunau,  
 hanaāejasesanadedauau henanedanede  
 hasenaedenethe Jauneau, Hayew nananena  
 haewaunenauhauthaunenau nauaunee?  
 gaugauguyāse daunauauvasee? <sup>25</sup> Hau  
 hayew nananena hāewaunenauhauthaunenau?  
 Gauhenane hedāchaunau hejajehaunenau  
 hedāchaunau? Naune, nethāeneenuhuthee, nau  
 neneenaedethee thanāsee nenauchuwunethe  
 hedauauwunenenau. <sup>26</sup> Hau hayew  
 hāewaunenauhauthaunenau? Gauhaeyāhe? Haa,  
 hadāedauwunathava nananena, nau javaāsee  
 haeyāhehau. <sup>27</sup> Naa nananene, wauthaunesee,  
 Naune, hadjejenanauau Naudautheau  
 hathaaguna, hadnesedaunāna hauvaunenau  
 sayānee Nananena. <sup>28</sup> Hanau nāedauwunathana,  
 hadedanenu nethāenesaunevāna hesānauau  
 hehauwujavaāse haeyāhe hathāde Jaun  
 Dusaayāhe: hau hena haugajehede  
 hanedauhuk henajandedaunene Hejavaneauthu  
 javaāhehuk. <sup>29</sup> Nau vahee henanedanede  
 hathāenedaunāde, nau hauāyāhehauau,  
 hanaāechuwauthethajaudaunauthee Hejavaneauthu,  
 haenethedusaanā dusaayāhew Jauneau. <sup>30</sup> Hau  
 Nesethajauhuhauau nau nanavaavehehau yesee  
 nehayau haeausagudenauau hevathēhādaunene  
 Hejavaneauthu, haejenethedusaanā

(Jauneau). <sup>31</sup> Nau Vahadāde hahagu, Hayew naudneedajenehethau henanedanede nuu henaedede? nau haethahenauthe? <sup>32</sup> Waude dāeyaunauauau hathahethee theaugunauthe haudaunanauauwuu, nau danadethadethee, nau nanāhethēe, Nevadauhana, hau nananena nejevadana; naudauwuthajaudauwunana nananena, hau nejevewauhuna. <sup>33</sup> Hanau denausade Jaun Dusaayāhe devevethēe jauaujaunau nau deejevanaa vasevenenaje; nau nananena nanethenaude haujaun, nethauna. <sup>34</sup> Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauyāhehau nau wauwauchudauhuhau, nethauna. <sup>35</sup> Hau haeyaude chaunuwuthajaudaunaude vahee hedāeyaunewau. <sup>36</sup> Nau hanesāde Nesethajuhu haeadetha haudjewaunenethevethehevāde, nau haeyehau haejedā Nesethajuhu hedauauwunene, nau haejanaugu hadvethede. <sup>37</sup> Nau, naune, hesā hedan, haeauhaugane, hāaenaunaude Hejavaneauthusaun daujanaugunith hadvethēhenith Nesethajuhu hedauauwunene, haejāchaude jāvasaa chauayau, <sup>38</sup> Nau haetheaugu hegauwune heauthene haeviewau, nau hanaāejasesahesadede heauthene heee hedejee nau haeheahenauwu heee henethaanene, nau haenedane heauthene, nau haechauane heee chauayau. <sup>39</sup> Wauhā Nesethajuhu hāadethaude hāenauhauwaude, haejaevenanadethade, Naa Henane, haeyāheyaugu, hanaenaunaude daunhadāhenith

nau daunhathāhenith nuu hesāne hevasanādaune:  
hanau wauwauchuduhu, hahagu. <sup>40</sup> Nau  
Hejavaneauthusau hanaāēdauwunaude,  
Simon, haudnāedauwunathane nananene.  
Nau hanaāenehethaude, Hechauhauthethāhe,  
nanehe. <sup>41</sup> Hena jasaa sayānedanauwuyau  
haenesenenau hesayānedanauwunādaunau:  
hanesāhenith yauthaunevadadausauau vāejethā,  
nau jasaa yauthauyauau. <sup>42</sup> Nau hāeyauhuunee  
haunaudauhudaunene, haenanethauaunegu-  
danauwuna nesauuu Jeāedauwune, hanaane  
hevechauthādaune javaānee? <sup>43</sup> Simon  
hanaāējaāedauwunaude, Nauchāe nana-  
nenith heneehējaāgudanauwunaune. Nau  
hanaāēdauwunaude, Nananene neaenauwu.  
<sup>44</sup> Nau hanaāeyethaagude hesāne, nau  
hanaāēdauwunaude Simoneau, Gauhau-  
nauhauwau nananene naa hesā? Nananenau ne-  
jedānau haudauauwu, nananene hāehauwuvene  
naje heee nauaudau: hau neheahesadede  
nauaudau heee hedejee, nau neheahenauau  
henethaa. <sup>45</sup> Nananene hāehauwunedane hau  
naa hesā hāenauusanaunauau hehauwuthauu-  
jenenedane nauaudau. <sup>46</sup> Naudauguhua nauguu  
javeda nananene hajechauusānene hau naa hesā  
nechauanauau nauaudau heee chauayau. <sup>47</sup> Naa  
hāedauwunathane nananene hewauchudaudenau  
waunauthanee gaunudanauwunade; hanau  
dauvechauthāde javaānee hau daun vanehaa  
gaunudanauwunade vavade hasevechauthāde  
vanehaa. <sup>48</sup> Nau hanaāēdauwunaude hesāne,  
nananene hauwauchudaudenau jaegu-  
danauwunane. <sup>49</sup> Nau hethāenedauguvādaunau  
dauvethethee hanaāējasesanadethee

hegaugauuthajaudenenauau hanaa naa  
 negudanauau wauchudaudenau jea? <sup>50</sup> Nau  
 hanaāēdauwunaude hesāne, Nananene  
 hadethauwaudaude henayauhāne nananene;  
 najesa hadnauwauthenesane.

## 8

<sup>1</sup> Nau hethauwuu waunee haejathāau nanadee  
 hadauchanenee hedan nau hajaseehedan,  
 dauaunauthedade nau daunaunauhauthethāde  
 neethajaude waunauyaunee hasaunee  
 henajanedauunene Hejavaneauthu: nau  
 vadadauchunesenee haenethaunaa, <sup>2</sup> Nau jasaa  
 hesānauau, haenayauhau dewauchāhenethe hau-  
 jaunau nau vavavāauhuhauau, Mare haseadagu  
 Magdalene, naunudanavathe nesaudauchu  
 wauchāhenethe haujaunau, <sup>3</sup> Nau Joanna henene  
 Chuza Herod hadāhevāhe, nau Susanna, nau  
 haewauthanauau hauthauauau, hevenādaunau  
 hethāenetheyaunenenu. <sup>4</sup> Nau hāeneenawauthaa  
 henanedanede dauauāchaudenee, nau haedasaa  
 hehethēe nanadee hedane, hanaāēanadede  
 jegausauhānee: <sup>5</sup> Jenayāhe haewauneneāgude  
 hejenayaunau: hauthauau haejajanesanau  
 vaunaa; nau haeauguhudaunene, nau  
 neahehauau hejavaa haeaudauvanauau. <sup>6</sup> Nau  
 hauthauau haedasegaugauusanau hauunagāe;  
 nau chauchaunu hāeveseuu, haenadadanau,  
 hanau daujenajenee. <sup>7</sup> Nau hauthauau  
 haejajanesanau hegauau dauchuuwusee;  
 nau dauchuuwuse haenauguveseaunau,  
 nau haeajedaunanā. <sup>8</sup> Nau hauthauau  
 haegaugauusanau dasee hadauuthadee

vedauauwuu, nau haeveseaunau, nau haeneeaunau vadadausauau jenayaude. Nau hāenehedauau nuu hayauhuhau, haevasenehe, Daun henaudaununede, nanehanedauvade. <sup>9</sup> Nau hethauguhādaunau haenaudedanaa, duthanau nuu jegausudede, hathāhuk? <sup>10</sup> Nau hahagu, Nananena vanenana haudnaenauwuna jaeyaunau henajanede Hejavaneauthau: hau hauthauauau janegausauhuthee; hadnenauhauthāthee havajenauhaudauwu, nedauvahehauau havajaenauwu. <sup>11</sup> Wauhā, heyew hasauau jegausudede: Jenayaunau hedenehede Hejavaneauthau. <sup>12</sup> Henee vaunaa nanathee nenedauvathee; hanaāenauusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena. <sup>13</sup> Henee hauunaugāe nanathee, nanedauvanauthe nesedanuu hanadedaunau nauguu haunauwuthajaude; nau nuu hehauwuthājenenauau, vanehaa nethauwauduu, nau nauauchaudaunauthe vasehadede naneenaunegauhuthee. <sup>14</sup> Nau henee nejajanesāe thauhauthauchauyauau dauchuuwusee nanathee, hanesenedauvanauthe, naneejathāauthee, nau neenadejethathee hee haunaunethaude nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauuyauthaunee. <sup>15</sup> Hau henee hadauuthadene vedauauwuu nanathee, hethauvahethee nau hethadenee hedahenau nenedauwauduu hanadedaunau, naunaunedethee, nau nenauchaudethee vevenaundenau hee jenauwauaunee. <sup>16</sup> Hegau henane, hāesedeauchauuu

nauauuthayau, hehauwaugau hee vassenau, nau wauāthe hehauwujenane thānee hauvaa; hau nethānauau nauauuthayau neetheaugunee daun janedāde hadenauhaudauau nauauuthayāgu.

<sup>17</sup> Hayewhu hehauwuyauthesa, haudjauthase-nesehee; wauāthe hayewhu hehauwuyau hadjaenaunee nau hadnejaunauau hauthasauau.

<sup>18</sup> Haunauyauhaudauwuu hanathadauvanā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau.

<sup>19</sup> Hanaāedasāde henaune nau henethesaunau, nau haejenedasaa hee dauneethenadede daunee.

<sup>20</sup> Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune.

<sup>21</sup> Nau hanaāauchuhananadede nau hanaāāedauwunaude, Nānau nau nāthesaunauau nuu nanathee nandedauwauduu hedanadede daunene Hejavaneauthu, nau naasedauthee.

<sup>22</sup> Wauhā hethauwuu jasaa hese, haejedā thewaunaa nauguu hethauguhādaunau: nau hanaāāedauwunaude, hadeyehaunau hauchaunau neajee: nau hanaāejathethuauthee.

<sup>23</sup> Hau hajechuauthee haenaugau: nau hanaāenuasaa neajee haenaudasa; nau haeechauchaunane naje, nau haenedaudauwugaujauaudahede.

<sup>24</sup> Nau hanaāedauchauthee, nau haeauwaudananauau, Hechauhauthethāhe, Hechauhauthethāe,\* gaujauaudāhenauau, hathauhaugaunee Hanaāethauwauthede, nau hanaāeneudauau

\* **8:24** Possible missing “h” in “Hechauhauthethā(h)e” (“Master”).

hasāse nau dasenaunanaunee naje: nau hanaāedauunauuu, nau hanaāedādauyauau. <sup>25</sup> Nau hanaāenehethaude, daude hadethauwaudadenenau? Nau haenāthajaunauau haejenaunethajaunauau, Dauhuthenane naa, hanathadagaunee; haachuwudede hasāse nau naje, nau hanaāethauwadaunāde. <sup>26</sup> Nau hanaāenuusathee vedauauwuu Gadarenes, hauchaunau Gananee. <sup>27</sup> Nau hāeyehaude vedauauwuu, hena haenuchaunaa jathee hedan jachau henanene, haenethena haujaun dajechauau, nau haevedauauchauna, haejenaede hauauwuu, hau nedauthānavathe gaujauaudahehehau. <sup>28</sup> Hāenauhauwaude Hejavaneauthusaun haevasanade, nau haechaagujanaugudauna, nau hanaāevasanadethaude, Hauddusehathe, Hejavaneauthsau, Nananene Heau Hejavaneauthau javaājauuthee? Nenedauwunathane Nananene jevanaunauchauthehe. <sup>29</sup> (Hanau haenesedauwauna wauchāhenith haujaun hadjenauahenith hehethee henanene. Hanau nauaunee dauhusedanāde: nau naunaunehade neduguhude hee vāejethāduguthaunau nau nesaunajethaunau; nau haegaugauchauagude heeduguhudaunau, nau haejathethasauaunaa haujaun hese nauaunee.) <sup>30</sup> Nau Hejavaneauthusaun haenaudedauunaa, Haudusee? hathāhuk, Nau hanaāāedauwunaude, Waunauthade: hanau dewauthanethe haujaunau hethāchaudaunādaunau. <sup>31</sup> Nau haenedauwunanauau hadjenesedauwaunathee hadjeyehauthee hethauvaa. <sup>32</sup> Nau hena haewauthanauau neauthuwauchu nevethe-

hethee hauanee: nau haenedauwunanaauau  
 hadjenanāthee wauhaunee. Nau haejenana.  
<sup>33</sup> Hanaāenuahethee haujaunauau hehethee  
 henanene, nau haewauhaunesanaauau  
 neauthuwauchuu: nau vahee neauthuwauchu  
 haejathegauhunauau neenanee janahuu yesee  
 neajee, nau haevanadeavenauau. <sup>34</sup> Hāene  
 henee nauchauwauthee daunauhauduu  
 hasedaudenenee, haedaugauhunauau, nau  
 haejathāaunauau nau haeauthedanauau  
 hedan nau vedauauwuu. <sup>35</sup> Hanaāeyehaudenee  
 hadnauhauwuu daun hasedaudenee; nau  
 haedauchau Hejavaneauthusau, nau  
 haeveehau henane, heneenenauthāde  
 haujaunau, haetheaugu heauthene He-  
 javaneauthusaun, haedāchaunene, nau  
 haechuwuthajaune: nau haenāthajaudene.  
<sup>36</sup> Henee nenauhauwauthee haeauthedanauau  
 neesenayauhade nenethenaude haujaunau.  
<sup>37</sup> Hadauchaa hathāauauvaa Gadarenes gauānee  
 haejathethajenāhenauau; hanau dauusāhede: nau  
 hanaāeyehaude nauauhuu jethee thewaunaa, nau  
 hanaāejaesade. <sup>38</sup> Wauhā henane nenauthāde  
 haujaunau haenehethaa hadnenethaunāde:  
 hau Hejavaneauthusau haejathethajenāhe,  
 hathauhuk, <sup>39</sup> Jaeyehau haudauauwuu, nau  
 hadnauhauthethā hathāenavasauau hayewhu  
 Hejavaneauthau hasehāne nananene. Nau  
 hanaāejathāaude, nau haeautheda nanadee  
 hathāaunee hedan hathāenavasaunee hayewhu  
 Hejavaneauthusaun hasehāde. <sup>40</sup> Nau  
 hethauwuu hāejaenauusade Hejavaneauthusau,  
 henanedanede haeneethajaudaunaa: hanau



haevadauyauhauwau. <sup>41</sup> Nau, naune, haejenauusa henane Jairus haseagu, nau hadāhevāhe vevethahenauauwuu: nau haeuāneseve Hejavaneauthusaun heauthene, nau haeadetha hadjewaunejedānith hedauauwuu: <sup>42</sup> Hanau haenesāhene hedaunau wauau hanesenee jajenevāhe, nau haeayānajane. Hau hajesesade henanedanede haevauhaunaa. <sup>43</sup> Nau hesā haevathaude nesenee jajene heee, haevathede haunauude hevāejethāwau heee naudaunehāhehau, hau haejenayauhau, <sup>44</sup> Haeedasa hegauwune, nau haevasane naunauchuu heduwune: nau chauchaunu haejenevathaude. <sup>45</sup> Nau Hejavaneauthusau hanaa navasanāde hahagu? Hāevahethedauwaudenee, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhau-gaunee. <sup>46</sup> Nau Hejavaneauthusau, hanaadee vasanānau, hahagu: haenauwau daujasese-nauauau vadaude hehethēe nananenau, hahagu. <sup>47</sup> Nau hāenauhaudauau naa hesā daujeyauthesee haejeyehau haeahenauau, nau hanaāechauāgujanaugudaunaude, haeauthedauna hauthasee vahee henanedanede hathavasanaude, nau hasenayauhāde chauchaunu. <sup>48</sup> Nau hanaāēdauwunaude, Nauddau, nanehāauwauthenaedene: nananene hadethauwuthajaude henayauhāne nananene; najesa haunauwuthajau. <sup>49</sup> Hajesanadede, hena haejau hanesāde hehethēe hadāhevahew vevethahenauauwuu, haeāedauwuna, Haudauna najaa; jevajenaunevene Hechauhauthethāhe. <sup>50</sup> Hau hāenedaunāde Hejavaneauthusaun,

haenaāēdauwunāde, jevanāthajau: het-hauwuthajau vavade, nau haudnenayauhade, hathāhuk. <sup>51</sup> Nau hāejedāde hauauwuu, henanedane haejevadaujedāne, vavade Peda, nau James, nau Jaun, nau henesaunaune nau henaune hesāhedāeyaune. <sup>52</sup> Nau vahee haevewauhudaune, nau haeaudauwuthajauhā: hau hanaāenehede, Jevavewauhuu; hehauwunaja, nauthe naugauhude. <sup>53</sup> Nau haeauchauthanauau haevachunaunanauau, dauaenaunauthee daunajanethe. <sup>54</sup> Nau haevanudana, nau hanaāedanaude hejadenene, nau hanaāanadethaude, Hesāhee, thauwauthe, hathauhuk. <sup>55</sup> Nau hevadathuwu haejaedasaa, nau haethauwauthe chauchaunu nau hanaāenehede hadnauchauvavathe. <sup>56</sup> Nau henehā haegaudauwuthajaunenau: hau haeāedauwuna hadjāedauvanethe henanedaa hasedaude.

## 9

<sup>1</sup> Hanaāadethaude vadadauchu nesenee hethauguhādaunau hauānee, nau haejaanauwuna naudahede nau hadvaheneedauthee nanadee vahee haujaunaa, nau hadnenayaudethee haugauwude. <sup>2</sup> Nau haejenana hadnauthedaudauwunethe henajanedaunene Hejavaneauthu, nau hadnenayauhaunethe hasauwauvahehehau. <sup>3</sup> Nau hanaāēdauwunaude, Jevaedanauwuu hayewhu heee hajavechaudenenu, daudause haugaudauhunau, daudause newaugusajaānauthau, daudause jauaujau, daudause vāejethā; daudause jevanesauguvechudaunaa. <sup>4</sup> Nau daun hauauwuu hadaujedānā

jenaadauna, nau jenaathejathāauna. <sup>5</sup> Nau daun hajethauhauvādaunenau, hānauahenā hena hedane, hadegauyāējaheva naudauuyāgu hadneaenaunathee. <sup>6</sup> Nau hanaāejathāauthee, nau haeehedesanauau hauauwudan, haeauthedaudauwu hethadenee waunauyaunee, nau haevahenayauthānauau nanadee. <sup>7</sup> Wauhā Herod naja haenedauva vahee hanasedaudenenee heee: nau haejaene, hanau haenaasenedaunee gauuu, henee Jaun jaegauhāde hehethee denajaa; <sup>8</sup> Nau gauuu, henee Elias naunauhauthethāde hedanayau: nau hauthauauau, hanesāde dajechauau haeyāhehauau jaegauhāde. <sup>9</sup> Nau Herod haenehe, Jaun nedavaāsauau: hau hanaa naa, nanedauwauthau? Nau haevadaunauhauva. <sup>10</sup> Nau vadauhanauau, hāējaenuusathee, haevahauthedaunaa hanasedaunethe. Nau hanaāedanaude, nau hanaāejathāauthee hevenanee hesee hadaunechaudanee hathauau hedan Bethsaida haseāgu. <sup>11</sup> Nau henanedanede hāaenuu, hanaāethauguhauthee: nau haeesedana, nau haeauthedauna hasaunee henajanedanene Hejavaneauthu, nau haenayauha hathāevadaunayauhathee. <sup>12</sup> Nau hāayānaesade, hanaāejenuusathee nesenee, nau hanaāenehethāde, Nanehāejathāaudenee henanedanede, hadeehaudenee hauauwudan nau vedauauwuu nauanee, nau hadenethee, nau hadejasedauthee vethewau: daunechaudaa hadaunauau. <sup>13</sup> Hau, Venaa nananena hadevethedeaunee, hathauhuk. Nau hanaāēdauwunauthee, Hau nanethenauwunauau hehauwujavaānee hayauthaunāe jauaujaunau

nau hanesethee nauwu; hanāyehaunee  
 nau haunaudaunauhuu vethewau heee  
 vahee nuu henanedanede. <sup>14</sup> Hanau  
 wauau haeyauthaune vasevadadausauau  
 henanenauau hanaadauchuthee. Nau  
 hanaāēdauwunaude hethauguhādaunau,  
 Janauguhaa yauyauthauyauaugunauha. <sup>15</sup> Nau  
 hanaasedauthee, nau haevajanauguhanauau.  
<sup>16</sup> Hanaāedanauau hayauthaunanenee  
 jauaujaunau nau hanesenethe nauwu, nau  
 hanaāējenāauguaude hejavaa, haeevethasa,  
 nau haenaāējeanaauau, nau hanaāevenaude  
 thauguthāhehau hadjjenanauwunethe  
 hathaājedaunenee henanedanede. <sup>17</sup> Nau  
 haevethehedaune, nau haevahegaudaudene;  
 nau haeauānenau jeyauwaunau hathāenathaudāe  
 nesenee hanaadauchāe hanechauchaunāe  
 nenethaudanee. <sup>18</sup> Nau hethauwuu, haene-  
 senane, dauvevethahede, Hethauguhādaunau  
 haenethaunaa: nau hanaāenaudedauwunaude,  
 Hanaa nenehede henaneda daunanenau?  
 hathauhuk; <sup>19</sup> Hanaāauchuhananadethauthee,  
 Dusaayā Jaun; hauhauthauauau nethee  
 Elias; nau jasae nethee hanesāde dajechauau  
 haeyāhehauau jaegauhāde. <sup>20</sup> Hanaāenehethaude,  
 hau hanaa nenehede nananena daunanenau?  
 Pedā hanaāauchuhanāedauwunaude, Chris  
 Hejavaneauthau. <sup>21</sup> Nau haeneenadauduvā,  
 nau haenesedauwaunā hadjāedauwunaunethe  
 henanedanau henee; <sup>22</sup> Heau henane  
 hadnasenede wauthanee heee hayewhu,  
 nau hadnausāguthāde vachaugānanenau  
 nau naja vevethahevahehauau nau  
 wauthaunauhāhehauau, nau hadnaade, nau

hadjaegauhāsanade nasese, hanathauhuk.  
<sup>23</sup> Nau hanaāevahāedauwunaude, Hith henaneda  
 jethauguhānaugu nanehanaunauchauthehadede,  
 nau jeedane henaugauchu hayauwusenenee,  
 nau najeethauguhaa. <sup>24</sup> Daun haunau-  
 gaunayaude hedenaedede hadnanadede:  
 hau daun hanadede hedenaedede hee  
 nadanayau, nananede hadnenayauhadede.  
<sup>25</sup> Hauddusedau henane, vahesedanauaugu  
 hathāauavadenee, nau hanahadagu, nauwauāthe  
 hausāguthadagu? <sup>26</sup> Daun naudauthedaunāde  
 nau nadanadedau, nananenith Heau  
 Henane haudnaudauthedaunaunith,  
 hāenauusathe nehayau hadauvasāthanith, nau  
 Henesaunaune hadauvasāthanith, nau vadanee  
 hautheaunauau hadauvasāthanethe. <sup>27</sup> Hau  
 hadethauwauthedaunathava hauthauauau  
 theauguthee hede, haudnehauwuvajadauwu  
 gaujauaudahede, haunaude haudnauhauduu  
 henajanaunene Hejavaneauthu. <sup>28</sup> Nau  
 hethauwuu wauau hanasaudauchuse  
 hāesenehede, Hanaāedanaude Peda nau Jauneau  
 nau Jameseau, nau hanaāenauauhusathee hauanee  
 hadnevevethahethee. <sup>29</sup> Nau hajesevevethahede  
 haenauasāaune hedauchaveau haeanathadene,  
 nau hedāchaunau haenaujaunenau nau  
 haenaunauaugausauaunenau. <sup>30</sup> Nau naune  
 haeanadethaa hanesenethe henanenau,  
 haenanenenau Mosaseau nau Eliaseau;  
<sup>31</sup> Daunauhauthethāde hedanayau haenausāaune,  
 nau haeauthedaude haudgaujauaudāde had-  
 vathechaunaude hehethee Dādaunedan.  
<sup>32</sup> Hau Peda nau hethāenethaunādaunau  
 haenauwaunanenau: nau hāuwaudauaunethe,

haenauhauwunenau henauasāude, nau hanesenethe henanenau haenethauguvaa. <sup>33</sup> Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadenesedauna hanasāe nenaunau; hanesadee Nananene, nau hanesadenee Mosese, nau hanesadenee Elias; haejaene daunhasenehede. <sup>34</sup> Hajesanadede, haejenauusanau henaunauade, nau hae-duguaunā: nau haenāthajaunaunauau daujedāthee henaunauadee. <sup>35</sup> Nau haejeanadede hehethee henaunauadee, Naa nananede Navechauthau Nāa: nedaunaa, hāheagu. <sup>36</sup> Nau hāesanadede, Hejavaneauthusau haenesenane. Nau haeyaudenauau, nau haejāedauwunanauau henanedane hena hese neanāthauhauuu. <sup>37</sup> Nau hethauwuu, dauauthesenenee, hāejejanauhusathee hehethee jauaudanee, haegauāhenenau henanedanau hejajedauaunādaunenau. <sup>38</sup> Nau, naune, henane hehethee henanedaa haevasanade, Hechauhauthethāhe, nenedauwunathane Nananene, daugauhauwune nāa: vavade-naanesāde nadāeyauneve, hathauhuk. <sup>39</sup> Nau, naune, haujaun hedanāde, nau chauchaunu haedauyānade; nau haethauwuguthaa haevevechauchaunade jeda, nau haeasenehaa haejechuwauthenauthaa. <sup>40</sup> Nau nananenau neauthewu hāthauguhādaunauau hadnausāguthauthee; nau nejenedauthee. <sup>41</sup> Nau Hejavaneauthusau hanaāauchuhananadethaude, Hau hāhauwuthauwuthajau nau daujechuwauthenaedene, haudedauhujesenedauguvathee,

nau haddauhujesenethauguvathe? Jāsene nananene hāa hede. <sup>42</sup> Nau hajesejaude, haujaun haeauneguthaa, nau haethauwuguthaa. Nau Hejavaneauthusau haeneneuva wauchāhenith haujaun, nau haenayauha dāeyaunauau, nau haejaevena henesaunaunene. <sup>43</sup> Nau haevagaugauanadauwu hasevasenaudāhenith Hejavaneauthu, Hau hajeseгаugauanaduu haunauude vahee hayauhuhau Hejavaneauthusaun hanasedaunith, Haeāedauwuna hethauguhādaunau, <sup>44</sup> Chuwauthee nuu hanadedaunau jedānauha haunaudaununenau; hanau heau henane hadvenavathe hejadenene henanenau. <sup>45</sup> Hau haejaenauwu nuu hasenehenith, nau haeyaudaunaunauau, haejaenauwu: nau haeedaunaudedauunanauau hasenehenith. <sup>46</sup> Hanaāegaugauudedaunee, hanaadee haudvasāthaa. <sup>47</sup> Nau Hejavaneauthusaun, haeaenauwu hanasethajauthee hedahenauau, haedana dāeyaunauau, nau haeauyejanauguna, <sup>48</sup> Nau hanaāēdauwunaude daun hanesedanaude nuu dāeyaunauau naneseedaunaa hadnesedanānau: nau daun nāsedanāde haudnesedanaude nājejenanādaune; daun javaānadavenuhunede haunauude nananena vahee nananede hadnaasevasāthaa. <sup>49</sup> Nau Jaun hanaāauchuhanāedauwunaude, Hechauhauthethāhe, neenauhauwaunauau hanesāde nenuguthaude haujaunau hee haneseede; nau needauduwaunauau, hanau dauhujenethaunānauau. <sup>50</sup> Nau Hejavaneauthusaun hanaāēdauwunāde, Jevadauduvaa hāhauwasānavāne nanesevānauau.

51 Nau hethauwuu, hāenauauchaunee had-  
 neejejanauhudanāde, haechuwuyethaāne  
 hadnehaude Dādaunedan, 52 Nau haeautheava  
 sayānee: nau hanaāejathāaunethe, nau  
 hāejedāthee hajasee hauauwudan Samaritans,  
 hadnesaanudaunāde. 53 Nau haejesedanaa,  
 hanau dauyethaāsade Dādaunedan. 54 Nau  
 hāene hethauguhādaunau James nau Jaun  
 daunauhauwunethe nuu, hanaāenehenethe,  
 Vahadāhene, gaujevadaunedauwaune heseda  
 hadjejanauhusanauau hehethee hejavaa, nau  
 hadnevadauchauuthee, neesedaude Elias?  
 55 Hau hanaāeyethaādausade, nau haeneneuva,  
 Nananena hāhauwaenava daun vadathau  
 nananena hadahena, hathauhuk. 56 Hanau  
 Heau henane hehauwuujau hadnenauaudede  
 henanedanau hedenaededaunenenu, hau  
 hadnenayauhaude. Nau hanaāeyehauthee  
 jasaa hajasee hauauwudan. 57 Nau  
 hethauwuu, hajesethaugudethee vau, jachau  
 henanene hathāhuk, Vahadāhene, nananenau  
 hadnethauguhathane nananene daun nananene  
 hanasesanaune. 58 Nau Hejavaneauthusau  
 hathauhuk, Gauauwuauau neyāethee, nau  
 neaheauau hejavaa nenauhuchaunethee; hau  
 Heau henane heyauhuunee nedauusevānede.  
 59 Nau hanaāenehethaude jachau, Jethauguhu,  
 hau hathāhuk, Vahadāhene, nedauau nawaune-  
 jenanau nāsaunau. 60 Hejavaneauthusaun  
 hanaāēdauwunāde, Nanehajenanauthee  
 gaujauaudahehehauau negaujauaudāhenethee:  
 hau jathāau nananene nau haddauthedaude  
 henajanede Hejavaneauthau. 61 Nau jachau



jee, hathāhuk, Vahadāhene, hadnethau-  
guhathane nananene; hau jechuwauthehe  
nedauau nawaunenaunenechauthaunauau,  
hanedauthee nayāenau naudauauwuu. <sup>62</sup> Nau  
Hejavaneauthusaun hanaāāedauwunāde, Hegau  
henane, dunauaugu thauauauwujethau, nau  
jaaāyangu, hehauwunaathā henajanedauene  
Hejavaneauthu.

## 10

<sup>1</sup> Nuu heee Vahadāde haeautheava hauthauau  
nesaudausauau jee, nau haeyeyethautheava  
hanenesenethe sayānee haunauude hedan  
nau vedauauwuu, haudnanādaunauusade.  
<sup>2</sup> Henaheee hanaāenehethaude, Jenayaunau het-  
hauwuwauthāe haneseuu, hau nesethāhehauau  
hajewauthathee: vevethahee nananena heee  
Vahadāde deseujenayaunau, hadejejenanaude  
nesethāhehau hejenayaunaa. <sup>3</sup> Jathāauau  
nananena hathaāsana; naune nananenau  
janenanathana neānee waude haudāsaunauau  
hejee hauchāhee. <sup>4</sup> Jevanewuunauwuu  
nesevāejethāwaunau, newaugusajaānauthau,  
nau wauaunau: nau jevanaunenāthedaunaa  
henane hauvaunenau. <sup>5</sup> Nau daun hauauwuu  
nananena hadaujedānā, Dādauyauha nuu  
hauauwuu, nedauau hadeva. <sup>6</sup> Nau hith  
heau dādaunee hanedauyaugaune, nananena  
hadādaunahedaunenau hadnaadaudauyānusaa:  
hau jene hadjaegauusedaunāna. <sup>7</sup> Nau vavade  
hauauwuu hadanedauva, hadevetheva nau hade-  
vanava daun hayauhuhau hauchauvadenenau:  
hanau nesethāhe naunaudaunade. Jevaenejedāe  
hauauwuu. <sup>8</sup> Nau daun hedan nananena

hadaujedānā, nau hesedanānagu, hadevetheva  
daun hayauhuhau hajenanauwunādaunenau:  
<sup>9</sup> Nau hadenayauhauva hasauwauvahehe daun  
hanedaude, nau hesau jeenanethāedauwunauna,  
Henajanede Hejavaneauthau hayāedasāna.  
<sup>10</sup> Nau daun hedan nananena hadaujedānā,  
nau jesedanānagu hadjajathāauva hasesana  
hehethee hadaugauchaudāe hauauwudan,  
nau hesau jeeanesenehethauna, <sup>11</sup> Dause  
nauthejahathaugu nananena hadedanaunenau,  
heejahadāheagu, neyeseagaunuhudee nananena:  
hau nananena hadethauwaenava nuu,  
henajanede Hejavaneauthau hayāedasāna. <sup>12</sup> Hau  
hadāedauwunathava, hadjavaānanethauayauau  
hena hese hee Sodom, javaānee hee hena  
hedan. <sup>13</sup> Naunauthauau hadnauauchaudauna,  
Chorazin; naunauthauau hadnauauchaudauna,  
Bethsaida; hanau havathenayauthau  
heheenesedaudeneagu jedauwuu Tyre  
nau Sidon, nuu hasehana nananena,  
dajechauau neaunaunevethajauduue-  
wauchudaudenenau, needanaugudaunee  
neauchuwaudene naujuwau nau jaetha. <sup>14</sup> Hau  
hadjavaānanethauayauau hee Tyre nau Sidon  
hāenaudedadadaunee, javaānee nananena.  
<sup>15</sup> Nau nananena, Capernaum, hanejanana  
yese hejavaa, hadjaejanauhanee yese  
hadauveeyauau. <sup>16</sup> Daun hajaathehādaunenau  
nananena hadjaathehānau; nau daun  
hauwauchānavādaunenau nananena haud-  
wauchānavānau; nau daun nauwauchanavāde  
hadwauchanauwaude najejenanādaune. <sup>17</sup> Nau  
nesaudausauau haejaenauusanauau nauuu

neethajaude, hanaāēdauwunauthee, Vahadāhene, daudause haujaunauau hanechauwauaunau-nauau hee nananene haneseede. <sup>18</sup> Nau hanaāēdauwunāthee, Nenauhauwauau Haujau waude jahagude hasejanesaa hehethee hejavaa. <sup>19</sup> Naune, Nananenau vanenathana nananena naudahede hadnauguhudaunauna seseyānauau nau hauwauhaudathee, nau nanadee vahee henaudahede haujau: nau hegau hadneaseneva. <sup>20</sup> Hau vahee nuu jevaneethajaudauwuu, haujaunauau dauuchauwauaunauna; hau henauthaune-neethajauau hanau nananena haneseedaunenau dauwauthaunauhuu hejavaa. <sup>21</sup> Hena hāauchauau Hejavaneauthusau haeneethajaune hevadathuwu, nau hanaāenehede, Nananenau vaveenethedaunathane Nananene, Hau Nāchau, Vahadāhene hejavaa nau vedauauwuu, hanau Nananene dauyauaunaude nuu hayauhuhau hehethee nadaunahehehauau nau hathauwunanenauau, nau hadnauhauthehauva dāeyaunauauau: hethauwuu, Nāsaunau; waude hethadee nananena hasesānenau. <sup>22</sup> Vahee hayauhuhau vanenānau Nāsaunau: nau hegau henane haenauna hanaadāne Heāhene, vavade Vāsaunau; nau hanaadāne Vāsaunau, vavade Vāa, nau nananede hanaadāne Heāwaune hadnauhauthehāde. <sup>23</sup> Nau hanaāējaedagauhauwaude hethauguhādaunau, nau hanaāanadethaude hevenanee, Haunauwuthajaunauha hasesānenau dauhunauhauwuna hayauhuhau hānauhauthaunenau: <sup>24</sup> Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauuu

hena hayauhuhau hānauhauthaunenau, hau hehauwuthauunauhaudauwu; nau devadaunedauwauduu hena hayauhuhau hānedauwauthaunenau, hau hehauwunedauwaudauwu. <sup>25</sup> Nau, naune, jasaa nanavaavehe haetheaugu, nau haenaudayādauna, Hechauhauthethāhe, nauddusedane jethaujenee henaedede? hathauhuk, <sup>26</sup> Hanaāēdauwunāde, Hayew wauthaunesaa nanavaavedaunaa? Hādusasauhaude nananene? <sup>27</sup> Nau hanaāēdauwunaude, Nananene hadvechauthau Vahadāde nananene Hejavaneauthau nauguu vahee nananene hadahaa, nau nauguu vahee nananene hadathuvaa, nau nauguu vahee nananene hadāahedaunaa, nau nauguu vahee nananene haugaugauuthajaudenaa; nau nananene hanedaudewau waude nehayau nananene. <sup>28</sup> Nau hanaāēdauwunaude, Nananene hethauvāne: nanehasedaune, nau nananene hadnenaedene. <sup>29</sup> Hau nananede, vanadauchuvanadede, hanaāenehethaude Hejavaneauthusaun, Nau hanaa nanedaudewau? hathauhuk, <sup>30</sup> Nau Hejavaneauthusau hanaāauchuhanāedauwunaude, Jasaa henane haejathāau hehethee Dādaunedan hese Jericho, nau haeesedanāa havedehehau, haethauwujedaunaa hedāchaunau, nau haenesenehaa, nau haejathāaunenau, haenauthaa dauhayānaja. <sup>31</sup> Nau haejathedasaa jachau vevethahevahew hehethee: nau hāenauhauvāde, haejavechauthaa gauchuhunee. <sup>32</sup> Nau vavade Levite, hāedadauau

hadaunith, haeeda sa\* nau haenāuhauva,  
 nau haejavechautha gauchuhunee. <sup>33</sup> Nau  
 jasaa Samaritan, daujādade, haeedasa  
 hadaunith: nau hāenauhauwaude haeauwunauna,  
<sup>34</sup> Nau haeyehau, nau haedugudauna  
 hadauunesenenith, haeedaunauwuna  
 javeda nau vasevenenaje, nau haedasana  
 nehayau hedauneau, nau haenauuchauha  
 vethehedaunauauwuu, nau haeaunauneha.  
<sup>35</sup> Nau daunauganenee hāejathāau, haeadane  
 hanesanenee hevāejethāwau, nau haevana  
 hadāhevahew, nau hadaunaunehau, hathauhuk;  
 nau daun hasegaujauauthedanānaune jee,  
 hāejaenauusanaune nananenau hadaunau-  
 daunathane nananene. <sup>36</sup> Hayewnau nuu  
 hanasāe, hadeanathaunau, henedaudevādaune  
 henee neesedanāde havedehehau? <sup>37</sup> Nau  
 hanaāēdauwunaude henee heauwunaunādaune.  
 Hanaāenehethaude Hejavaneauthusau, nau  
 jenaenesedaune nananene. <sup>38</sup> Wauhā  
 hethauwuu, daunausujavesathee, haenau-  
 usanaunau jasaa hajaseehauauwudan: nau  
 jasaa hesā haseagu Martha haejedana  
 hedauauwunin. <sup>39</sup> Nau haenahavāe Mare  
 haseeyaugaune, jea haejanaugude Hejavaneau-  
 thusaun heauthene, nau haenedauwaude  
 hedanadedauunene. <sup>40</sup> Hau Martha  
 haeedauwauchune dauwauthanee hasedaude,  
 nau haejeedasa, nau hanaāenehethaude,  
 Vahadāhene, gauhajegaudauvanade dau-

---

\* **10:32** Two words across a page (“haeeda” and “sa”) perhaps should have been hyphenated, giving “haeedasa” which, together with “haeedasaa”, occurs eleven times elsewhere in the text. There are no other occurrences of “sa” standing alone.

jenauthānau nahavaa daunesenesethānau?  
 hāedauwunene hadenedahevānau. <sup>41</sup> Nau  
 Hejavaneauthusau hanaāauchuhanehethaude,  
 Martha, Martha, nananene haunaunāhene nau  
 dejanethajaudauwu waunauthāe hayauhuhau:  
<sup>42</sup> Hau hanesadee hayewhu chaunauguauau: nau  
 Mare hayāchauhauau henee hethadenee hadāde,  
 hehauwuneejathechauhau nauthee.

## 11

<sup>1</sup> Nau hethauwuu, henee, daunausuvevetha-  
 hede haedaunanenee, hāejenedaude, hanesāhenith  
 hethauguhādaune hathāhuk, Vahadāhene,  
 jeechauhauthehāa hadnesevevethahee,  
 waude Jaun jea neesechauhauthehaude  
 hethauguhādaunau. <sup>2</sup> Nau hanaāāedauwunaude,  
 hāene nananena vanevethahenā jeenanese-  
 hena, Hāsaunaunene Nananede hanedaude  
 hejavaa, Vadanauha Nananene haneseede.  
 Nananene hanajanede hanājaunauau.  
 Nananene hathanavāane hadnaasedaunee  
 hasauau hejavaa, nau jee nuu vedauauwuu.  
<sup>3</sup> Hejevenāa hadaachusenee hayauwusenee  
 vethewau. <sup>4</sup> Nau jejaegudanauwunāa  
 hewauchudaudenedaunau hanau nechau  
 nejaegudanauwunade haunauude hanesāde  
 nethāesayānedanauwunāade. Nau jevaechauhāa  
 nedauvasehadee; hau haugaunayauhāa hehethee  
 hadau wausauau. <sup>5</sup> Nau hanaāāedauwunaude,  
 hanaa nananena hadnenedaehahede, nau  
 hadneyehaude thaudajaa, nau hadethaude,  
 Va, jeehe hanasāe jauaujaunau; <sup>6</sup> Hanau  
 nādae daunauujādaunānau, nau nananenau  
 haeyahuunee nauchauwaude? <sup>7</sup> Nau

hehethēe jedauwuu hadnauchuhanehede nau hadnenehede, Jevajanethajuhu: dajanau wauwu haugauhude, nau nanesaunauau nanejauwu naudauvaa;\* nananenau nāhauwuneethauwauthe nau hajeneevenathane. <sup>8</sup> Nananenau hāedauwunathana, hadnehauwuthauwauthene nau hadvenāde hanau dauhunedae hāwaude, auhanau daunenāhede hadthauwauthenith nau hadvenāde daun hadauchuvathe hāthe. <sup>9</sup> Nau nananenau hāedauwunathana, Henedauwauau, nau hadnevenana; henaudethāe, nau hadnevedena; hewaūdāhee (dajanau), nau hadnegaunedanauwunana. <sup>10</sup> Hanau haunauude hanesāde nethāenedauwaude neneaudauwaude; nau henee nenaudethāde nevenauau; nau henee newaūdāhaude (dajanaune) hadgaunanauwunade. <sup>11</sup> Hith hāahenau nedauwunānagu jauaujaunau jasaa nananena henesaunaune, gauhadvena hauunaugane? wauāthe nedauwunāhuk nauwu, gauhadvena hauchuhanee gauhadnanene nauwunenith seseyāne? <sup>12</sup> Wauāthe nedauwunāhuk naunau, gauhadvena hauwauhaudanethe? <sup>13</sup> Hith nananena, hauhauganenagu, hadaenava hadne-sevenauna hethadenee venadedau nau nananena hadāeyaunevenau: duthāee nananena hejavaa Hāsaunaunenau hadvenāva Vadanauwauthauwu nethāenedauwunauna? <sup>14</sup> Nau neausāguthaude haujaun, nau heehauwanadene. Nau hethauwuu hāejathāaude haujau, hanaāejaanadede; nau

---

\* **11:7** Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

henanedanede haegaugauuthajaudene. <sup>15</sup> Hau jasaa hahagu, Nausāguthaude haujaunau heee Beelzehub najane haujaunaa. <sup>16</sup> Nau hauthauau, haenaudayādaunaa, haenehethaa hadnauhauthaudenenee hehethee hejavaa. <sup>17</sup> Hau haeaene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwuu hasānavadenaugu hauauwuu hadjanesaa. <sup>18</sup> Hith, Haujau jea hasānavadagu, hauddusetheaugune henajanede? hanau nananena denehena nananenau deausāguthaugaunee haujaunauau hehethee Beelzebub. <sup>19</sup> Nau hith nananenau hausāguthaugaunee hehethee Beelzebub haujaunauau, hanaa hāahenau hadnausāguthaude? hadedauchuwuwuna. <sup>20</sup> Hau hith nananenau hejadenethedaunaugu Hejavaneauthau hausāguthaugaunee haujaunauau, hethauwuu henajanede Hejavaneauthau hedašana. <sup>21</sup> Henane danāahethe hedauchuaunau haunaunedehuk hedauauwuu, hevatheyaunau nedādayaunee: <sup>22</sup> Hau hāejavaādāāhenethe javaāhehuk hedašanauk, nau veavehāhaugu, hadnedanauwunāde vahee hedauchuaunau heaanadauwardenau, nau hadjaanenee hesehauwenau. <sup>23</sup> Daun najenethaunāde hasānavānau: nau daun najenethauāyāvāde naneāsauauwaude. <sup>24</sup> Hāenauthauthe wauchāde haujau henanene, nehedesade hadaujenajenenee, denausedede dauyānusenade; nau janeveedethe, naneenehede, nananenau hadjaesanau naudauauwuu needaujenauahenau. <sup>25</sup> Nau jaenauusathe, nevedede nesewaudeauhunee



nau neyauauthaunenee. <sup>26</sup> Naeneejathāude, nau naneedanauwaude hanesaudauchunethe hauthauau haujaunau javaānauhauganenethe javaāhede; nau nanejedāthee, nau nanejanauguthee: nau waunee henee henane naeneejavaānauhauganede nedauaunejeethāde. <sup>27</sup> Nau hethauwuu, hajeseanadede nuu hayauhuhau, jasaa hesā hehethee henaneda haevasanade, nau hathauhuk, Hauwunaunade henesaunehe hājaneseauthāde Nananene, nau hethanau nedaunenane. <sup>28</sup> Hau hahagu, Haa, nausunee, nauwunaunathee nethāejaathededuu hedanadede Hejavaneauthu, nau naunaunedethee. <sup>29</sup> Nau henanedanede hāneenanauthenanedauhuu, hanaāejasesenehede, Nu nanaa wausauau henaedede: nevadanauhauthāthee; nau hegau nauhauthaude hadvenaunauau, hau vavade nauhauthau nananede Jonas haeyāhe. <sup>30</sup> Hanau Jonas neesenauhauthaude Ninevites, nechau jea Heau henane hadnaathāde nuu henaedede. <sup>31</sup> Nenauchuwusā janauhuu hadjaegauhāde naudedadunenese nauuu henanenau nuu henaedede, nau hadnauthauwuvāna: hanau dejewaunejaathehaude hehethee hāauauvadenee naunaudāhenith Solomon; nau naune, hejavaāhedaune Solomon hanedaunith. <sup>32</sup> Henanenauau hehethee Nineveh hadjaegauhāthee naudedadunenese nauuu nuu henaedede, nau hadnauthauwuvāna: hanau dauaugauthethajauduu hedauthedaunene Jonas; nau, naune, hejavaāhedaune Jonas hanedaunith. <sup>33</sup> Hegau henane, hāesedauchauuu nauauuthayau, hehauwujenane yauthee,

daudause hehauwugaudauyasenaunaa,  
 hau dasee nauauuthayauneetheaugunee,  
 nethāejedāthee hadnenauhauduu nau-  
 nauasādanee. <sup>34</sup> Hanesenee vadanayannaa nanaa  
 nevasesānee: nanaa hāenesadee hasesānenau  
 nananena, nananene hadnaunauudauyauau  
 hadanayau jea hanechauchaunaa hesee;  
 hau hāene nananene hasesā wausuu,  
 hadanayau jea hadnechauchaunaudene  
 vaneeyauau. <sup>35</sup> Haunauyauhaudauwauau  
 hanau henee hesee hathāsadaude nananene jeva  
 veeyauha. <sup>36</sup> Hith nananene haunauudauyauau  
 hadanayau hanau hadnechauchaunaudene  
 hesee, hadnehauwugauuveeyau haunauude  
 hadnechauchaunaa hesee, waude naunauasādāe  
 nauauuthayau nevenāna hesee. <sup>37</sup> Nau  
 hajesanadee, jachau Nesethajauhu haeadethaa  
 hadnethevethewau: nau haewaunejedā,  
 nau haejanaugu dauvethede. <sup>38</sup> Nau hāene  
 Nesethajauhu nauhaudauau, haegaudauvanava  
 daujaheseuhunith nedauau hajesejeveth-  
 henith. <sup>39</sup> Nau Vahadāhenith hathāhuk,  
 Hewaunehaa nananena Nesethajauhuhauau  
 neyauthahenauwuna jathee vāenaunau nau  
 saenaunau; hau nananena hethauvaa  
 hanechauchaunaudena vahedayaude nau  
 hauhauganede. <sup>40</sup> Nananena janethauvahena,  
 gaujenane Hejavaneauthau nenesedede jathee  
 gaujee henesede jedauwuu? <sup>41</sup> Hau hevāe  
 hauwuyau daun hanetheyaunenau; nau, naune,  
 vahee hayauhuhau hadnesewaudeanauwunana?  
<sup>42</sup> Hau naunauthauau hadnedasāna nananena  
 Nesethajauhuhauau, hanau nananena hadvāna

vadadauchu wauhaunauau nau naneujaude-  
 vejechau nau vahee hathāejajāesuu vejechau,  
 nau hadjavechaudauwuna vavesauchuwude  
 nau devechauthade Hejavaneauthau; nuu  
 hāvachunaasedauna, nau hānanejenaudauwuna  
 hauthauau nejeseehe. <sup>43</sup> Naunauthauau  
 hadnedasāna nananena Nesethajauhuhauau,  
 hanau nananena devechaudauwuna najatheau-  
 gudaunau jedauwuu vevethahenauauwuu,  
 nau dejachauthana nedauaudaunauvadee.  
<sup>44</sup> Naunauthauau hadnedasāna nananena,  
 wauthaunauhāhehauau nau Nesethajauhuhauau,  
 nanadaunahena, hanau nananena waude  
 nedaugaudauyauhudaunee dejenauhauwuu,  
 nau henanenauau nedasejavesathee  
 hehauwaenaunā. <sup>45</sup> Hanaāauchuhananadede  
 hanesāde nanavaavehe, nau hathauhuk,  
 Hechauhauthethāhe, nuu dauhanadene  
 nananene naunaunauthevāana jea. <sup>46</sup> Nau  
 hathāhuk naunauthauau hadnedasāna nananena  
 jea, nananena nanavaavehehauau, hanau  
 nananena henenauchuna henanenauau nauguu  
 henenauchude hehayaudee javechauhunee,  
 nau nananena nehayau jevavasanauwuu  
 henenauchudaunau hee hanesadee nananena  
 hajadenenau. <sup>47</sup> Naunauthauau hadnedasāna  
 nananena, hanau nananena denesedaunauna  
 gaujauaudahenauauwu haeyāhehauau, nau  
 hāsaunaunenau denauauthee. <sup>48</sup> Hethauwuu  
 nananena haeyāna henee nananena wauhaunee  
 nanāsedauthee hāsaunaunenau: hanau  
 denauauthee, nau nananena nenesedena  
 hegaujauaudahenauauwunenau, <sup>49</sup> Naasauau  
 jea hahagu hedaeyaude Hejavaneauthau, Had-

jenanu haeyāhehauau nau vadauhanauau, nau hauthauau hadnenaathee nau hadnenaunau-nauchauthehathee: <sup>50</sup> Henee hevaevenau vahee haeyāhehauau, hanedaunee hehethee davadeesehee vedauauwuu, hadneenaudedauwuhuu nuu henaedede; <sup>51</sup> Hehethee hevaevaa Abel nauuu hevaevaa Zacharias henee nenajaa nahethāe jaanaa nau vadannauauwuu: hethauwuu nananenau nehethathana nananena, hadneenaudedauwuhuu nuu hee henaedede. <sup>52</sup> Naunauthauau hadnedasāna nananena nanavaavehehauau, hanau nananena dauhudanauwuna gaunaudauauha haeyaude: nananena hadnehauwujedāva nehayau, nau henee hathāejedāthee nananena najauaunauna. <sup>53</sup> Nau daunenehedauau nuu hayauhuhau yese, wauthaunauhāhehau nau Nesethajauhuhauau hanaāejaseseneenaudedauunāde, nau haeneenadaunanauau hadnauthedaudauwunith hauwuhuu hayauhuhau; <sup>54</sup> Haeaudenauthaa, nau hadnesedanauwunethe hayewhu hehethee hedenene, hadnāedauwauthathee.

## 12

<sup>1</sup> Gaunauwuu, hāene hena hauāchaudenee hauānee haejedaguu hadaucha henedanede, dauwauthaa haeaunauguhudaunadenauau, hanaāejasesāedauwunaude hethauguhādaunau nedauau vahee, Haunauyauhaudauwauau nananena gauhajau Nesethajauhuhauau, nenadaunahethee. <sup>2</sup> Hanau hehauwuyauthesa, hathāeyauthesaa, daudause hehauwuyauthesa, nethāejaenaunee. <sup>3</sup> Hanau daun nananena hasanadenā veeyaugu hadnedauwuhuu

hesenee; nau henee nananena hasenehenā waunaudaunuu jedauwuu hadnauchunana dasee hauauwuu. <sup>4</sup> Nau nananena hāedauwunathana Nādaehauhauau, Jevaesaa henee nenadethee henanedayāhau, nau heee hehauwauthesedaunauau. <sup>5</sup> Hau nananena hāedauwunathana daun nananena hāchaunenau: Hesaa Naa, heee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa. <sup>6</sup> Hayauthaunethee hajaseaheauau gujeaudaunaune heee hanesāenee nevaāhenee, nau hanesāde hehauwunauneethedaunā Hejavaneauthu? <sup>7</sup> Hau daudausee hadauchāe hāthaanenau haudauguhuanenau vahenayāee. Jevanāthajauau henaheee: nananena javaānauwahuana hadauchuthee hajaseaheauau. <sup>8</sup> Jea Nananenau hāedauwunathana, Daun naujaudauthehāde hesee henaneda, nananede Heāhene henanene jea hadnehauwaudauthehaa hesee hautheaunau Hejavaneauthuu. <sup>9</sup> Hau henee nauyauhāde hesee henaneda hadneyauhade hathaāhenethe hautheaunau Hejavaneauthuu. <sup>10</sup> Nau daun hayādaunaude Heāhene henanene, hadjaegudanauwunade: hau nananede henee hauhauganedauau Vadanauwauthauwu hadnehauwujaegudanauwunau. <sup>11</sup> Nau hāejedanānā vevethahenauauwuu, nau hauchuwunanenauau, nau najanauau, jevagaugauanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena: <sup>12</sup> Hanau Vadanauwauthauwu hadnāedauwunāna nauauchaugu daun nananena hadnesenehena.

13 Nau hanesāde hehethee hananeda  
 hathauhuk, Hechauthethāhe, hanadesene nasaa,  
 hadegaugauanauwaunauau vatheyau.  
 14 Nau hathāhuk, Henane, hanaa nanesehāde  
 hadnauchuwuhathane nau hadjaanauwu-  
 nathane nananene? 15 Nau hasenehethauhuk,  
 Haunauyauhaudauwauau, nau naseduhuu  
 jevavathehāe: hanau henane hedenaedede  
 hehauwunedahēvaa wauthayāgaune hevathēyau-  
 nau henetheyaunau. 16 Nau haeanadetha  
 haejegausudenanadetha, Vedauauwuu  
 jasaa nethauyāsenane haenautheauthā:  
 17 Nau hasethajauhuk nehayau, hewauau  
 hauaudnesedaunaune, hanau hajenethenauwau  
 jedauwuu hadnedauthānauwau navethenau,  
 hahagu? 18 Nau hanaāenehede, nuu  
 hadnaasedaunau: hadthauwunauwau  
 nathāyānauauwuu, nau hadnesedenau  
 hadjavaāvasauau; nau hadnaadauthānauwau  
 vahee navethenau nau navathēyaunau.  
 19 Nau hadnaāenehethauau navadathuwu,  
 Vadathau, nananene nanethenauwu waunauthāe  
 hanetheyaunau janenane hadwauthāe jajene;  
 hedana nanethauaunenaedede, hevethehe,  
 hevaveyā, nau haunauwunaede. 20 Hau  
 Hejavaneauthu hathāhuk, Nananene Hauhauga,  
 nuu dauveyauau nananene havadathuwu  
 hadnedauwunane: hee hanaa hadnethenauau  
 hajenayaunau? 21 Nananede haenathaunau  
 heveaunauaudenau, nau hehauwuveaunauau  
 hesee Hejavaneauthu. 22 Nau hathauhuk  
 hethauguhādaunau, Naa nehethathana,  
 Jevaegauguanadauwuu hadenaededaunenau,  
 daun hadnevethedaunenau; daudause hee

hadanayaunenau,       daun       hadnāsaunenau.  
<sup>23</sup> Henaedede javaāsaa vethevaa, nau vadanayau  
 javaāsaa hāchaunaa. <sup>24</sup> Gaugauanavaa huunauau:  
 hanau dejejenayāthee nau dejegauausauhāthee;  
 hehauwunethenauwu   thāyānauauwu   nau  
 vethewau nedauthāsanenee; nau Hejavaneauthau  
 nachauwaude:       gauhajavaāneenaedeva  
 neahenaa?       <sup>25</sup> Nau hanaa nananena  
 vanadaunanāde heee neejahehee?       <sup>26</sup> Hith  
 nananena wauhā jeneenesedaunagu henee  
 haugajuhuu,   naudu hajanethajaudauwuna  
 hauthauau? <sup>27</sup> Gaugauanadauwuu nenaugaānuu  
 nejajaesaānuu   neseveseuu:       hehauwune-  
 sethānaunau,       hehauwunethaudayānaunau;  
 nau   nausunee   nāedauwunathana,   henee  
 Solomon vahee hevasāthade heehauwunaasenu  
 hasaunee nuu. <sup>28</sup> Hith wauhā Hejavaneauthau  
 heneenudehuk wauchuunau,   nuu desenee  
 nauau, nau naugaagu hadneewaudeadaunenee;  
 hāduthāejavaāvenāva hāchaunau,   Hau nananena  
 vanehaa hethauwuthajauna?       <sup>29</sup> Nau  
 jevanaudedee   nananena   daun   nananena  
 hadnevethedaunenau,   wauāthe   daun   had-  
 nevaveyādaunenau,   jevaauwaugaugauuthajauau.  
<sup>30</sup> Hanau vahee nuu neauthudan hathāauauvaa  
 nenaudethāthee:   nau nananena Hāsaunaunenau  
 haenauau henee nananena hāvathehādaunenau  
 nuu hayauhuhau.       <sup>31</sup> Hau henaudedee  
 nananena   henajanede   Hejavaneauthau;  
 nau vahee nuu hayauhuhau hadnethedau-  
 nanauwunana nananena.       <sup>32</sup> Jevanāthajauau,  
 hāhauwuauthaheva;       hanau   nananena  
 Hāsaunaunenau       hayethanadauwunādaunenau  
 hadvenāna henajanede.       <sup>33</sup> Heaudaunaa henee

hanetheyaunenau, nau hauwunaunaa hadavenuhuhauau; jasedauau nesevāejethāwaunau henee nejethauuthauauchusāe, haenathaude haneduu hejavaa henee nejethauuyauhuu, nedaujavedadenee, hehauwujuudenauau nuvanauauau. <sup>34</sup> Hanau haduu hadaenathaunenau, hena hadahenau jea hadnaaduuu. <sup>35</sup> Duujehee, nau haunauauuthayaunenau gauhauchanauha; <sup>36</sup> Nau nanehathahena henanenauau henee nedauyauhauwauthee hanau Hadahethedaunādaunenau, hāejejaesathe hehethee gauwuhaude; henee hāejenauusathe nau hadwardāhaude, hadgaunanauwunade nauhauhaunee. <sup>37</sup> Hauwunaunaa henee nesethāhehauau nananenethe, Vahadāde hājenauusathe hadveenaude hadnau-nauyauhauthānethē: hethauwāedauwunathana, hadduujede nehayau, nau hadjanauguhaude hadvethehenethe, nau hadjeedauchaude nau hadnaunauchauwaude. <sup>38</sup> Nau hith jenauusahek naneseauwaude haunauyauhauthāhe, wauāthe jenauusahek naneseauwaude haunauyauhauthāhe, nau hadveenaude hadnesaanunethe, hauwunaunaa henee nesethāhehauau. <sup>39</sup> Nau nuu hāenauwuu, henee hith henane hedauauwuu haenauaugu daun hāauchaunee havedehew neenauusanith, haunaunauyauhauwaude, nau hanājechuwauthedaunenauhunee hedauauwuu. <sup>40</sup> Nananena hadnaaesaaunana jea, hanau Heau henane hadnauusade daun hāauchaunee hājenauanauwaunā. <sup>41</sup> Peda hanaāanadethaude, Vahadāhene, gauhanadethāa Nananene nuu hee jegausudede wauāthe vahee? <sup>42</sup> Nau Vahadāde



hahagu, Hanaa henee chuvahagu nau hesenaede-  
 huk hadāhevāhe, nananede hadāhewaunādaune,  
 hadnevenaude gauuu vethewau nauauchaunee?  
<sup>43</sup> Hauwunaunaa henee nesethāhe, nananenith  
 hadāhewaunādaune hāedasāthe hadveehāde  
 hadnaasehāde. <sup>44</sup> Hethauvaa hathāedauwunathana,  
 henee hadnesehāde hadāhewaude vahee  
 hethāenetheyaunau. <sup>45</sup> Hau nau hith henee  
 nesethāhe hesethajauhuk, Nadāhewaunāde  
 jeguthenauusahek; nau henenesegauhahek  
 henanenau nesethāhehau nau hesānau, nau  
 hevethehagaunee nau hevaveyāhaugaunee,  
 nau henaunauneseavagaunee; <sup>46</sup> Hadāhevāhe  
 henee nesethāhe hadnauusanith hajesesenenee  
 hāejejauwuwuhauthe, nau, neejaenauau, nau  
 hadgudanāde nau hadjenanaude jethauwau-  
 dahehau. <sup>47</sup> Nau henee nesethāhe haenauaugu  
 hadāhewaunādaune hathanavāde, nau jesaanuhuk,  
 daudaus dejeesedaude hathanavāthe  
 hadnenenesegauhude dejauaunee. <sup>48</sup> Hau  
 henee jaenauaugu, nau hesedauhauk nesene-  
 neseguhededaunenee hanājauwaunenesegauhude,  
 hanau daun hauwauhuvenāde nananede  
 hadnauwaunedauwunade; nau nananede  
 henane hauwauhauhauthade, nananede  
 hadnauwaunedauwunade. <sup>49</sup> Hadjejenanauwau  
 heseda dasee vedauauwuu; nau hayew  
 navathehāde wauwu gauhauchagu? <sup>50</sup> Hau  
 nanethenauwau dusaahede hadneedusaa-  
 hedaunee; nau hanahauwaudauaunānau  
 haunaude hesedaudeyāgu. <sup>51</sup> Haneējaude  
 hadjenanauau dādaunee vedauauwuu  
 haāthanaveva? hadāedauwunathava, Hegau; hau  
 wauāthe hanāgauanauwau: <sup>52</sup> Hanau hehethee

hee yauthaunenandauneagu hanesadee  
 hauauwuu hadgauanee, hadnasaunauthee  
 hanesenethe, nau hadnesaunauthee  
 hanāenethe. <sup>53</sup> Henesaunaun hadgauanathee  
 hadnasānauwaude heau, nau heau hadnasānavāde;  
 hesā hadnasānauwaude hedaunau, nau  
 hedaunau hadnasānavāde, hesā hesave  
 hadnasānauwaude, nau hesave hadnasānavāde.  
<sup>54</sup> Nau hanaāanadedauau jea henanedanede,  
 hāenauhaudauwunā henaunauade jevechau-  
 uchaugu hehethee nesenaesade, chauchaunu  
 nananena, Hadnauchuhajauwasauau; nau  
 naenesauau. <sup>55</sup> Nau hāenauhaudauwunā jenauhuu  
 hanehedasāe, nananena, hadnasedaa; nau  
 naenesauau. <sup>56</sup> Nananena nanadaunahena,  
 nananena naenauwuna hedauchaveau  
 haunauau nau vedauauwuu; hau dusaudee  
 haejaenauwuna nuu hewaunehaa? <sup>57</sup> Haa,  
 nau nau du daudause nananena haejae-  
 nauwuna hasethadee? <sup>58</sup> Hāeyehauthānā  
 hasānavādaunenau hauchuwunanenau, nausu-  
 javesanagu, nayātheneneevaa hadeenayauhāna;  
 havaehauthāva najanauchuwunanee, nau  
 najanauchuwunane havavena duguthāhew,  
 nau duguthāhe havathānāva duguthānauauwuu.  
<sup>59</sup> Hāedauwunathana havajeneenauthauva, hau-  
 naude vathaunaudahunagu havāejethāvenau.

## 13

<sup>1</sup> Hena hethaa hee jachau haeauthedaunaa  
 Gananeans, hevaewu Pinade haewauhau-  
 nauwuaunenau nedauausāyāthee. <sup>2</sup> Nau Heja-  
 vaneauthusaun haeauchuhananadethā, Nauchāe

nananena henee nuu Gananeans heuhau-  
 gayaugaunee javaānee vahee Gananeans, hanau  
 daujeneethajauduu hayauhuhau? <sup>3</sup> Nananenau  
 nāedauwunathana, Hegau: hau, vavade  
 nananena jaugauthethajaunagu, nananena  
 hadnavahethahena gaujauaudahede. <sup>4</sup> Wauāthe  
 hena nasaudauchunee, dasee hayauauwuu  
 jedauwuu Siloam dethauwunauauau, nau  
 haenanaā, gaugauanadauwuu henee gauhu-  
 javaānauhauganenuauau vahee henanedanede  
 henee theaugude jedawuu Dādaunedan?  
<sup>5</sup> Nananenau nāedauwunathana, Hegau,  
 hau vavade nananena jeneethajauhadede,  
 nananena hadnavahethahena gaujauaudahede.  
<sup>6</sup> Haeheanade jea nuu dajenehede; Jasaa  
 henane haenethena hauyauuchunauhaudene  
 haejenana jedauwuu dadajevenevese  
 nethauchayaunaa; nau haejenauusa nau  
 haenaunaudedede vevenaundenau hanāvenee, hau  
 haejeveede. <sup>7</sup> Hanaāenehethaude nesethāhew  
 hedadajevenevese nethauchayaunaa, Naune,  
 nuu hanasāa jajene nananenau hanejaunau  
 daujenaudedenuau vevenaundenau nuu  
 hauyauuchunauhaudee, hau hajeveedenau:  
 dauwauhune; hadevachunauthauyauau  
 vedauauwuu? <sup>8</sup> Nau hanaāauchuhanadethāde,  
 Vahadāhene, hauwaa nanehasene nuu heee  
 jaje jea, nadeesenenesede, nau vehethe hadje-  
 nanauwau. <sup>9</sup> Nau hith hāvāgaune vevenaundenau  
 neee: nauhith jene, hadnaāedauwauhade. <sup>10</sup> Nau  
 haechauhauthethā jasaa vevethahenuauwuu  
 vadanese. <sup>11</sup> Nau, naune hena hesā  
 haujaunehaeheagauwu nasaudauchunee

jajenee, nau haevajanā hauānee, nau haejeneechuwuwauthe nehayau. <sup>12</sup> Nau hāene Hajavaneauthusau nauhauwaude, Haeadetha, nau hanaāāedauwunaude, Hesā, nananene haunaugunane hehethee hadaugauwudaunaa. <sup>13</sup> Nau hanaāēvasanaude: nau chauchaunu hanaāechuvāde, nau haevaveenethedauna Hejavaneauthu. <sup>14</sup> Nau hauchuwunane vevethahenauauwuu haeauchuhananade nauuu hasenaunaude, hanau henee Hejavaneauthusaun denayauthānith vadanesee, nau haeautheda henaneda, Hena nanedauchaehē hese henane heenesethādaunau hanānaneējauna nau hanānaneenayauhana, hau hegau vadanesee. <sup>15</sup> Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanesee haugunauva hauwaugajevenau wauāthe naugauchaudaheauau hehethee hewauchuhauchauwauwuu, nau gāyethaājethauva devanauhauna? <sup>16</sup> Nau gaujenaasaunee naa hesā, hedaunau Ābraham,\* henee Haujau heduguthaune, naune, nuu nasaudauchunee jajene, hāaugunade hehethee nuu deduguhude vadanesee? <sup>17</sup> Nau hāenehedauau nuu hayauhuhau, vahee hejauthauwau haeaudaudāhenenau: nau vahee henanedanede haeneethaujudene hee vahee havathee hayauhuhau henee hesethaunau. <sup>18</sup> Hanaāenehede, dusaune henajanede Hejavaneauthau? nau hayew

---

\* **13:16** “Ābraham” is spelt thus once in this verse and spelt “Abraham” thirteen times elsewhere in the text. It is not known whether the spelling differences have any grammatical significance.

naudnenehethau? <sup>19</sup> Waude nejenanenee mausdaude, henane nedanauau, nau neneāgudede hejenayaunaa; nau neveseaudede, nau hāhe haeavadauhaudene; nau neahehauau hejavaa negauusee hedānaa. <sup>20</sup> Nau jea hanaāenehede, Hayew naudneedajenehethau henajanede Hejavaneauthau? <sup>21</sup> Waude nesaunauchaa henee hesā nedanauau nau nejenanauau nasau dejenauhunee thauauhanau haunaude devahenesaunadāe. <sup>22</sup> Nau haeehedesa hauwauhauauwudane nau hajasedan, dechauhauthethāde, nau haejāda hesee Dādaunedan. <sup>23</sup> Hanaāanadethāde hanesāhenith, Vahadāhene, gaujewauthanauau henee henayauhathee? Nau hanaāāedauwunaude, <sup>24</sup> Neaunedauwauau hadejedāna hadaugaugunesāde dajanau: newauthana, Nananenau dāedauwunathana, hadnenaudedena hadnedaujedāna, hau hadnehauwunee dauva. <sup>25</sup> Hāene hechauhauthethāhe hauauwuu thauwauthehuk, nau haugauhahagu dajanaune, nau nananena hanānaāetheauguna jathee, nau hanānaāewardāhauna dajanau, hanānaāenehethauna, Vahadāhene, Vahadāhene, jegaunanauwunāa, nau hanānaāauchuhanehethāna nau hanānaasenehethāna, Hāhauwaenaunathe daun hadesane: <sup>26</sup> Hanānaāenehethauna, Nevethenauau nau nevaveyānauau hathaāhene, hau nananene dauthedaunānehadaugauchadee. <sup>27</sup> Hau hadnaasenehede, Hāedauwunathane, Hāhauwaenaunathe daun hadesane; nayāsesave vahee nananena nesethāhehauau wauwauchudaude. <sup>28</sup> Hena hadnevewauhudaunee nau hadnegaugauchaugudasenana, hāenauhauwaunā

Abraham, nau Isaac, nau Jacob, nau vahee haeyāhehauau, Jedauwuu henajanede Hejavaneauthau, hau nananena nehayau nenuguthadena. <sup>29</sup> Nau hadjenauuchaudenee hehethēe nejeethevesesanith, nau hehethēe nesenaesanith, nau hehethēe nanavee, nau hehethēe janauhuu, nau hadjanauguduu henajanedaunene Hejavaneauthu. <sup>30</sup> Nau, naune, hena hedauaude hadnedauvade, nau hena nandedauvade hadnedauchude. <sup>31</sup> Hajesesenee hena haejenauusa jasaa Nesethajauhuhauau, hasenehethāhuk, Nauahe, nau jathāau, hanau Herod hadnaāne. <sup>32</sup> Nau hanaāāedauwunāthee, Najesaa, nau hadāedauwunauva hena vachuhuu, Naune, nenuguthu haujaunauau, nau nenayauthānau nuu desenee nau naugaagu, nau nanaseauwauau heseē hadnaāesedaunau. <sup>33</sup> Hau hadnenesanau nuu desenee, nau naugaagu, nau jea hathavenaugaagu: hanau hehauwunaasau henee haeyāhe denaade Dādaunedan. <sup>34</sup> Hau Dādaunedan, Dādaunedan, nanathee nenauauthee haeyāhehau, nau nenauchauwathēe hauunaugāe henee hejejenanauwunaudenenu; dauhudauchu naudnauāchauhaunauau nananena hadāeyaunewauau hauānee waude neauthuneahee dauānaude henesaunau hethauvaa hethaenaa, hau hāhauwuvatēhāva. <sup>35</sup> Naune haudauauwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva haunaude nauauchaugu hadneenehena, Hauwunaunaa henee jaunaude hee heneeedaunene Vahadāhenith.

## 14

<sup>1</sup> Nau hethauwuu, daujedāde hedauauwunene hanesāhenith najane Nesethajauhuhau hadvethee jauaujau vadanese, henee haeaunauyauhauvaa.  
<sup>2</sup> Nau, naune, hena jasaa henane hathaāhede haenenesaunenauau. <sup>3</sup> Nau Hejavaneauthusau haeauchuhananadetha nanavaavehehau nau Nesethajauhuhau, gaujenanavanau henayauthaude vadanese? hāthauhuk. <sup>4</sup> Nau haedādaunaugunauau. Nau hanaāedanaunith nau haenayauha, nau haejenana; <sup>5</sup> Nau haeauchuhananadetha, Hanaa hedauneau naugauchaudahehau wauāth waugaje janesenayaugaune hadaundaunadene, nau gauchauchaunu gauhadnauuguthauva vadanese? hathauhuk. <sup>6</sup> Nau haeyauhuune nesenehethauthee jea nuu hayauhuhau. <sup>7</sup> Nau haedadajenehetha henee hathāadethavathee, hāenauhauwaude hasayāchauhauwunethe najatheaugudaunau; hanaāēdauwunaude,  
<sup>8</sup> Hāene nananena hadethaunā henanenauau gauwuhaudeneagu, jevajanauguu najatheaugudaunaa; havajavaānethā henane havajavaāheva henee hadethade; <sup>9</sup> Nau henee hadethāde nau nananede hadjaude nau hadnethāne, Venene naa henane hadehedaugu; nau nananene haddayāhene janaugunenagu hesaudavaa. <sup>10</sup> Hau hāene nananene hadethanenagu, haddeyehau nau hadjanaugu hesaudavaa henee hāene hadethāde hadjaude, hadethāne, Va javesa; hadnaāene nananene vechauthānaune henee hanethevethehevādaunauau. <sup>11</sup> Hanau daun nanajathajauve nehayau hadnausādauaude; nau

henee nausādauauadede nehayau hadnajanede.  
<sup>12</sup> Hanaāenehethaude jea henee hadethādaune,  
 Hāene nananene gauusevanenagu wauāthe  
 hethunevethhevanenagu, jevaadesene  
 hādaehauhauau, wauāthe hāthesaunauau,  
 daudause hādauānauau, wauāthe nethauyādahagu  
 hanedaudewau; havaadethaa jea, nau  
 havaaunaudaunā. <sup>13</sup> Hau hāene nananene  
 vethhevanenagu, hadadethaunauau  
 hadavenuhuhauau, henesenehehauau,  
 jeneejavesahehauau, nanenauguhuhauau;  
<sup>14</sup> Nau nananene hadnauwunaunane; hanau  
 daujeneaunaudaunānaune: hanau nananene  
 hadnaunaudaunane jaegauhadenega  
 hathāethadee. <sup>15</sup> Hāene hanesāde henee  
 henethevethhevēādaune daunedauwaudauwu-  
 nith nuu hayauhuhau, Hauwunaunade  
 henee hadvethee jauaujau henajanaunene  
 Hejavaneauthu, hathāhuk. <sup>16</sup> Hanaāēdauwunaude,  
 jasaa henane haeavathethunevethheva, nau  
 haeauwauhadethānanena; <sup>17</sup> Nau haejenana  
 hewauwaune dauethunevethhedane  
 hadnāedauwunaunith henee hadethavathe,  
 Jenajesaa; vahee hayauhuhau wauwu  
 hanesejenanee. <sup>18</sup> Nau vahee haenesadene  
 hathauchuwuhadethee hadnudanathee.  
 Nanedauwauaude hasenehethauhuk,  
 Neaunaudauwau vedauauwuu, nau  
 hadneyehaunau nau hadnauhaudauwau:  
 Nehethathane hadnudanene. <sup>19</sup> Nau jasaa ahagu,  
 Neaunaunauthu yauthauyauna hedauhuwau-  
 gaje, nau hadneyehaunau hadnayāduuhuu:  
 nenehethathane hadnudanene. <sup>20</sup> Nau jasaa  
 hahagu, hedauwunenenu, nau naajenejaunau.



21 Hanaājenauusade henee wauwau, nau hanaāenauhauthehaude hadāhewaunādaune nuu hayauhuhau. Wauhā hechauhauthethāhe hauauwuu hanaāasenaunade hanaāāedauwunaude hewauwaune, Yegauhu nauhauhaunee hadaugauchaudāe nau hadaugauchaneee hedane, nau hadjāthaunauau hede hathāadavenuhunethee, nau henesenehehauau, nau jeneejavesahehauau, nau nanenauguhuhauau. 22 Nau wauwau hasenehethauhuk, Vahadāhene, naasedaunau hasenehesene nau nausunauthauyauau, hathāhuk. 23 Nau Vahadāhede haeāedauwuna wauwaune, Yehau hathenavaunaa nau nethauchayaunaa nau hadjādasauaunauau hadejejedāthee, henee naudauauwuu hadeechaunaana. 24 Hanau nāedauwunathane, henee hegau hena henanenauau neadethathee hadnehauwuvajadauwu nadethunevethehewau. 25 Nau hena haenethaunau havathenedanede: nau hanaāejaaagude, nau hanaāāedauwunaude, 26 Hith daun henane hedaānaugu, hau jasānauwauhuk henesaunaune, nau henaune, nau henene, nau dāeyaunauau, nau henethesaunau, nau hedaāwau, haa nau nehayau hedaedede jea, nāhauwuneethauguhaa. 27 Nau daun janenevaa henaugauchu, nau thauguhānaugu, nāhauwuneethauguhaa. 28 Hanaa nananena vanadaunesedede hayauauwun gauhadjejanaugu nedauau hadnayādede hadaachuunee, wauau hanaadauchanenee hesehenee? 29 Havaene hesejenanauhuk hauunauganau, nau hanājeneesedede, vahee henee hathāenauhaudauau hadneevavavayaudenenee. 30 Naa henane nenesedede, hau hajeneesedede, hanāthāde.

31 Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauau wauau haneene nauguu vadadauchu vasevadadausauau hadnenuchau-naude henee hejevenahedaunau nauguu nesauau vasevadadausauau? 32 Wauāthe, haje-senausujechaugunethe, hanāyethautheavede, nau hanānayāthenedauāwaunaude. 33 Nau naasauau, daun nananena henee janenaunaudauau vahee henethyaunau, nāhauwuneethauguhaa. 34 Nejaauuwuu hethadee: hau hith nejauauwuu jevanujaudāgu, hayew hadneenejaauuwujauau? 35 Daudause hehauwuuthade vedauauwuu, wauāthe hee vehethe; hau henanenaauau hanāneāgudede. Daun henaudaununede heenedauvahek jaathedeha.

## 15

1 Hanaāeauchaunāde vahee hauāyāhehau nau wauwauchudauhuhau hee hadjaathehāde. 2 Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethehe-waude, hathāhuk. 3 Nau haeauthaunanadetha, hasenehethauhuk, 4 Hanaa henane nananena hedauneede vadadausauau jauaunawaudā, hith hanauhauhuk hanesahenith, gauhadnautha theaudausauau nau theaudauchunee nauaunee, nau gauhadnaudeha henee naunethauaunith gauhaunaude hadveeha? 5 Nau hāeveehauthe hadthāegauhaude hejaanaunaa, hadneneethajaude. 6 Nau hāenauajegauhuthe, hadnadethaude hauānee henedaehauhau

nau henedaudevādaunau, netheneethajau-  
dauwunee hanau daujaveehauau naudauāve  
nenaunethauaude, hathauhuk. <sup>7</sup> Nananenau  
hāedauwunathana, nuu hadnaasauau neethajaude  
hayāene hāene hanesāde wauwauchuduhu  
haunaunevethajauhuk javaānee theaudausauau  
nau theaudauchunee hathauwunane  
janenethenauau haunevethajaude. <sup>8</sup> Dause  
daun hesā nethenauaugu vadadauchu  
gauneevāejethā, hith hanadehuk hanesadenee  
gauneee, gauhadjedeauchauau nauauuthayau,  
nau gauhadwaudeau hauauwuu, nau  
gauhadvavesenaudene haunaude gauhadveede.  
<sup>9</sup> Nau daun hāeveenuu hanadethaude henedae-  
hauhau, nau henedaudevādaunau hauānee  
netheneethajauwuu, hanau daujaeevenauwau  
hanesadee nāanathau, hanāthaude. <sup>10</sup> Naasauau,  
Nananenau nāedauwunathana, haneduu  
neethajaude hathaāhethēe hautheaunauau  
Hejavaneauthuu hanesāde wauwauchuduhu  
haunaunevethajauhuk. <sup>11</sup> Nau hasenehehuk,  
jasaa henane neseyaugaune heauhau: <sup>12</sup> Nau  
hajauchaugade haenehetha henesaunaune,  
Nāchau jevene gauuu vatheyaunau henee  
nāudnedadahedaunau. Nau hanaāgauuvenaude  
hethāenetheyaunau. <sup>13</sup> Nau haunauauhaejewau-  
thanenau hese hajauchaugade hāesauānauau va-  
hee hauānee, nauhanaāejathāaude hese vavāaune  
vedauauwuu, nau hena hanaāevadauthedede  
hethāenetheyaunau heee hauhaugānenaedede.  
<sup>14</sup> Nau hāevathedede vahee, hena  
haanaāenauauchauau naunauthauau hasenaude  
hena vedauauwuu; nau hanaāadavenuhunede.  
<sup>15</sup> Nau hanaāeyehaude nau hanaāewauhaunesade

nehayau hauwauhauauwunanenau henee vedauauwuu; nau haejenanaa hethauauwuu hadnauchauwaude neauthuwauchu. <sup>16</sup> Nau hanāneanadauau hanāchauchaunaude henaude hee jeyauwaunau henee neauthuwauchu hevethedaunenenu: hau hegau henanene hevenaa. <sup>17</sup> Nau hāaenaude hanaāenehede, Waunauthanethe hedautheaunau nāsaunau nenethenauau jauaujaunau naenedauchanenee nau nejeesesanenee, hau hadnenadaugauyānau? <sup>18</sup> Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude hese hayāene, nau yese nananene, <sup>19</sup> Nau nananenau hegau hee hāhauwauthēāve: jeneshe waude haudautheaunauau. <sup>20</sup> Nau hanaāegauhāde, nau hanaāedauchaude henesaunaune. Hau hajesejedauchaude, henesaunaune haenauhauvaa, nau haeauwunaunaa, nau haeyeseneegau, nau haeanaethesaunaunagutha, nau haenedana. <sup>21</sup> Nau heau hathāhuk, Nāchau, nananenau nanethenauwau wauchudaude yese hayāene, nau nananene, nau nananenau hegau hāhauwautheneēāve. <sup>22</sup> Hau henesaunaune hathauyaugaune hedautheaunene, Jādee chaunauguuthadee hu, nau hauyauunaa; nau thānauwunaa nechaunathathau hejadena, nau jedauaunena: <sup>23</sup> Nau hadjāthauva hede daun gauchujāde wauuu, nau hadnauauva; nau hadvethenauau, nau hadeaunauwuthajaunauau: <sup>24</sup> Hanau naa nāa nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee: <sup>25</sup> Wauhā vanachauganith heau haenedaune

nauau: nau daunausujaude nau hāayānauusade hedauauwunenau, haenedauwaude haenevau-denene nau haevadaudenene. <sup>26</sup> Nau haedetha hanesānith haunauaheau, nau haenaudedana dusedaudene hathauhuk. <sup>27</sup> Nau haeāedauwunaa, Nananene hahavaa nauusade; nau nananene hāsaunau naunauaude gauchujānith wauuau, hanau daujaesedanaude nanethauaunee. <sup>28</sup> Nau haeasenauna, nau haejejedā: hanaāejenuahenith henesaunaune, nau haedadadasevaa. <sup>29</sup> Nau haeauthananadetha henesaunaune, Naune, nuu hawauthāe jajenee hāenesedaunathadenau, daudause hāhauwujethauwaudaunathe hanāene hanathauchuwuhunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauguu nādaehauhauau: <sup>30</sup> Hau chauchaunu hasenauusade naa hāa, hāgaujauauthedaunādaunau hāheenaededauunau heee henesahehau hesānu, nananene hanadaunaude gauchujānith wauuau. <sup>31</sup> Nau hanaāēdauwunaude, nā, nananene nanethenaedevene, nau vahee henee nāthāenetheyaunau nanehanāhene. <sup>32</sup> Dauudasadee henee haneenesehēe haunauwuthajaude, nau hadneethajaunee: heee naa hahavaa denajaa, nau jaenaedede; nau denaunethauaude, nau jaeveenade.

## 16

<sup>1</sup> Nau hanaāēdauwunaude jea hethau-guhādaunau, hena jasaa haenethauyādā henane, haenethena hadāhevahew; nau haenanene haeauthauwuvaa henee daunethauyādauchudede hevatheyaunau. <sup>2</sup> Nau haedetha, nau

hanaāenedaunaude, Duthanee henee  
 daunedaunathane nananene? nayāde  
 hādāhevadenau hanau nananene hadne-  
 hauwuguthadāheva. <sup>3</sup> Hadāhevāhe, Hewauau  
 hauaudnesedaunaune? hasethaujauhuk,  
 hanau navahadāhewaunāde haedanauwunānau  
 nadadāhewau: hajeneenauchauhānau;  
 thaununedauwahunenau. <sup>4</sup> Haenauwau  
 hadnesedaunau, henee hāenudanānaune  
 hadāhewaude hadjedanethee hedauauwunenau.  
<sup>5</sup> Hanaāadethaude haunauude hadāhewaunādaune  
 hethāesayānedanauwunādaunene, nau  
 hanaāēdauwunaude nanedauwauaunith,  
 Dauhudauchanau hasayānedanauwunaudenau  
 nananene nadāhewaunāde? <sup>6</sup> Nau hāheyaugaune  
 vadadausauau dejenauhuu javeda. Nau  
 hanaāēdauwunaude Hedanau hauwau-  
 thaunauha, nau janaugu nauhauhaunee,  
 nau hadwauthaunau yauthauyauau.  
<sup>7</sup> Hanaāēdauwunaude jachau, nau dauhu-  
 dauchanau hasayānedayaunau nananene?  
 Nau hanaāēdauwunāde, Vadadausauau  
 dejenauhunee thauauhanewauchuunau. Nau  
 hanaāēdauwunaude, Hedanau hauwauthau-  
 nauha, nau hadwauthaunau nasaudausauau.  
<sup>8</sup> Nau vahadāde haevaveenethedauna  
 janechuvāhenith hadāhevahew, hanau  
 dauhaenauau hasedaude: hanau dāeyaunauauau  
 nuu hathāauauvaa henedaededauenau  
 hāenuu javaānee hesenedāeyaunauau. <sup>9</sup> Nau  
 nananenau hāedauwunathana nesedee nehayau  
 henedaehāvadede heee nethauyādahede  
 hehauwuthade; henee hāejenenaedenā  
 hadeesedanāna nedaujethauujenenaededaune-

nee. <sup>10</sup> Henane henee chaunuvāde heee haugajuhuyāgu haneechuvāde jea vasee: nau henane henee janechuvāde vanehaa hehauwu-uchuvā jea vanasaunee. <sup>11</sup> Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwuu veaunauaude? <sup>12</sup> Nau hith nananena hejchuvahenagu heee henehanahede jasaa henane hanaa hadvenāde nananena henee hanehanahede. <sup>13</sup> Hegau nesethāhe hehauwuneenesedauna hanesenethe hechauhauthethāhehau: jachau hanāsānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwuneenesedaunauva Hejavaneauthau nau nethauyādahehehauau. <sup>14</sup> Nau Nesethajauhuhauau jea, haeveenauwu vāejethā, haenedauwaudauwu vahee nuu hayauhuhau: nau haeauchau-danavanauau. <sup>15</sup> Nau hanaāēdauwunaude nananena nethadee hasehadenā hathaāhethee henanenauau; hau Hejavaneauthau naenauau hadahenau: hanau henee nechauguanavadethee henanedaā newauchanavathee hathaāhenethe Hejavaneauthu. <sup>16</sup> Nanavaavedaunau nau haeyāhehauau haunaude nauuu Jaun: heee hena henajanede Hejavaneauthau deheauthedaunee, nau haunauude henanenauau neheeneethenadethee. <sup>17</sup> Nau hehauwunauthau hejavaa nau vedauauwuu heyauhuāgaune javaānee hanesadee haugajuhuu nanavaavede hadneeyauhuu. <sup>18</sup> Daun hausānaude henene, nau heneyaugu gauchuhunee, wauchudaude-haugauthenenede: nau daun hausāyaune

nanewaude wauchudaude. <sup>19</sup> Hena jasia  
 nethauyāsenane, haeneenu haevajayaunenau  
 nau haegaugunesaunenau, nau haeneechauna  
 hadauchenene: <sup>20</sup> Nau hena jasia nedauwuhu  
 Lazarus haseagu, haesaese hedajanauna  
 haevahaseva, <sup>21</sup> Haevadaugaudaude hee  
 jeyauwaunau nejanesanene hehethee  
 nethauyāsenanene hevethedeaunene: jea  
 hathave haedasaa nau haenenesaudauwu  
 hedaewaunau. <sup>22</sup> Nau hethauwu, henee  
 nedauwuhu haenaja, nau haenauaunehauhaa  
 hautheaunau yese Abraham haenedauguva:  
 nethauyāsenane jea haenaje, nau haenanau;  
<sup>23</sup> Nau hadaueveeyaunee haeejenāauguau,  
 haeadauwuthajau, nau haenauhauva Abraham  
 vavāaune, nau Lazarus haenedauguvane.  
<sup>24</sup> Nau haeneduva nau hathauhuk, Nāchau  
 Abraham, jeauwunaune, nau jeautheavene  
 Lazarus, henee hadejegunauhade naunauchuu  
 hejadena najee, nau hadedauyauvanauau  
 nāthaune; hanau nananenau hanavachuunau  
 nuu hesedaa. <sup>25</sup> Hau Abraham hahagu,  
 Nā, hāenau henee nananene deenaedene  
 neesedanauwu neethadee hayauhuhau, nau  
 neesaunee Lazarus neewausaunee hayauhuhau,  
 hau hewaunehaa hauwauthenaedede, hau  
 nananene naunauchauthenaedene. <sup>26</sup> Nau jea  
 vahee nuu, nahethāe nananee nau nananene  
 haneduu vanasauau vanethaunauau janenanee:  
 hadnejenehedechaudene hehethee hede  
 hese nananene hehauwunEAU; daudause  
 hehauwuneejeauchosanauau hadaunee,  
 henee nevadaujauthee hehethee hethaa.



27 Hanaāenehethaude, Vanevethedaunathane hena heee, Nāchau, henee nananene hadejejenanaude nāsaunau hedauauwuu:  
 28 Hanau yaunauthaunethee nauhauwauauau henee hadeāedauwunaude, jea havajaunenau nuu haduu naunauchauthauau. 29 Abraham hanaāēdauwunaude nanethenauthee Mosaseau nau haeyāhehau; jaathehaunauha. 30 Nau, hegau, nāchau Abraham: hau hith hanesāde jaeyehauhuk hehethee degaujauaudāde, haunaunaunevethajuthee, hathāhuk. 31 Nau hanaāēdauwunāde, Hith jenedaunauhaugaunee Mosaseau nau haeyāhehau, daudause hāhauwuneeadauwaunauau, daudause hanesāhenethe jaegauhāyaugaunee hehethee degaujauaudāhenith.

## 17

1 Hanaāēdauwunaude hethauguhādaunau, Hāhauwuneene hau henee dauusenadenau hadnauauchuu: hau naunauthauau hadnauauchaudaude daunjaunaude.  
 2 Hanāneene henee thauayānauunaugane henauānauyaugu, nau seāguthadagu hadaje, hauhanāheejegaudavāhenethe henee haneedauusenethe jachau nuu hajasēdāeyaunauau. 3 Haunauyauhaudauwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva. 4 Nau hith wauwauchuhānagu nesaudauchu hajesesenenee, nau nesaudauchu hajesesenenee naujaeyethaagudaunānagu, haunaunaunevethajaunau, hethānagu: nananena hadjaegudanauwunauva. 5 Nau vadauhanauau,

Vahadāhene, hethedaunanauwunāa hede-  
 thauwaudaudenede, hathauhaugaunee. <sup>6</sup> Nau  
 Vahadāhenith hathāhaugaunee, Hith nananena  
 hethauwaudauwunagu hethāee hethāuu  
 mausdaude jenayaunau, nananena hanāna nuu  
 segaumau hunauhaudene, Hanāgauchauhana  
 hethājee, nau hanājenanauna hadajee; nau  
 hanāthauwaudaunāna. <sup>7</sup> Hau hanaa nananena,  
 hanāwauwaunavede hanāthauauauwujethānith  
 wauāthe hananajauānith, hanāthauna  
 waunee hāenauusathe hehethēe nauau,  
 Najese nau hadjanaugu nau hadvethe?  
<sup>8</sup> Hau hanājenaasenehethauna, Hesetheva  
 nayaudenee hadnevethēhenau, nau duujehe  
 nehayau, nau hadjeenechaudaune haunaude  
 hesevethēhenaugu nau hesaveyānaugu; nau  
 heauhauwune jenaevethēhene nau hadevaveyā?  
<sup>9</sup> Gauhadvaveene henee wauwau hanau  
 dauhunaasedaude henee hanasenehethāthe?  
 Haunauchāe hegau. <sup>10</sup> Naathahena, hāene  
 nananena vahesedaunagu hena hayauhuhau  
 hathauchuwuhana, Hāhauwuneejavaājasethānau  
 wauwaunauau; vavade nanesedaunauau  
 hadnesedaunuu, hadeva. <sup>11</sup> Nau hethauwuu,  
 daunausuyehaude Dādaunedan, haehedesa  
 nahethāe Samaria nau Gananee. <sup>12</sup> Nau  
 hāewaudasade jasaa hauauwudan, haenuchaunaa  
 vadadauchu henanenau haenaujaune hedau-  
 gauwudaunenau, haetheaugunenau vavāaune:  
<sup>13</sup> Nau haeneduvanauau, nau hanaāenehethauthee,  
 Hejavaneauthusau, Hecauhauthethāhe,\*  
 jeauwunauāa. <sup>14</sup> Nau hāenauhauwaude

\* **17:13** Missing “h” in “Hec(h)auhauthethāhe” (“Master”).

hanaāēdauwunaude, Waunenauhauthehaa  
 hadanayaunenau vevethahevahehauau. Nau  
 hethauwuu, henee daunsausyehauthee,  
 haejegaudauvāhenauau. <sup>15</sup> Nau hanesāde,  
 hāenauhaudauau henee dauunayauhade,  
 haejaaagu, nau haevasenehe dauvaveenetheda-  
 naude Hejavaneauthu, <sup>16</sup> Nau haeuāneseve  
 heauthene, haevaveenethedauna: nau hae-  
 naadāde Samaritan. <sup>17</sup> Nau Hejavaneauthusaun  
 haeauchuhananadethā, gaujenayauhaunauau  
 vadadauchu? hau daude theaudachu?  
<sup>18</sup> Hajenauhauvathee hajejaeyehauthee  
 hadvaveenethedaunauthee Hejavaneauthu,  
 vavade naa henewauuhu. <sup>19</sup> Nau haeēdauwuna,  
 Gauhā, najesa: nananene hadethauwaudaude  
 henayauhāne. <sup>20</sup> Nau hāenaudeaunāde  
 Nesethajauhuhau, daun henajanedauene  
 Hejavaneauthu hadneenauauchaunee,  
 Haeēdauwuna, Henajanede Hejavaneauthau had-  
 nehauwunauauchaune nausujauwuwuhadagu:  
<sup>21</sup> Daudause hehedauneagu, Nauhaudauwuu  
 hede, wauāthe, nauhaudauwuu hena, hanau,  
 naune, henajanede Hejavaneauthau thanāsadena,  
<sup>22</sup> Nau hanaāēdauwunaude hethauguhādaunau,  
 Hese hadnauaichuu, hāene nananena  
 vadaunauhaudauwunā jasae hese Heau  
 henane, nau hadnehauwunauhaudava. <sup>23</sup> Nau  
 hadnanethāna, Nauhaudau hede; wauāthe  
 nauhaudau hena; jevayehauau, wauāthe  
 jevathaughaa, <sup>24</sup> Waude hasauau jahagude,  
 henee naunauasānauuu hehethēe naugauthanee  
 naugauauwuu hejavaa neenauasādaa jasaa  
 naugauthanee naugauauwuu hejavaa;

hadnaasauau jea Heau henane hadnaasaunee hedeseve. <sup>25</sup> Hau nedauau hadnanasenedauau wauthanee, nau hadnausāguthade nuu henaedede. <sup>26</sup> Nau waudeneesaunee deenaedede Noe, hadnaasaunee jea hedeseve Heau henane. <sup>27</sup> Neauwauthethehedaune, neauwauthevaveyaudenee, neauwauthenenedaunee, neenenehathee, haunaude nauuu henee Noe dejedāde havathee thewaunaa, nau haenaāenanadauwauau, nau haenauauhā vahee. <sup>28</sup> Waudenaasauau jea deenaedede Lot; neauwauthethehedaunee, neauwauthevaveyaudenee, neauwauthaudaunaudenee, neheaudaunaudenee hayauhuhau, neauwauthenayaudenee, neauauvadenee; <sup>29</sup> Hau hajesesenenee henee Lot haenaude Sodom haesedanausaude nau haegauhauchanauauhauunauganaau hehethee hejavaa, nau haenauauhā vahee. <sup>30</sup> Hadnaasauau hese hāene Heau henane hāenauhauthethāthe. <sup>31</sup> Henee hese, hānedauthe dasee hauauwuu, nau hevatheyaunau jedauwuu hauauwuu, nanehajejeauwusade hadejedanaau: nau henee hanedaude nauau, nanehajejeajeaude. <sup>32</sup> Dauyuwuu Lot henene. <sup>33</sup> Daun vanadaunayaude hedenaedede hadnanadede; nau daun hadnanadede hedenaedede hadnenayaude. <sup>34</sup> Nananenau nāedauwunathana, henee veeyaugu hadnesethee henanenauau hanesadenee hauau; hanesāde hadnedanade, nau jasaa hadnathauaude, <sup>35</sup> Hanesethee hesānauau hadthauayāthee wauhaunee; hanesāde hadnedanade, nau jasaa hadnathauaude. <sup>36</sup> Hanesethee henanenauau hadnedauthee nauau; hanesāde

hadnedanade nau jasaa hadnathauaude.  
<sup>37</sup> Nau haeauuhananadethanauau, Daude,  
 Vahadāhene? Nau haeāedauwunā haduu  
 vadanayau, hanaadauhauāneauhuthee  
 neahehauau hauānee.

## 18

<sup>1</sup> Nau haeanaadetha hauthaunauhānee nuu  
 heee, hena henane hāvachudajauaunevevetha,  
 nau hājethauujesevenauau; <sup>2</sup> Hahagu haeanedau  
 hedan hauchuwunane, haejesa Hejavaneauthu,  
 daudause hathauwunanenau: <sup>3</sup> Nau haeanedau  
 henevesā hena hedan; nau haejeedasa, Jeaugau-  
 nayewhu naujauthavaa, hathauhuk. <sup>4</sup> Nau hae-  
 jevadaunaasedau: hau waunee hasethajauhuk,  
 hewauāthe nejechauau Hejavaneauthau, nau  
 hathauwunanenau; <sup>5</sup> Hau nausunee hanau naa  
 henevesā hajanauchuhānau, hadenayauhauau  
 havaedajauaunejau navanadauchuhaa. <sup>6</sup> Nau  
 Vahadāde hasenehehuk, Jaathehaa hasenehede  
 janechuvāhede hauchuwunane. <sup>7</sup> Nau  
 gauhujavaneauthau gauhadnenayauha nehayau  
 hanayāsanaunau, hauwauaudaunādaunau  
 hesee nau dajāee, hau negudauchuhaude?  
<sup>8</sup> Nananenau nananena nāedauwunathana henee  
 hadnauchuhanenayauhaude, Hau hāejauthe  
 Heau henane, gauhadveede hethauwaudaude  
 nuu hathāauauvaa. <sup>9</sup> Nau haeauthaunanadetha  
 jachau nethauwaudaunadenethe nehayau henee  
 dauchuvahethee, nau newauchānauwauthee  
 hauthauau: <sup>10</sup> Hanesethee henanenauau  
 haeyehaunauau vevethahenauauwuu  
 hadvevethahethee; hanesāde Nesethajuhu,  
 nau jasaa hauāyāhe. <sup>11</sup> Nesethajuhu

haetheaugu nau haevevetha waude heee  
 nehayau, Hejavaneauthau, nananenau  
 vaveenethedaunathane, henee nāhauwunaathā  
 hauthauau henanenauau hathahethee,  
 hedanauwuyāhehauau, janechuvahethee,  
 jatheaudauwuyāhehauau, daudause naa hathāde  
 hauāyāhe. <sup>12</sup> Nananenau nenaugauyānau  
 nese hanesadee hauchauvadede, Nevānau  
 vadadauchu vahee henee nāthāenetheyaunau.  
<sup>13</sup> Nau hauāyāhe haetheaugu vavāaune, daudause  
 haejejenāauguau hejavaa, hau haeanadesejāhede,  
 Hejavaneauthau jeauwunaune wauchudaunau,  
 hathauhuk. <sup>14</sup> Nananenau nāedauwunathana,  
 naa henane haejaeyehau hedauauwuu  
 haeauwunaunau haejavaāhe jachau: hanau  
 dathājee hanesāde henee nevadaujavaānajanethee  
 nehayau hadnauwujenanade; nau henee  
 nenehanethaunadede hadnejanade. <sup>15</sup> Nau  
 haejādaunanauau jea hajasedāeyaunauau,  
 hadnevasanaude; hau hāenauhaudauwunethe  
 hethauguhādaunau, haeneneuvanauau. <sup>16</sup> Hau  
 Hejavaneauthusau haeadetha, nau hahagu,  
 Nanehajauthee hajasedāeyaunauauau, nau je-  
 vadauduvaa: naathāhenethe henehanahedaunau  
 henajanede Hejavaneauthau. <sup>17</sup> Hethauwuu  
 nāedauwunathana, Daun hadjesedanauau hena-  
 janedaunene Hejavaneauthu hasenaedenethe  
 hajasedāeyaunauau hadnehauwuneejedā. <sup>18</sup> Nau  
 jachau hauchuwunanene haenaudedaunaa,  
 Hethāhene Hechauhauthethāhe, nauddusedau  
 hadnedanauwau jethauujenenaedede?

hathauhuk. 19 Nau Hejavaneauthsaun\* haeēedauwunaa, Naudu hethāde haesene? henaneda hehauwuthā, vavade hanesāde, nananede, Hejavaneauthau. 20 Nananene hae-nauwu nanavaavedaunau, Jevawauchudauau heee haugauthenenede, Jevanaa, Jevaaveda, Jevajayaudauwāedauwauthadee, Vechauchune nananene hāsaunau nau hānau. 21 Nau hanaāenehede, Vahee nuu haunaunedenau heee daujeeseaunau. 22 Wauhā Hejavaneauthusau hāenedauwaudauau nuu, Hanaāēdauwunaude, Hanesadee hāhauwusenethene: Vaheaudauna henee hāthāenetheyaunau, nau hadjaanauwunaunauau hadavenuhuhauau, nau nananene hadnethenauwu haenathau hejavaa, nau hadejau hadjethaugu. 23 Nau hāenedauwaudauau nuu, haeaudauwuthajau: hanau deethauwunethauyā dāde. 24 Nau Hejavaneauthausaun hāenauhauwunith henee dauaudauwuthajaude, Duthāenanauthaune henee nanethenuu veaunauaude hadnesejedāthee henajanedanene Hejavaneauthu, hathauhuk. 25 Hanau hehauwujajathaune heee camel hehedesahagaunee hajasevāhau nedaudaunaudenee, javaāneenauthaunee nethauyāsenane hadnesejedāde henajanedanene Hejavaneauthu. 26 Nau hathāenedauwauduu, Hanaa hadnenanedanede? hahagaunee. 27 Nau hanaāenehenith, hayauhuhau hejethau-uneethaunenau henanenauau neneededede Hejavaneauthau. 28 Hanaāenehede Peda, Naune,

---

\* **18:19** Missing letter “u” in “Hejavaneauth(u)saun”, which often appears (as does “Hejavaneauthusau”) where we would find the name “Jesus” in the KJV.

naunaudauwunauau vahee, nau thaunau-  
 guhane. <sup>29</sup> Nau haeāedauwuna, Hethauwuu  
 nāedauwunathana, hena haunauude henane henee  
 hehauwunaude hedauauwuu, wauāthe henehā,  
 wauāthe henauhauwauau, wauāthe henene  
 wauāthe henesaunau, heee henajanaunene  
 Hejavaneauthu hedenaededaunene, <sup>30</sup> Nananede  
 hadjavaānesedanauau nuu hewaunehaa, nau  
 hathāauauvaa hadnauusanauau henaedede  
 hadnejethauuvadauauau. <sup>31</sup> Hanaāedanaude  
 nesenee, nau hanaāedauwunaude, Naune,  
 hadneyehaunauau Dādaunedan, nau vahee  
 hayauhuhau hathāewauthaunauhuu haeyāhehauau  
 heee Heau henane hethauwunauauchauau.  
<sup>32</sup> Hanau hadvenavathe Neauthu, nau had-  
 vavavanauchuhāde, nau hadnaunaunauchau-  
 dauchuhāde, nau hadneguthahayauthāde. <sup>33</sup> Nau  
 hadnenesegauhude, nau hadnaāde: nau nasese  
 hadnaājeagauhāde. <sup>34</sup> Nau haejaenauwu nuu:  
 nau nuu hauthedau haeyaudaunaunauau,  
 daudause haejaenauwu hathauthedaunāthee.  
<sup>35</sup> Nau hethauwuu, hāayāedadauau Jericho,  
 jasaa haenanenaugu henane haetheaugu  
 nedechaudenenee dauhunedauwaude:  
<sup>36</sup> Nau haenedauwaude henanedanede  
 dadavechaudenenee, haenaudedauva  
 haesedaudenenee. <sup>37</sup> Nau haeāedauwunau,  
 henee Jesus Nazareth hanehedesade. <sup>38</sup> Nau  
 hanaāevasanadede, Hejavaneauthusau, nananene  
 Heau David, jeauwunaune, hathauhuk. <sup>39</sup> Nau  
 henee nanedauvathee haeneneuvanauau  
 haddādaunaugunith: hau haevasanade haugauthe,  
 Nananene Heau David, jeauwunaune.  
<sup>40</sup> Nau Hejavaneauthusau haedauusa, nau



haeautheave hadjādaunade: nau hāayājenuusanith,  
 haenaudeauna, <sup>41</sup> Hauddusehathe henee  
 hadenaasehathane? hathauhuk. Nau  
 hanaāēdauwunaude, Vahadāhene, nanaa  
 hadeesedanauwau nauhaudauwaude.  
<sup>42</sup> Nau Hejavaneauthusau haenehetha,  
 hanesedanauwu nananene nauhaudauwaude:  
 hadethauwaudaude henayauhāne. <sup>43</sup> Nau  
 chauchaunu haeesedane henauhaudauwaude,  
 nau haethauguha, haevaveenethedauna  
 Hejavaneauthu: nau vahee henanedanede,  
 hāenauhauduu, haevaveenethedaunanauau  
 Hejavaneauthu.

## 19

<sup>1</sup> Nau Hejavaneauthusau haewaudasa nau  
 haechaugusa Jericho. <sup>2</sup> Nau, naune, haenedau  
 henane Zacchaeus haseagu, haenajawauna  
 hauāyāhehau, nau haeveaunauau. <sup>3</sup> Nau  
 haeneenavadaunauhauva Hejavaneauthusaun  
 haedāhenethe; nau haejeneene daunau-  
 thethenadedaunenee, heee daujaahede. <sup>4</sup> Nau  
 haesayāgau, nau haenauauhu sycamore  
 hunauhaudee hadnauhauwaude: hanau  
 hadnehedesanith. <sup>5</sup> Nau Hejavaneauthusau  
 hāejeedadauau, haejeaāne, nau haenauhauva,  
 nau hathauhuk, Zacchaeus, nauhauhuhu, nau  
 jeauwusa, hanau nuu desenee hadnanedaunau  
 haudauauwuu. <sup>6</sup> Nau haenauhauhu,  
 nau haejeauwusa, nau haedasa nauguu  
 neethajaude. <sup>7</sup> Nau hāenauhauvāhede, vahee  
 haeneānaune, Henee hadneejādavenethe henanene  
 henee wauwauchudauhu, hathāhuk. <sup>8</sup> Nau  
 Zacchaeus haetheaugu, nau haeāedauwuna

Vahadāhenith; Naune, Vahadāhene, vayaugauuu naudaununaunau vanenu hadavenuhuhanau; nau hith hedanavanaugu hayewhu hehethee daun henane hanājayaudauvāedauwauthauau, hanājavaāvenauau yāyaunanee. <sup>9</sup> Nau Hejavaneauthusaun haeāedauwunaa, Nuu desenee henayauthāhe hedadauau nuu hauauwuu, hanau nechau haneāvāde Abrahamvene. <sup>10</sup> Hanau Heau henane nauusade hadnaudethāde nau hadnenayauhaude daun naunethauaunith. <sup>11</sup> Nau hajesenedauwauduu nuu hayauhuhau, haeethedaunane nau haeauthaunauhānanadetha, hanau dauhuauchauau wauwu Dādaunedan, nau hanau daunauanaduu henee hena-janedaunene Hejavaneauthu chauchaunu wauauhaadenauhauwu. <sup>12</sup> Hanaāenehede henahēee, Jasaa naja haehau vavāaune vedauauwuu hadnesedanauau heee nehayau najanede, nau hadjaejaude. <sup>13</sup> Nau haeadetha vadadauchu hewauwaunauwau, nau haejaanauwuna vadadausauna vāejethā, nau haeāedauwuna, Hadeaudaunava haunaude jaenauusanaugu. <sup>14</sup> Hau hauauwunanenau haeasānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk. <sup>15</sup> Nau hethauwuu, henee hāejaenauusade, haeesedane najanede, hanaāauchuwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchujavaājasedethe heee hedaudaunaunau. <sup>16</sup> Hanaāejenauusade nanedauvade, Vahadāhene, havāejethāwau javaājasedede vadadausauna vāejethā, hathāhuk. <sup>17</sup> Nau hanaāāedauwunaude,

Hethadee, nananene hethāhene wauwau; hanau nananene nethauwaudauwu hee naugajuhuhu hadnajawaudauwu vadadausauna hedan. <sup>18</sup> Nau naneseauwaude haejenauusa, Vahadāhene, havāejethāwau javaājasedethee yauthauyauna vāejethā, hathāhuk. <sup>19</sup> Nau vavade hanaasenehethaude, Hadnehanāhene yauthauyauna hedan jea. <sup>20</sup> Nau jasaa haejenauusa, Vahadāhene, Naune, heyewnau havāejethāwau, neaunaunedenau nejenanauwau hāheāhauna, hathāhuk: <sup>21</sup> Hee dauhusathane, hanau nananene daugaugaunauuwunanenene: nananene hedanau henee hājejenayaunau, nau hadegauuchu henee hājejenayaunau. <sup>22</sup> Nau haeāedauwuna, hehethee nehayau hadēnaa hadauchuwhathane, nananene hauhauganene wauwau. Haenauwu henee daugaugaunauuwunanenēnau, hedanauwau henee nājejenayaunau, nau hadgauuchauwau henee nājejenayaunau: <sup>23</sup> Naudu gauhājevā navāejethāwau nedauhaenaeevāejethā, henee hājejenaususanaune hadeesedanauwau nehayau javaānee? <sup>24</sup> Nau haeāedauwuna henee dauthetheaugunethe, Hedanauwunaa vāejethā, nau hadevenau henee vadadauchuvāejethāvade. <sup>25</sup> (Nau hathāhuk, Vahadāhene, nanethenauau vadadauchuvāejethā.) <sup>26</sup> Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henetheyaunau hadnedanauwunade. <sup>27</sup> Hau hena naujauthauwau, henee najevadaunajawaunaunau, hadjāthauva hede, nau hadnaunauauva hathāājenau.

28 Nau hāesanāsenehede nuu, haenedauva, haenauauhuyehaunauau Dādaunedan. 29 Nau hethauwuu, hāayānauusade Bethphage nau Bethany, haua Olives haseāgu, Haesayānautheava hanesenethe hethauguhādaunau. 30 Najesaa nananena hesee hajasee hauauwudan hathaāsana, hathauhuk; nanaa waudasanagu hadveehauna dātheveehauchavesau hadduguhude, hehauwuthauune henane dachaugu: hadaugunauva, nau hadjāchaudauneva hede, hathauhuk. 31 Nau hith daun henane naudedauānagu, Naudu hauaugunauna hethānagu? hesau jenaasenehethauna, hanau Vahadāde haddaununaude. 32 Nau henee hautheavathee hanaāejathāauthee, nau haeveehanauau neesenehethaude. 33 Nau daunausunaugunauthee dātheveehauchavesaune, hedaunenith, Naudu haaugunauna dātheveehauchavesau? hathāhaugaunee, 34 Nau hanaāēdauwunauthee, Vahadāde haddaununaude. 35 Nau haenauuchaudaunanauau Hejavaneauthusaun: nau haedadasanauwunanauau hedāchaunenau dasee dātheveehauchavesaun, nau haeaugaugunaunanauau Hejavaneauthusaun dasee. 36 Nau daunausuyehaude, haesasaanauwu hedāchaunenau vaunaa. 37 Nau hāayānauusade, wauwu haeauwusa hauanee Olives, haunauude hadauchude hethauguhādaunau hanaāaunauwuthajauthee nau hae-vaveenethedaunanauau Hejavaneauthu nauguu haevasānadedauune heee vahee hathāenauthaunee henesethaunene henee henauhauthaunenau; 38 Haunauwuthajauau Naja henee jaunau haneeseede Vahadāhenith: danādayauau

hejavaa, nau vaveenethedauwuu javaājauudaa,  
 hāheagu. <sup>39</sup> Nau hauthauau Nesethajauhuhau  
 hehethee henaneda, Hechauhauthethāhe,  
 neuwune hāthauguhādaunauau, hathāhuk. <sup>40</sup> Nau  
 haeauchuhanāedauwuna nau hasenehethauhuk,  
 Nananenau nāedauwunathana henee, hith nuu  
 dādaunaugagaunee, hauunauganauau chauchaunu  
 hadneduhuthee. <sup>41</sup> Hau hāyānauusade,  
 hāenauhauauau hedan, nau haevewau,  
<sup>42</sup> Hanaāenehede, hith heaenauwunagu, ha  
 nananene, ha nuu hadeseve, hayauhuhau  
 naathuu hadādaunahedaunaa, hau hewaunehaa  
 yaunaudaunane hasesāe. <sup>43</sup> Hanau hese  
 hadnedasāna henee haujauthauwauau  
 hadnesedethee havat hegauuha heee  
 nananene, nau hadnechauchuaunāna  
 nauanee, nau hadnaunaunehāna daudauna  
 hehethee, <sup>44</sup> Nau hadnanaunauvaenāna, nau  
 hadāeyaunewauau hanedauchaunawaunauau;  
 nau hadnehauwunaudanauwunā hanesāhenith  
 hauunaugane hanathaugunethe; hanau  
 nananene daujaenauwu hāenauujādaunathana.  
<sup>45</sup> Nau hanaāeyehaude vadanedaunauauwuu,  
 nau hanaāenudanaude henee neaudaunanethe  
 jedauwuu, nau henee naudaunanethe;  
<sup>46</sup> Hanaāēdauwunaude, Wauthaunauhuu,  
 Naudauauwuu haneauauwunee hadnevevetha-  
 hedaunee: hau nananena haesedena nedau-  
 naudee heyāenau havedekehauau. <sup>47</sup> Nau haeau-  
 theda hayauwusenenee vadanedaunauauwuu.  
 Hau najanauau vevethahevahehauau nau  
 wauthaunauhāhehauau nau najavahehauau  
 henanedanede haeneenanaudehaa hadnaāde,  
<sup>48</sup> Nau haeeyauhuune nesenehāde hanau

vahee henanedanede haenāedevenenau  
dauhujaathehāde.

## 20

<sup>1</sup> Nau hethauwuu, henee jasaa hena hese, denausunauthedade henanedanede vadanedau-nauauwuu, nau haeauthedaude waunauyaunee hethadenee, najanauau vevethahevahehauau nau wauthaunauhāhehau haedasaa nauguu vachaugananenau, <sup>2</sup> Nau hanaāanadethauthee, Jeauthedaunāa, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede? <sup>3</sup> Nau hanaāauchuhananāedauwunaude, Nechau hadnaudedauunathana hanesadee hayewhu; nau hadjeāedauwuneva: <sup>4</sup> Heedusaayāde Jaun, gauhuhuthaune hejavaa, wauāthe hehethee henanedaa? hathauhuk. <sup>5</sup> Nau haeegaugaugauudenauau, hith hesauhesenehethaunauaugu, hehethee hejavaa; hahagaunee, Naudu haejethauwaudaunauna? hanāthānauau. <sup>6</sup> Hau hethaunauaugu, hehethee henanedaa; Vahee henanedanede hanāedaudauauvānauau hauunaugāe, hanau hethauwaenaunauthee henee Jauneau dauhaeyānith. <sup>7</sup> Nau haeāedauwunanauau, daujeneauthedaunauthee daunathaunee. <sup>8</sup> Nau Hejavaneauthusau hanaāāedauwunaude, Daudause gauhaudnauthedaunathava daun nāenaudahede nāenesedaude nuu hayauhuhau. <sup>9</sup> Hanaāejasesanadedauau henanedanede hee dajenehede; Jasaa henane haejenane dadajenevevesenethauchayau, nau haeethauauauwujethāhehau, nau haejathāau hese vavāaune vedauauwuu haegudaunā.

10 Hāenauauchaunee haeyethautheava wauwaune  
 hesee thauauauwujethāhehau, henee  
 hadjevenāde vevenaundenau hehethee dadajeven-  
 evesenethauchayaunaa: hau haeneneseguhuu,  
 nau haejathethajenāhee jessaa. 11 Nau jea  
 haeyethautheava jachau wauwaune; nau haene-  
 neseguhunauau jea, haedadayānauchuhanauau,  
 nau haejathethajenāhee jessaa. 12 Nau jea  
 haeyethautheave nanaseauwaunee: nau  
 haenasenehanauau jea, nau haenuguthanauau.  
 13 Hanaāenehede hadāhevāhe dadajevenevesaa,  
 Hewauaujeesedaunaune? Hadautheawauau  
 navechauthau nāa: Nauchāe hadenee-  
 hauthee hāenauhauwaunauthe. 14 Hau  
 thauauauwujethāhehauau hāenauhauwauthee,  
 haegaugaugauudenauau, Naa nananede  
 hadvanehanāde: nahājauau hadenauaune,  
 henee headevanehanahedaunau hadene-  
 hanahenauau. 15 Hanaāenuguthauthee  
 dadajevenevesenethauchayaunaa, nau  
 haenaanauau. Haudneduseha hadāhevāhe  
 dadajevenevesenethauchayaunaa? 16 Hadejaude  
 nau hadnauauhaude nuu thauauauwu-  
 jethāhehau, nau hadgauchuhuvāde dada-  
 jevenevesenethauchayau, hathauhuk,  
 Nau hāenedauwauduu, hadnehauwunaasau,  
 hahagaunee. 17 Nau haenāauhauva, nau  
 hanaāēdauwunaude, Dusau nuu henee wau-  
 thaunauhuu, Hauunauganau hauauvāhehauau  
 hausāguthaunenau, hanānanenith hāhe hanadāde  
 nedautheaunee? 18 Daun janesee dasee nuu  
 hauunaugane hadthauusee, hau dasejaneseagu  
 hanānauchauwuthauathāaunaude. 19 Nau najanauau  
 vevethahehehauau nau wauthaunauhāhehauau

chauchaunu haegaugauanavanauau hadneseda-  
 nauthee; nau haedauwu henanedanede hee  
 dauhāenuu henee dauhuanadede nuu dajenehede  
 hee. <sup>20</sup> Nau haeaunauyauhauvanauau, nau  
 haeautheavanauau haunauyauhauthāhehau,  
 hadnanadaunethānethe hadchuvāhevathe  
 henanenau, henee hadnesedanauwunethe  
 hedanadedauau, henee hadenauuchaudau-  
 nauthee hejadenenau nau naunaudāhenethe  
 hauchuwunanene. <sup>21</sup> Nau haenaunaudedau-  
 nanauau, Hechauhauthethāhe, haenaunee henee  
 hasenehenaune nau nethauwuchauhauthethāne,  
 daudause hāhauwujāvedaugauhauwanauau  
 henanedanauau hegau, hau hanechauhau-  
 thethāne hese Hejavaneauthuu hethauwuu:  
<sup>22</sup> Gaunaasauau hee nananee hadnevenade  
 hauāyaunau Caesar, gauwauāthe hegau? <sup>23</sup> Hau  
 haeaenauwu henadaunedaunenau, nau  
 hanaāēdauwunaude, Naudu haevadauvasehena?  
<sup>24</sup> Jenauhauthehee vāejethāe. Hanaa  
 hewauthaunenauaudene, nau hanaa hewau-  
 thaunauhanede? Haeauchuhanāedauwunanauau,  
 Caesar. <sup>25</sup> Nau hanaāēdauwunaude,  
 Jauaunaudaunaa hee Caesar hayauhuhau  
 henetheyaunau Caesar, nau Hejavaneauthau  
 hayauhuhau henetheyaunau Hejavaneauthau.  
<sup>26</sup> Nau haejeneesedanauwu hedanadedauunene  
 hathaājedaunene henanedanede: nau haegaugau-  
 anadauwu hedauchuhanehedauunene, nau  
 hanaāēdādaunauguthee. <sup>27</sup> Hanaāejeedauchauthee  
 jasae Sadducees, hayāthajauhuhau henee  
 hadjejaegauhadenene: nau haenaudedau-  
 nanauau, <sup>28</sup> Hechauhauthethāhe, Moses  
 hathauthaunauwunānauau, Hith daun henane



henauhauwauau gaujauaudāheyaugaune,  
 heneneyaugaune, nau gaujauaudāheyaugaune  
 jedāeyauneveyaugaune, henee henauhauwauau  
 hanādanaude henenene, nau hanānesaunede  
 heee henauhauwauau, hathauhaugaunee.  
<sup>29</sup> Hena heee haenesaudauchunauau  
 henahavaevadehehauau: nau jasaa nedauau  
 haenenene, nau haenaja haejedāeyauneve.  
<sup>30</sup> Nau naneseauwaude haeneva, nau haenaja  
 haejedāeyauneve. <sup>31</sup> Nau naneseauwaude  
 haeneva; nau vavade hanaasene nane-  
 saudauchauwaude jea, nau haejenauthanauau  
 dāeyaunauau, nau haegaujauaudāhenauau.  
<sup>32</sup> Waunee vahee hesā haegaujauaudā jea.  
<sup>33</sup> Henaheee jaegauhadeneyāgu hanaane  
 hadnevādaune? heee hanesaudauchunethe  
 daunevāde. <sup>34</sup> Nau Hejavaneathusau  
 haeauchuhanāedauwuna, dāeyaunauauau  
 nuu hathāauauvaa nenevadedadaunee, nau  
 nenenehaudenee: <sup>35</sup> Hau daun naunauguathee  
 hadnenaededuu hena henaedede, nau  
 jaegauhadeneagu hehethee gaujauaudahede,  
 hadnehauwunevadedadaune, hegau hadnenene-  
 hadedaune: <sup>36</sup> Daudause hadnehauwauthena-  
 jadene: hadnaathahedaunee hautheaunauau;  
 nau hadnensesaunevāthee Hejavaneauthu,  
 naathedāeyaunenedaunee jaegauhade. <sup>37</sup> Wauhā  
 henee gaujauaudahehehauau hadjaegauhāthee,  
 Moses denauhauthehade jauauadee, deadethāde  
 Vahadāhenith Hejavaneauthu Abraham, nau  
 Hejavaneauthu Isaac, nau Hejavaneauthu Jacob.  
<sup>38</sup> Hehauwuujavaneauthune heyauhaudade, hau  
 henaedede: hanau vahee haneenaededaune-

nee. <sup>39</sup> Hanaāene jasaa wauthaunauhāhe  
 haeauchuhananadetha, Hechauhauthethāhe.  
 Nananene hethade hasenehene. <sup>40</sup> Nau  
 heee haejauthenaudedauanauau. <sup>41</sup> Nau  
 hanaāēdauwunaude, Naudu haena hanee  
 Chris Dāvid\* dauhuāwaude? <sup>42</sup> Nau Dāvid  
 nehayau hasenehede wauthaunauhanaa  
 Psalms,† Vahadāde hasenehethaude Nava-  
 hadāhewaunādaune, Hadjejanaugudaune  
 hejavesanee, <sup>43</sup> Haunaude nadeesehaunauau  
 haujauthauwauau hadnedaugāaugunene. <sup>44</sup> Dāvid  
 henaheee haeheenesea Vahadāhenith, dusee  
 heau? <sup>45</sup> Nau vahee henanedanede haenedaunau  
 hanaāēdauwunaude hethauguhādaunau,  
<sup>46</sup> Waudauau wauthaunauhāhehauau,  
 neneanaduu javesanee sauauausāchaude,  
 nau vechauduu jachauthadede nedauaudau-  
 nauvadedauunene, nau najatheaugudaunau  
 vevethahenauauwuu, nau najanau nedau-  
 gunethe vanethehedaunene; <sup>47</sup> Naudauvāe  
 henevesānau hedauauwunene, nau hanau  
 denauhauthethāthee deguthevevethahethee:  
 hadnathee hanesedanuu vanasaunee  
 gudanadede.

## 21

<sup>1</sup> Nau haejaāne, nau haenauhauvā  
 nethauyāsenanene haejenanauwu hevaudenenu

---

\* **20:41** “Dāvid” is spelt thus here and in two other places nearby, 20:42 and 20:44. The name is spelt “David” in its other ten appearances in the text. (See note for 13:16.) † **20:42** “Psalms” is capitalized here but not in 24:44, but both are almost certainly deliberate. As per the KJV, “Psalms” in 20:42 is the name of a book in the Bible, but in 24:44 the common noun “psalms” is meant.

haenathaunaa. <sup>2</sup> Nau haenauhauva jea jachau hadavenuhu henevesāne haethāgudene hanesāene nevaāhenee vāejethāau. <sup>3</sup> Nau hanaāenehede, hethauwuu nananenau nāedauwunathana henee naa hadavenuhunede henevesā javaājenanauau vahee; <sup>4</sup> Hanau vahee nuu nanethauyādahethee dejenanuu dejenanauwunauthēe Hejavaneathu: hau hadavenuhunede hajanauau vahee heenaededaunau hathāenethenauau. <sup>5</sup> Nau haehegaugaugauudenauau vadannauauwuu, haseneehenee nauguu hethāhenethe hau-nauganau nau hausāyaunau, hanaāenehede, <sup>6</sup> Nuū hayauhuhau hānauhauthaunenau, heseē hadnauauchuu, hadnehauwunathauau hanesāde hauunauga hanathaugude hadvajanesee. <sup>7</sup> Nau hanaāenaudedauwunauthēe, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauauchuu? hathauhaugaanee. <sup>8</sup> Nau hanaāenehede, haunauyauhau dauwauau henee nananena hadejenanedaunehana: hanau hadnewauthathee hadjauthee Naneseedaunaa, Hanejavaneauthusaunenenu, hadnethee; nau hayānauauchauau: jevathauguhaa. <sup>9</sup> Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauunauauchuu; hau hadneevadauauau hadguthauau. <sup>10</sup> Hanaāēdauwunaude, jajaesenanedanedede hadnevauthadee jajaesenantedaa, nau najanede hadnevaudauau najanede: <sup>11</sup> Nau hadnavathethauthauwunauauau vedauauawuu, nau hasenaude, nau havathaugauwude, nau

naunaunauchaudauhauthaude nau hadvasauau  
 naunauhauwuu hadnauauchauau hehethee  
 hejavaa. <sup>12</sup> Hau hadnejesejenauauchuu vahee  
 nuu, hadnedanāna, nau hadnaunaunauchau-  
 thehāna, nau hadnevaudenee nananena  
 hauāchaude, nau duguhunauauwuu, nau had-  
 nenauchauhana hathaājethee nenauchuwuthee  
 nau hauchuwunanenauau hanau Naneseede  
 heee. <sup>13</sup> Nau hadnaasejenanauwunana  
 heee haenathau. <sup>14</sup> Hāenauwuu heeehena  
 nananena hadahenauau, jevagaugauuthajauau  
 nedauau daun hadnesenehena: <sup>15</sup> Hanau  
 hadvenathana vade nau haeyaude, vahee  
 hasānavādaunenau hadnehauwuneayādaunāva  
 hegau hayethaagudaunādaunenau. <sup>16</sup> Nau nana-  
 nena hadnavethevāthee nesauuu hanehānenau,  
 nau hāthesaunenau, nau hādaunānenau, nau  
 hādaehahenau; nau jasae nanaena hadneenaana.  
<sup>17</sup> Nau hadneevahasānavāhena vahee henaneda  
 hanau naneseede heee. <sup>18</sup> Hau hegau hāthaanenau  
 haudauguhuanenauau hadnehauwugau-  
 jauaudāhenaunau. <sup>19</sup> Hanāedevedaunenau  
 hadnaunaunehaudde havadathuwunau.  
<sup>20</sup> Nau hāenauhaudauwunā Dādaunedan  
 hadnechauchuaunāna vanenanenauau,  
 nanehāenauwuna henee nauauhadede wauwu  
 hadneaadaa, <sup>21</sup> Nanehadaugauhuthee hese  
 hauanee hathāanedauthee Judaea; nau henee  
 hathāanedauthee nahethāe nanehanauhuthee;  
 nau jevajejedānauha henee hathāanedauthee  
 gauchuhunee vedauauwuu. <sup>22</sup> Hanau nuu hese  
 hadneauthedaudenee henee vahee hayauhuhau  
 hathāewauthaunauhuu hadnethauwunaasauau.  
<sup>23</sup> Hau naunauthaunee hadnethauauvāhethee  
 hathāenesaunethee, nau hathāeneauhuhuthee

hena hesee, hanau hena hadnavathasenaudenee  
 vedauauwuu, nau hasenaunaudaunāhenauau  
 nuu henanedanede. <sup>24</sup> Nau hadneaunathāhethee  
 gaugauthau, nau hadnejathechauhāthee  
 hadwauwaunenethee vahee jajaesenanedanede:  
 nau Dādaunedan hadnauguhethee Neauthu,  
 haunaude Neauthu nauauchaudauhaugaanee.  
<sup>25</sup> Nau hadnauhauthaunee hesesee, nau  
 vegusesee, nau hauthuu; nau nanadee  
 hathāauauvaa hadnaunauādaugauhudaunee  
 jajaesenanedanede, hadnehauwaenauwu;  
 hadaje nau hadnaunaudānaunee; <sup>26</sup> Henanenauau  
 hedahenau hadnadenāthajaunee, nau hanau  
 naunauyauhauduu hena hayauhuhau  
 hadnauauchaunee dasee hathāauauvaa, hanau  
 hathāenauthauau hejavaa hadnauauwunauauau.  
<sup>27</sup> Nau hadnaēenauhauwauna Heau henane  
 hadnenauusade henaunauade nauguu  
 naunauthaunee nau hadnavathenauasāauau.  
<sup>28</sup> Nau hāene nuu hayauhuhau hāenauauchuu,  
 nauhadnaēenaunauānena; nau hadnejenāauguauna  
 heee hadneejaenauthana hadnaēeaudaa. <sup>29</sup> Nau  
 hanaēedadajenehethaude; Nauhauvaa hau-  
 uyauchunauhaude, nau vahee hahaudenauau;  
<sup>30</sup> Hāeguugauāhenauthe, hadnauhauwauna  
 nau hadnaenauwuna nehayau henee veja  
 dauhuaudaa. <sup>31</sup> Hadnaasauau nananena  
 hāenauhauwunā nuu hayauhuhau  
 hadnethauwunaasauau, hāenauwuu henee  
 henajanede Hejavaneauthau haneaudanee.  
<sup>32</sup> Hethauwuu nāedauwunathana, nuu henaedede  
 hadnethauwuvadauau, haunaude vahee  
 hadnethauvāe. <sup>33</sup> Hejavaa nau vedauauwuu  
 hadneyauhuu; hau Nadanadedauau

hadnehauwuthauuyauhuunau. <sup>34</sup> Nau haunauyauhaudauwauau nehayau, naseduhuu daunāene hadahenau havaehayaudenau heee haudauhauganedaunenau, nau havanadenenau, nau haunaunethaunenau nuu henaedede, nau henee hesee hadgauduaunāna hau hadnehauwaenava. <sup>35</sup> Hanau waude nauyaudenau hadnauauchauau vahee hathāetheaugude dasee hathāauauvaa. <sup>36</sup> Haunauyauhaudauwauau henaheee, nau hevevethahee dajauaunee, henee nananena hadeheenauguana hadegauchuhauwuna vahee nuu hayauhuhau henee hadnauauchuu, nau haddetheauguna hathaāhede Heau henane. <sup>37</sup> Nau hesenee haechauhauthethā vadanauauwuu; nau hāeveeyaunee haenauā, nau haeadāne hauanee henee neseeyāgu hauanee Olives. <sup>38</sup> Nau vahee henanedanede haejevanauuchaudene naugusāje daunauganenee hadaude vadannauauwuu, heee dauhujaathehāde.

## 22

<sup>1</sup> Wauhā hadneevasevenee jane-nesaunauchauanauhuu jauaujaunau haeayānauaucha, Hadavechaude neseāgu. <sup>2</sup> Nau najanau vevethahevahehau nau wauthaunauhāhehauau haegaugauanadauwunenau hadnesenaāde; hau haeedauwu henanedanede. <sup>3</sup> Hanaāejedāde Haujau Judas hejaveede Iscariot, haenethanedau vadadauchunesenee. <sup>4</sup> Nau hanaāejathāaude, nau haeanadetha najanau vevethahevahehau nau haunauyauhauthāhehau, hadneseavedaundaunauwaude. <sup>5</sup> Nau

haeneethajaunauau, nau dechauchuwuhadethee hadvenāde vāejethā. <sup>6</sup> Nau haesayānehetha, nau haeaunauyauhaudauwu hadneeneavedaudau-nauwaude henanedanede. <sup>7</sup> Hanaāenauauchauau heseē janenesaunauchauanauhuu jauaujaunau nanaa hadavechauthau hadnāede. <sup>8</sup> Nau hanaāauthewaude Pedaheau nau Jauneau, Najesaa hadesaanudeva hadavechauthadede, hadevethenauau, hathāhaugaanee. <sup>9</sup> Nau hanaāēdauwunauthee, Daudu hadauvathehāne hadnedauusaanuu? <sup>10</sup> Nau hanaāēdauwunaude, Naune, hāejedānā hedan, hena henane hadnuchaunāna, hadnewauunauau hauānau hadjaāsanenee naje; hadethauguhauva hauauwu hadnedaujedāde. <sup>11</sup> Nau hadethauva henane hedauauwunede, Hechauhauthethāhe nejeethāne, daudu jādanauauwu hadnedau- vethenauau hadavechauthadede nauguu nāthauguhādaunauau? <sup>12</sup> Nau hadnauhauthehāna vanasaanee dachauauwu hadnesewaudeanee: hadnesaanuhuu. <sup>13</sup> Nau hanaāeyehauthee, nau haeveedenauau neethāedauwunaude: nau hanaāesaaudethee hadavechauthadede. <sup>14</sup> Nau hāenauauchaanee, hanaāejanaugude nauguu vadadauchuneseneē hevadauhanau. <sup>15</sup> Nau hanaāēdauwunaude, hethauwuvadavethenau nuu hadavechauthadede naugu nananena haje- sejasauwauwuthānau: <sup>16</sup> Hanau nāedauwunathana, Nadnehauwauthevethe nuu, haunaude hadnauauchauau henajanede Hejavaneauthau. <sup>17</sup> Nau hanaāedanauau vāenau, nau hanaāēvāde vaveenede, nau hanaāenehede, Hedanauwu nuu, nau hadjaanauwauva nehayau: <sup>18</sup> Hanau nāedauwunathana, Naudnehauwuvanethede

dadajevenenaje, hanaude henajanede  
 Hejavaneauthau nauauchauyāgu. <sup>19</sup> Nau  
 hanaāedanauau jauaujau, nau hanaāevade  
 vaveenede, nau haejeane, nau haevena, Nuu  
 nanaa nadanayau havenadenenau: nuu  
 hadneejenauneethedaunena, hathauhuk.  
<sup>20</sup> Naasauau jea vāenau hāesethunevethedaunee,  
 Nuu vāenau waunauyauau hesānaavede Navaevaa,  
 hanedaunauwunana, hathauhuk. <sup>21</sup> Hau  
 nauhauvaa, hejadena henee haneavedau-  
 daunade nananenauau nanedauguvānauau  
 vethehedaunaa. <sup>22</sup> Nau hethauwuu Heau  
 henane hadjathāaude, neesedaunade: hau  
 naunauthaunee henee henane haneavedaudau-  
 naudenenee. <sup>23</sup> Nau hanaāenaunaudedaudethee  
 nehayau, hanaadee hadnesedaude nuu.  
<sup>24</sup> Nau hena jea haeneenayaundenauau,  
 hanaadee hadjavaāvasāthaa. <sup>25</sup> Nau  
 hanaāēdauwunaude, Nenauchuwuthee Neauthuu  
 haevahadahethedauwu; nau henee nanethenuu  
 naudahede nanadee hesenaedehehauau  
 neseadagaunee. <sup>26</sup> Hau jevanaathāhee: hau henee  
 havasāthawaunādaunenau, hadenahavaewauva;  
 nau henee naja waude henee henechauthāhehau.  
<sup>27</sup> Hanaa vanasāthaa, henee vanethede,  
 wauāthe henee henechauthāhe? gaujenane  
 henee vanethede? hau hanedaudau-  
 nathana waude henee henechauthāhe.  
<sup>28</sup> Nananena daudajauaunenethaunena  
 denaunaunauchauthehanau. <sup>29</sup> Nau  
 janenanauwunathana najanede, waude Nāsaunau  
 nejeesejenanauwunānau; <sup>30</sup> Hadevethena  
 nau hadevaveyāna navethehedaunaa  
 Nanajanedaunaa, nau hadetheaugudauwuna



najatheaugudaunau hadnauchuwuhauna vadadauchunesenee jajaesenanedanede Israel. <sup>31</sup> Nau Vahadāde hanaānehede, Simon, Simon, nauhauwune, Haujau nevadaunethenāne, hadvachuuguthāne waude thauauhanewauchunau: <sup>32</sup> Hau nevevethasathane, henee hadethauwuthajaude hadejenadegaudenauau: nau hāejauaugauthethajaunaune hadedāewaunauau hahauwauauau. <sup>33</sup> Nau haenehetha, Vahadāhene, Nananenau hanesaanunau hadnenenethaunathane, nesauna duguhunauauwuu, nau gaujauaudahedaunaa. <sup>34</sup> Nau haeāedauwuna, hāedauwunathane, Peda, neauthuneāhe hadnehauwunedu nuu desenenee, hajesejenehenaune nasau hadnethedauwaune henee nananene daujaenaunene. <sup>35</sup> Nau hanaāāedāuwunaude, Deathavejenanathana hāehauwunewauunava nesevāejethāwau, nau newaugusajaānauchu, nau wauaunau, gauhājevathēhāva hayewhu? Hegau, hathauhaugaunee. <sup>36</sup> Hanaāāedauwunaude, hau hewaunehaa henee nanethenauau nesevāejethāwau nanehaedanauau, nau jea henewaugusajaānauchu; nau henee janethenauau gaugauchu, nanehaeaudaunade heddu, nau jeaudaunaude gaugauchu. <sup>37</sup> Hanau nāedauwunathana, henee nuu wauthaunauhuu hethauwunaathauthaunauhunau, Nau haewauhaunuau wauwauchudauhuhau: hanau nethauthedauthanau hethauvaa. <sup>38</sup> Nau hathauhaugaunee, Vahadāhene, nauhaudau, heyewnau hanesāe gaugauthau. Nau haeāedauwuna, Naadauchāe. <sup>39</sup> Nau haejenaua, nau haejathāau, nesedaude, haua nee Olives; nau hethauguhādaunau jea haethauguhaa. <sup>40</sup> Nau

hānauusade, haeāedauwuna hevevethahee henee hadejejedāna vasehadede. <sup>41</sup> Nau haejāvesa hehejese nejechauthaunenee, nau haech-agujanaugu, nau haevevetha, <sup>42</sup> Nāchau, hith Nananene vadauusedaunenagu, jegudanauwune nuu vāenau hehethee Nananenau: hau nāhauwuvathehaa, hau Nananene, hadnaasauau, hathauhuk. <sup>43</sup> Nau haenauhauva hautheaune hehethee hejavaa, haedadāevaa. <sup>44</sup> Nau haeneenajeneethajau haeneenavevetha: nau heguwauaude waude davathejajaneauthee vaewauau dejanesee vedauauwuu. <sup>45</sup> Nau hāegauhāde hehethee devevethahede, nau haejeedasa hethauguhādaunau, Haeveena hae-seenaugauhunenau hee haudauwuthajaude, <sup>46</sup> Nau haeāedauwuna, Naudu haenaugauhuna? gauhāe nau vevethahee, hadejejedāna vasehadede. <sup>47</sup> Nau hajesanadede, haenauhauwu havathenedanede, nau henee Judas neseade, jasia vadadauchunesenee, haenedauva, nau haeayāedasa Hejavaneauthusaun hadnedanaude. <sup>48</sup> Hau Hejavaneauthusaun hathāhuk, Judas, gauhāavedaudauna Heau henane gauhadneenedanau? <sup>49</sup> Hāene henethauguvādaunau daunauhaudauwunethe hadnesehade, Vahadāhene, gauhadjedauauwaunauau hee gaugauchu? hathauhaugaunee. <sup>50</sup> Nau hanesāde haedauauva hewauwaunavene vasnajane vevethahevahew, nau haegauadathāhe hejavese. <sup>51</sup> Nau Hejavaneauthusau haeauchuhananadetha, Hauwaa nanesedau nuu. Nau haevasane henaudaununene, nau haenayauha. <sup>52</sup> Hejavaneauthusau

hanaāenehethaude najavevethahevahehau, nau haunauyauhauthāhehau vadannauauwuu, nau vachaugananenau, hejewaunedasādaunau, Gauhāejauva, waude heee havedehe, nauguu gauthau nau vachau? <sup>53</sup> Denethenaedevathana hayauwusenee vadannauauwuu, nananena hāehauwudaneva: hau nuu nauauchaudauna, nau naunauthauau vaneeyauau. <sup>54</sup> Hanaāedanauthee, nau haejathechauhanauau, nau haejedananauau Vasenajane vevethahevahew hedauauwunene. Nau Peda haejesedauchu. <sup>55</sup> Nau hāesewaudeaunathee nahethāe hadauvasenejesauau, nau haeauājanaugunauau, Peda haejanaugudauna. <sup>56</sup> Hau jasae hesāhedāeyaune haenauhauvaa daujanaugudaunaude hejava hesedaa, nau haenauchaudauhauvaa, nau hathāhuk, Naa henane jea nanethenaedewaude. <sup>57</sup> Nau haeethedauwautha, Hesā, nahauwaenaunau, hathauhuk. <sup>58</sup> Nau naunade jachau haenauhauvaa, nau hathāhuk, Nananene jea hanehedāhene. Nau Peda hahagu, Henane, nananenau hegau. <sup>59</sup> Nau heee jasaye denauachauau waunee jachau haeethauwunehene, hathāhuk, hethauwuu naa jea nanethenaedewaude; hanau nananede Gananaean. <sup>60</sup> Nau Peda hahagu, Henane, Nāhauwaene daun nesenehene. Nau chauchaunu, daunausunanadede, neauthuneāhe haenedu. <sup>61</sup> Nau Vahadāde haejaaagu, nau haenāuhauva Pedaheau. Nau Peda haethauchuthajaude hedanadedauunene Vahadāhenith, neesenehethāde, Hajesejeneduhude neauthuneāhe, nananene hadnethedauwauchune nasauna.

62 Nau Peda haenaua, nau haeneenavewau.  
 63 Nau henanenauau henee daununauthee  
 Hejavaneauthusaun haevavavanauchuhanauau,  
 nau haedaudauuvaa. 64 Nau hāesajeājethauthee,  
 haeanadeāhenauau, nau haenaunaudedau-  
 nanauau, Haeyāhe, hanaa henee haudauauvāde?  
 nethāhuk, 65 Nau wauthanee haewauwauchuvaa  
 nanāsanadethāde. 66 Nau chauchaunu hasenau-  
 gusājenee, vachaugananenauau henanedanede  
 nau najanauau vevethahehehauau nau  
 wauthaunauhāhehauau haeauāchaudaunanauau,  
 nau haejedananauau hadauhanadethee,  
 67 Gauhanane Chris? jeāedauwunāa,  
 hathauhaugaanee. Nau haeāedauwuna,  
 Hith Nananenau hāedauwunathanagu,  
 nananena hanājethauwaudaunena: 68 Nau  
 hith nananenau jea naudedauathanagu,  
 nananena hanājauchuhananadesena, wauāthe  
 hanājejenanena. 69 Hewaunehaa heee Heau  
 henane hadtheaugude hejavese naunaudāhenith  
 Hejavaneauthu. 70 Hanaāenehethee vahee,  
 Gauhanane Heau Hejavaneauthau? Nau  
 haeāedauwuna, Hasenehena Nananenau. 71 Nau  
 hahagaanee, Hehauwauthevathehāanauau  
 naudedauyaunauau? hanau nehayau  
 nandedaunaunauau Nehayau hedenaa.

## 23

1 Nau haunauude henanedanede hae-  
 gauhadene, nau haeyehaudaunanauau Pinade.  
 2 Nau hanaāevavasevāde, Vaneenaunauau naa  
 gauchuhuchaudede jajaesenanedanede, nau  
 nedauduwaude hadjevenauthee hauāyaunau  
 Caesar, daunahagu Chris Nenauchuwude,

nethadede, hathauhaugaunee. <sup>3</sup> Nau  
 Pinade haenaudedaua, Gauhanane  
 Dauhunauchuwuhunene Jews? hathauhuk,  
 Nau haeauchuhanāedauwunaa, Hethauvāne.  
<sup>4</sup> Hanaāedauwunaude Pinade najanau  
 vevethahehehau nau henanedane,  
 Nāhauwuveedenaune wausaunee naa Henane.  
<sup>5</sup> Nau haenaunauchauthedauhadene,  
 wauwayauchude henanedane,  
 hanechauhauthethāde hehethee vahee  
 Jewsevedauauwu, jejasesee hehethee Gananane  
 nauuu nuu vedauauwu, hathauhaugaunee.  
<sup>6</sup> Hāene Pinade nedauwauthaude Ganane,  
 haenaudedauva wauau hagananenane. <sup>7</sup> Nau  
 chauchaunu hāesaenauau henee daunaadāde  
 Herod hadaunajavanethe, haeathavenane  
 Herod, jea haenedau Dādaunedan hena  
 hese. <sup>8</sup> Nau hāene Herod nauhauwaude  
 Hejavaneauthusaun haevaseneethajau:  
 hee devadaunauhauwaude dajauaunee  
 hanau dauhuwauthanedauwauthaude; nau  
 haevadaunauhadauwu jasaa venauneguthau  
 hadnesedaunith. <sup>9</sup> Haenaunaudedaua  
 hauwauhuu hanadedauau; hau hae-  
 jauchuhananadethaa. <sup>10</sup> Nau najanau  
 vevethahehehau nau wauthaunauhāhehau  
 haetheaugunenau nau haenaunaunauchau-  
 thevaa. <sup>11</sup> Nau Herod nauguu vauānanenau  
 haejenananauaugaugauyaune, nau haevava-  
 vanauchuhanauau, nau haeneenuhanauau  
 neaudahenenee hu, nau haevenanauau  
 jea Pinade. <sup>12</sup> Nau hajesesenenee Pinade  
 nau Herod haenedaehāvadenauau nesauuu:  
 hanau nedauwu haesānavadenauau nehayau.

13 Nau Pinade, hāesauānadethaude najanau  
 vevethahehehau nau hauchuwunanenau nau  
 henanedanede, 14 Haeāedauwuna, Nananena  
 nauuchaudaunena naa Henane, nanahagu henee  
 gauchuhuchaudede henanedanede: nau, naune,  
 nananenau, haunauchuwuhauau hathaāhena,  
 nāhauwuvedenaune wausaunee naa henane heee  
 henee hayauhuhau nanāsevasewauna: 15 Hegau,  
 hehauwune Herod: hanau neathavejenanauwu-  
 nathane; nau naune, hehauwunee nauau  
 hehauwugaudauwudau. 16 Hadnensesegauhaa,  
 nau hadjenanauau. 17 (Hanau hadnaugauhuse-  
 naasedaude hadjenanaude hanesāhenethe  
 vasevethededauneagu.) 18 Nau haunauude  
 haevasānadenauau jasānee, Hausāguthaa naa,  
 nau jejenanauwunāaa Barabbas, hahagaune:  
 19 (Nananede hanau jasaa nejaevauāde  
 hedan, nau hanau nenaade, nethānade  
 duguhunauauwuu.) 20 Pinade henaheee,  
 haevadaujenana Hejavaneauthusaun, haeanade-  
 tha jea. 21 Hau haeneānaune, Saethechuhuu,  
 Saethechuhuu, hahagaunee. 22 Nau haeāedauwuna  
 nanaseauwaunee, Dusee, dusewauchudau?  
 Nāhauwuvedenaune hadneegaujauauthehaude:  
 Hadnaasedaunau hadnensesegauhaa, nau had-  
 naājejenanauau. 23 Nau haeneenavasānadenauau,  
 haeneenavadausaethechuhunauau. Nau  
 haeneānadenauau nau najanau vevethahehe-  
 hauau haechauwauauwaunauau. 24 Nau  
 Pinade haechuwardā henee hadnaasaunee  
 hasevathehāthee. 25 Nau haejenanauwuna  
 nananede henee hanau nejaevauāde nau  
 nenaade haethānau duguhunauauwuu;  
 nananede heenedauwaudenenenau; hau haevā

Hejavaneauthusaun                   hathanauwauthee.  
<sup>26</sup> Nau hāejathechauhauthee, haeedananaauau  
 hanesāhenith Simoneau, hehethee Cyrenene,  
 hananeedesade vedauauwuu, nau hananene  
 haenehanauwunanauau naugauchu, henee  
 hadnanewauunauwunith thauguu Hejavaneau-  
 thusaun. <sup>27</sup> Nau hena haethauguhaa hava-  
 thenanedanede, nau hesānau, haeaudauwutha-  
 jauha nau haevewauhunauau hee. <sup>28</sup> Hau  
 Hejavaneauthusau haejaaāne haeāedaawuna,  
 Dādaunedan hedaunauhau, jevahevewauhuu  
 hee Nananenau, hau heevewauhuu nehayau,  
 nau hee hadāeyaunevenau. <sup>29</sup> Hanau,  
 naune, hese janādauuu, hadneenehedaunee,  
 Haunauwuthajauau jenesaunehehauau, nau  
 henaudaunenau henee nejethauujanesāthee, nau  
 hethanenau hehauwunethuaunenau. <sup>30</sup> Hee  
 hadnaāejaseseneheduu hauane, Gauduaunānauau;  
 naa jauaudane, gaudauyauhunauau. <sup>31</sup> Hanau  
 hith heenesedauhaugaunee nuu hayauhuhau  
 janadanegauaheyaugaune                   hauhaudene,  
 haudneedusedaune wautheyaugu? <sup>32</sup> Nau  
 hena haenesenauau gauchuhunee jea,  
 wauwauchudauhuhau,                   haenethaunaa  
 hadnaugunaade. <sup>33</sup> Nau hāene hāedaduu, Calvary  
 hanaaseenee, hena haesaethechuhunauau, nau  
 wauwauchudauhuhau, hanesāhenith hejavese,  
 nau jachau nauwauthe. <sup>34</sup> Haenaāenehede  
 Hejavaneauthusau, Nāchau jaegudanauwunene;  
 hanau daujāenuu hasedauthee. Nau  
 haejaanaauwaunenau, hedāchaunene, nau hae-  
 heedaudauusadaunenau. <sup>35</sup> Nau henanedanede  
 haetheaugudaune dauhasauhauvade. Nau

hauchuwunanenau jea nauguu haeauchau-  
danavaa, haseneheyaugaune, Nenayauhaude  
hauthauau; Nanehanehanenayauhadede  
hethauwuu Chrisdeyaugu, Neayāsanāde  
Hejavaneauthu. <sup>36</sup> Nau vanenanenau jea  
haenaunaugauthedaunaa, haedasaa, nau  
haevenaa naneujaudenee dadajevenenaje, <sup>37</sup> Nau  
hathāhuk, Hethauwunajawaunaudagaunee  
Jews, henayauhade nehayau. <sup>38</sup> Nau  
haewauthaunau jea haewauthaunauhune  
hejavaa hedanadedeunene Greek, nau Latin,  
nau Hebrew, Naa Nanajawaunaude Jews. <sup>39</sup> Nau  
jachau wauwauchudahu chaunaunauaunith  
haewauwauchuvaa, Hethauwuu Chrisdenagu,  
henayauhade Nehayau nau nananee,  
hathāhuk. <sup>40</sup> Hau jachau haeauchuhananadene  
haedauduva, Gauhajeadaunau Hejavaneauthau,  
hanau nananene nanesadee hathauchuwhane?  
hathauhuk, <sup>41</sup> Nau neehanauau; hanau  
hanesedanauwunauau nanāsedauauau:  
hau Naa hehauwuwauchudau. <sup>42</sup> Nau  
hanaāenehethaude Hejaneauthusaun,\* Va-  
hadāhene, dauyewuwuthedaune hāanauusanaune  
Hanajanede. <sup>43</sup> Nau Hejavaneauthusaun  
hathāhuk. Hethauwuu hāedauwunathane, Nu  
desenee hadnethenaedevene Paradise. <sup>44</sup> Nau  
hāethauthaunesade, nau hanaāeveeyauau nanadee  
vahee hathāauauyaa haunaude nanasuusee  
hāenauauchauau. <sup>45</sup> Nau hesese haevenenauau,  
nau hauguthau Vadannauauwuu haethauwu-  
nauau nahethāe. <sup>46</sup> Nau Hejavaneauthusaun

---

\* **23:42** “Hejaneauthusaun” possibly should be “Hejavaneauthusaun”. (See note for 18:19.)



hāevasānadede, Nāchau, hajadenea hadaunaunehau Navadathuwu, hahagu: nau hāesenehede nuu, haevadauwauthauwu. <sup>47</sup> Wauhā vanenenaja hāenauhaudauau hasedaudenenee, Haeauwauaudauna Hejavaneauthu, Hethauwu naa chaunuvāde Henane, hahagu. <sup>48</sup> Nau vahee henanedanede henee hathāejeauānuusathee hadnauhauwauthee, haenauhaudauwu hanasedaudenenee, haeanadesejāhedenauau, nau haejaajegauhudaune. <sup>49</sup> Nau vahee henedae-hauhau, nau hesānau hethāethauguhādaunau hehethee Gananee, haetheaugunenau vavāaune, haenauhaudauwu nuu. <sup>50</sup> Nau, naune, henane Joseph haesees, najananadehe; nau haeethā, nau haechuvā: <sup>51</sup> (Naa haejechuwardā hasenehedaunenee nau hasedaunethe;) haenaadāde Arimathaea, hedan Jews: nananede jea nehayau haejauwuwude henajanedauene Hejavaneauthu. <sup>52</sup> Naa haeyehau Pinade, nau haenedauwaude hedanayaunene Hejavaneauthusaun. <sup>53</sup> Nau haejanana, nau haeauyuuna naunaujānaunee, nau haejenana nedauthānavathe gaujauaudahehehau hau-naugāe, haunauau henane haejethauujenana. <sup>54</sup> Nau hena hesees haesaanudaune, nau vadanesees dayānauauchauau. <sup>55</sup> Nau hesānau jea, hejenauunethaunādaunau hehethee Gananee, haethauguhā, nau haenauhaudauwu hadausaesenanethe, nau hedanayaunene hathaudanee. <sup>56</sup> Nau haejaenauthau, nau haesaanudenauau hathāeneevaudenees nau chauayaunau; nau haedauyānusenauau vadanesees hasauau nanavaavede.

## 24

<sup>1</sup> Wauhā nanedauwaudaa hese hauchau-  
 vadede, hajesejevesesanith haejeedadauwu  
 hadausaesenanith, haenauuchaudenauau  
 hathāeneevaudenee heesaanuthaunenau,  
 nau jasae hauthauau nauguu. <sup>2</sup> Nau  
 haenauhauvanauau hauunaugane haeausānene  
 hehethee hadausaese. <sup>3</sup> Nau haejedānauau, nau  
 haejevedenauau hedanayaunene Vahadāhenith  
 Hejavaneauthusaun. <sup>4</sup> Nau hethauwuu  
 daugaudauwuthajauthee hee, naune,  
 hanesenethe henanenau haetheaugudaunā  
 haenauasāaunenau hedāchaunene: <sup>5</sup> Nau  
 daunāthajauthee, nau haenaunauagunauau  
 vedauauwuu, haeāedauwunā, Naudu nananena  
 haenaudehauna hanenaededaunaude nethee  
 gaujauaudahehehau? <sup>6</sup> Hehauwanedau  
 hede, hau jaegauhāde: dauyewuwuu  
 neethāedauwunāna denausunanedaude Gananee,  
<sup>7</sup> Neesenehede, Heau henane hadvenavathe  
 hejadenene wauwauchudaunanenau, nau  
 hadsaethechauhude, nau nasese hadjaegauhāde.  
<sup>8</sup> Nau haedauyewuwunauau hedanadedauunene,  
<sup>9</sup> Nau haenaudauwu hehethee needausaese-  
 nanith, nau haeauthedaunanauau vahee nuu  
 hayauhuhau jasānee, nau vahee hauthauau.  
<sup>10</sup> Haenane Mare Magdalene, nau Joanna,  
 nau Mare henaune James, nau hauthauauau  
 hesānauau henee henethaunādaunenau,  
 neauthedaunauthee nuu hayauhuhau  
 vadauhanau. <sup>11</sup> Nau hedanadedauunenau  
 hathanadauwuyaugaune gaugauyaune, nau  
 haejethauwaudaunaunauau. <sup>12</sup> Hanaāegauhāde  
 Peda, nau haeyeseneegau hadausaesenanith, nau

haewauguau, haenauhaude naunaujānaunee  
 haeānaudanenu jessaa, nau haenaude,  
 haegaugauanade hasaunee. <sup>13</sup> Nau, naune,  
 hanesenethe haeyehaunenau henee hajesesenee  
 hajasee hauauwudan Emmaus haseagu,  
 hehethē Dādaunedan wauau nesaudauchu  
 nau gauuu daugauha. <sup>14</sup> Nau haenanadenuau  
 wauhaunee vahee nuu hayauhuhau hasaunee.  
<sup>15</sup> Nau hethauwuu, henee, dauanadethee  
 wauhaunee nau haenaunaudedaunadenuau,  
 Hejavaneauthusau Nehayau haeeauchaua, nau  
 haenethauna. <sup>16</sup> Hau hesesānenau haedunenenuau  
 henee hadjaenaunauthee. <sup>17</sup> Nau haeāedauwuna,  
 Hayewnau hadanadedaunenau nuu henee  
 nananena hānegudaunenenuau, daujajāwauaunadena,  
 nau daudaneāauna? <sup>18</sup> Nau jasia hanaaseede  
 Cleopas, haeauchuhananadethaa, Gauhanane  
 vavade dauhadavesane nuu Dādaunedan, nau  
 gauhajaene hayauhuhau hasedaunenee hena  
 nuu hese? <sup>19</sup> Nau haeāedauwuna, Hayewnau?  
 Nau haeāedauwunaa, Heee Hejavaneauthusau  
 Nazareth, nananede Haeyāhe naunaudāde  
 hanasedaude nau hedanadede hathaāhenith  
 Hejavaneauthu nau vahee henanedanede:  
<sup>20</sup> Nau najanauau vevethahevahehauau  
 nau hadauchuwanenevee neesevānethe  
 gaujauaudahede hadneauchuwuhade, nau  
 nesaethechauhude. <sup>21</sup> Hau nejauwuwuhaunauau  
 Nananede hadnenayaude Israel: nau  
 nauguu vahee nuu, desenee nanasāe hese  
 hāsesenedaunenee. <sup>22</sup> Haa, nau jasia hesānauau  
 jea hadahenauau nenāvānauau, naugusāge  
 neanedauthee hadausaesenanith; <sup>23</sup> Nau

dejeveedethee hedanayaunene, nejenusathee, neauthedathee, henee jea haenauhauvanauau hautheaunau neethāhaugaunee henee daujaenaedeyaugaune. <sup>24</sup> Nau hauthauauau hānethaunādaunene deyehaunauau hadausaesee, nau haeveedenauau vavade hesānauau neesenehenethe: hau haejenauhauvanauau. <sup>25</sup> Hanaāēdauwunaude, Hau hāhauwaenava nau gaunauanu hadahenau hethauwandanee vahee henee haeyāhehauau nethauthedathee: <sup>26</sup> Naasauau Chris hadnasenede nuu, nau hadjedāde hadnedauvasāthaa. <sup>27</sup> Nau jeejasesee Mosese nau vahee haeyāhehauau, neevavesēdauwunaude heee vahee hanathauthaunauhunee hayauhuhau hadnesenaedede Nehayau. <sup>28</sup> Nau haeeauchauwu hajasee hauauwudan hasesathee: nau nehayau haenenedauneha hadjavesade. <sup>29</sup> Hau haeneenadaunanauau, hathauhaugaunee, Hanedaundaunāa: hayānaesade, nau hesee hayāenauwusanauau. Nau haejedā hadnanedaundaunaude. <sup>30</sup> Nau hethauwuu, daujanaugude haenethevetheheva, Haedane jauaujau, nau haevaveene, nau haejeane, nau haevena. <sup>31</sup> Nau hesesānenau haegaunanenenau, nau hanaāaenaunauthee; nau haeyauhaudenauau. <sup>32</sup> Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau? <sup>33</sup> Nau haegauhānauau chauchanu nau haejaeyehaunauau Dādaunedan, nau haeveehanauau jasānee haeau nau uadaunāhenenau, nau hauthauau henee hanedaundaunādaunenau, <sup>34</sup> Vahadāde

gauhāde hethauwuu, nau haenauhautheha Simon, hathahaugaunee.\* <sup>35</sup> Nau haeauthedanauau hayauhuhau hanasedaunith hadesathee, nau hasaenaunāde daujeanaauau jauaujau. <sup>36</sup> Nau daunausunanadethee, Hejavaneauthusau Nehayau haetheaugu nahethāe hadauthee, nau hathāhaugaunee, Danādauyauau vanenathana. <sup>37</sup> Hau haenānauaunauau nau haenāthajaunauau, nau hasethajuhaugaunee henee haenauhauvanauau vadathu. <sup>38</sup> Nau hathauhuk, Naudu nananena haenāthajauna, nau naudu haegaugauuthajauna gauhānauha hadahenau? <sup>39</sup> Nauhaudauwuu Najadenau nau Nauaudau, henee Nananenau nehayau: Vasanee, nau nauhauwuu; hanau vadathau hehauwudausānune nau hehauwudechaunave, hathauhauwuna. <sup>40</sup> Nau dauhanadede, haenauhautheha hejadenau nau heaudau. <sup>41</sup> Nau haejethauwuthajaunauau hee haunauwuthajaude, nau haegaugauuthajaunauau, Haeāedauwuna, Gauhajeveheneva hede? <sup>42</sup> Nau haevenanauau hanesāhenith nauwu haeaujaunene, nau gauhauaugunaugauye. <sup>43</sup> Nau haedane, nau haevethe hathaājenethe. <sup>44</sup> Nau haeāedauwuna, Nuu nanāe hanadedauunau hāauthedaunathadenenau, denausunethenaedevathana, henee vahee hayauhuhau hadnethauwunauauchuu, hanauthaunauhuu henanavaavede Mosese, nau haeyāhehauau, nau psalms hee Nananenau.

---

\* **24:34** The last word of the verse is unclear and could be “hathahaugaunee” or “hathahaugauhee”. The former was chosen as being closer to what is used in other instances of direct speech.

<sup>45</sup> Hanaāegaunanauwunaude hadnaenauwunethe, henee hadnaenauwunethe wauthaunauhanau,  
<sup>46</sup> Nau haeāedauwuna, Hathauthaunauhuu, nau naasauau Chris hadnasenede, nau hadjaegauhāde hehethee gaujauaudahede nasese: <sup>47</sup> Nau henee haugauthegaugauuthajaude nau hadjaegudanee wauchudaudenau hadnautheduhunee heee Heneseede nanadee jajaesenanedanede, hehethee Dādaunedan. <sup>48</sup> Nau nananena haenauwuna nuu hayauhuhau. <sup>49</sup> Nau, naune, Nananenau vanenathana sayānee Nāsaunau hau theauguu hedan Dādaunedan, haunaude nananena hāchauwunagu nauguu naudahede hehethee hejavaa. <sup>50</sup> Nau haejasesenedauwauna hajechaudanee Bethany, nau haegauha, nau haevevethasa. <sup>51</sup> Nau hethauwuu, daunausuvevethauchaude, Haenautha, nau haejechauhau jethee hejavaa. <sup>52</sup> Nau haevevethedaunanauau, nau haejaeyehaunauau Dādaunedan nauguu vaseneethajaude: <sup>53</sup> Nau dajauaunee haenedaunauau jedauwuu Vadannauauwuu, hauwaunede nau haevevethedaunanauau Hejavaneauthu. Hethauvaa.

**Hethadenee waunauyaunee vadan Luke  
Vanenā<sup>na</sup>  
The Gospel According to Luke in the Arapaho  
Language of the United States of America**

Public Domain

Language: Arapaho

Translation by: Michael White Hawk and John Roberts

2015-05-06

---

PDF generated using Haiola and XeLaTeX on 11 Nov 2022 from source files  
dated 2 Aug 2022

49903679-7190-57d9-b73a-1c2da4854577